

**NINTH MIZORAM LEGISLATIVE ASSEMBLY
(SECOND SESSION CUM BUDGET SESSION)**

LIST OF BUSINESS

FOR FOURTEENTH SITTING ON MONDAY, THE 11th MARCH, 2024
(Time 10:30 A.M to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

FINANCIAL BUSINESS

DISCUSSION AND VOTING ON DEMANDS

2. **PU K. SAPDANGA**, Minister to submit to the vote of the House various Demands under his charge.

Demand No.	Purpose	Amount (in ₹)	Demand for Grants Page No.
13	Personnel & Administration Reforms	4,14,80,000.00	79-83
16	Home	8,34,06,39,000.00	130-163
30	Disaster Management & Rehabilitation	64,46,63,000.00	329-335
46	Urban Development & Poverty Alleviation	3,72,28,94,000.00	485-496
TOTAL		12,74,96,76,000.00	

3. **PU LALTHANSANGA**, Minister to submit to the vote of the House various Demands under his charge.

Demand No.	Purpose	Amount (in ₹)	Demand for Grants Page No.
33	Land Resources, Soil & Water Conservation	28,47,39,000.00	362-365
35	Fisheries	11,01,43,000.00	380-384
36	Environment, Forests & Climate Change	1,40,46,08,000.00	385-394
41	Sericulture	16,85,64,000.00	438-442
TOTAL		1,96,80,54,000.00	

VANLALTHANTLINGI
Commissioner & Secretary

HON. SPEAKER : “Remna siamtute chu an eng a thawl e, Pathian faa vuahin an awm dawn si a.”

-Matthaia 5:9

QUESTIONS & ANSWERS:

Le, zawhna leh chhan naah kan kal nghal ang a. *Starred Question no. 221*-na zawt turin Tuirial bialtu member zahawm tak Pu K. Laldawngliana ilo sawm ang u.

Starred Question No. 221 - Mizoram sorkar hnuaia staff entitlement chungchang.

PU K. LALDAWNGLIANA: Pu Speaker, GAD changtu, Chief Minister chhan atan ka zawhna chu –

“Mizoram sorkar hnuaiah an entitlement aia tam staff kawl an awm em? Awm ta se, engtia hmalak tum nge ni ang?” tih a ni e. Ka lawm e.

HON. SPEAKER : Chhang turin GAD changtu, Chief Minister Pu Lalduhoma ilo sawm ang.

PU LALDUHOMA, HON. CHIEF MINISTER: Pu Speaker, zawhna chhanna chu –

“Mizoram sorkar hnuaiah entitlement aia tam staff kawl an awm hriat a ni lo. Hetiang an lo awm a nih chuan, February, 2024 chhunga lo inchingfel tura hriattir an ni a, chumi hnu lama an la kawl chuan, action lak a ni ang” tih a ni.

HON. SPEAKER : *Zawhbelhna - Zawhna neitu*, Pu K. Laldawngliana, Tuirial Bialtu.

PU K. LALDAWNGLIANA: Pu Speaker, ka zawhbelhna chu - Entitlement of vehicles hi officer eng chinin nge dawng thei? Dawng pha lo turin dawng an awm em? Awm ta se, engtiangin nge hma lak tum a nih?

HON. SPEAKER : Chhang turin a changtu, Chief Minister Pu Lalduhoma ilo sawm ang.

PU LALDUHOMA, HON. CHIEF MINISTER: Pu Speaker, a dawng tur chin leh an dawn theih tur zat hi chiang takin a awm a. An dawn theih chin bak lo kawl an awm emaw, dawng thei lovin an lo dawng a nih chuan, ka chhan tak ang khan February thla a lo ral tawh a, chung chu a rukin a endiktu hi kan siam a. Chu mite chuan chutiang mi an hriata, an rawn report chuan, an phu ang tawkin action kan la dawn a ni.

HON. SPEAKER : *Starred Question No. 222-na zawt turin Thorang Bialtu, Pu R. Rohmingliana ilo sawm ang.*

Starred Question No. 222 - MLA Fund-a motor lei chungchang.

PU R. ROHMINGLIANA: Pu Speaker, ka lawm e. Pu Speaker, Parliamentary Affairs Minister zahawm tak chhan atan ka zawhna Starred Question No. 222 chu –
 “MLA Local Area Development Fund hmanga motor leite hi a leitu MLA term a tawp hnuin engtia tih zel tur nge?” tih a ni e.

HON. SPEAKER : Chhang turin, Parliamentary Affairs Deptt. changtu, Minister Pu Vanlalhlana ilo sawm ang.

PU VANLALHLANA, HON. MINISTER: Pu Speaker, Member zahawm tak Pu R. Rohmingliana zawhna chhanna chu hei hi a ni e –

“MLA Local Area Development Fund hmanga motor leite hi a leitu MLA term a tawp hnuin, a lei chhan mipui tan (public purpose) hman chhunzawm tur a ni” tih a ni a.

Amaherawhchu, Pu Speaker, i hriat angin, Ni 16 khan nangma kaihhruainain GPC (General Purpose Committee) kan thukhawm a nih kha. Khatah khan mumal deuh zawkin hetiang hian thu tihthluk a ni – “MLA ten MLA Local Area Development Fund hmanga ruang phurhna tur motor an leite chu, an term a lo tawp khan book value-in MLA te emaw, Ex-MLA te’n emaw an tlan thei ang a. Chutianga khul duh an awm lo a nih chuan, Assembly Legislative Secretariat hian sorkarin a tihdan pangngai angin a tiral ang” tih a ni.

HON. SPEAKER : *Zawhbelhna - Zawhna neitu, Pu R. Rohmingliana.*

PU R. ROHMINGLIANA: Pu Speaker, ka zawhbelhna chu - khatianga thutlukna kha tih chhuah a la ni si lova, a nih hmaa department khawi emawa lo return a awm khan, Assembly Secretariat hian a la let mai dawn em ni ang; auction a nih loha, book value-a khul tir annih si loh chuan?

Pu Speaker, i phalnain - a relevant lo deuh hlek na a, hriat chak deuh hlek kan nei a. Tun Ni 8 (Zirtawpni)-a ka question chhanna kan House Leader zahawm takin, “zaninah emaw, naktukah emaw an release ka beisei” a tih, Unity Mall sakna tur ₹1,27,000 kha central lamin an release tawh em?

Pu Speaker, i phalnain - Kan House Leader hian vawiin niah hian, “Zirtawp zannah emaw, Inrinni ah emaw an release kan beisei” a tih lai kha, khawngaihin min hriilh theih chuan a lawmawm ngawt ang.

HON. SPEAKER : A va penhleh ta deuh ve. Eng pawh nise, zawhbelhna chhang turin, Parliamentary Affairs Deptt. changtu Minister kha, a chhang thei a nih chuan ilo sawm ang.

PU VANLALHLANA, HON. MINISTER: Pu Speaker, GPC ina a lo tihluk tawh kha minute te circulate a ni a. Khatiang khan motor MLA te'n ruang phurhna atan an lo lei tawh, an kawl tawh lova, Assembly ah emaw Secretariat ah emaw an lo theh luh pawh, committee-in a tihluk anga dispose tur ni ang chu.

Unity Mall chungchang kha chu a relevant lova, Pu Speaker, ka chhang thei lo e.

HON. SPEAKER : Kan House Leader khan a chhang thei em? Zawhna pawnlam chu a ni na a, chhan awm a tih leh chhang turin kan sawm ang a; a ngaih dan dan ni teh se. 'A relevant lo em mai' ti mai ang aw. A inkaihhnawih lo deuh e.

Starred question no. 223-naah kan kal ang. Zawhna zawt turin Champhai South bialtu member zahawm tak Lt.Col. Clement Lalhmingthanga ilo sawm ang.

Starred Question No. 223 - Champhai District Jail chungchang.

LT. COL. CLEMENT LALHMINGTHANGA: Pu Speaker, ka zawhna, Starred Question No. 223 chu –

- a) Champhai Distirct Jail, Khawzawl nena intawm mek hi tihlen tumna a awm em?
- b) Khawzawl District tan hian District Jail a hrana an neih theihna tura hmalakna a awm em?

HON. SPEAKER : Chhang turin Home Deptt. changtu, Minister Pu K. Sapdanga ilo sawm ang.

PU K. SAPDANGA, HON. MINISTER: Pu Speaker, Champhai South Bialtu, Lt. Col. Clement Lalhmingthanga zawhna chhanna chu –

- a) Champhai District Jail Khawzawl nena intawm mek hi tihlen tumna a awm rih lo.
- b) Thawktu indaihlohna leh sum leh pai harsatna avangin, khawzawl District Jail neihna tur atan hmalakna a awm rih lo.

HON. SPEAKER : *Zawhbelhna* – Zawhna neitu, Lt. Col. Clement Lalhmingthanga.

LT. COL. CLEMENT LALHMINGTHANGA: Pu Speaker, ka zawhbelhna chu - Chhannaah khan, "Champhai District Jail tihlen tumna a awm rih lo" tih kha a ni a. Chutih rualin, a hnu lamah khan district 7 bawr vela District Jail sak thatna tur atan

proposal theh luh mek niin ka lo hria a. Chutiang chu ni ta se, khilai Champhai District Jail khi a hmun hma khian a zo tawh lova, future ah sakthat tumna te lo awm ta se, a thar sak theihna tur hmun remchang zawk a awm leh awm loh survey te a awm em?

HON. SPEAKER : *Zawhbelhna* - Mamit Bialtu, Member zahawm tak Pu H. Lalzirliana.

PU H. LALZIRLIANA : Pu Speaker, Home Minister zahawm takin a chhan atan, ka zawhbelhna chu –

i) Kan Home Minister khan District Jail-te an tawt tawh thu leh, a capacity piah lam an awm thu kha a sawi a. Chutah chuan, District Jail eng emaw zah tihchangtlun leh tihhmasawn tumna a awmin ka hria a, chutah chuan Mamit District Jail khu a tel ve em?

ii) Hei, Mizoram Private Placement Agency, ram danga awm tur mi thawn thin ho hian permit nei ve thlapin an lo ti a nih hmel a; DC atangin permit hi an pe ve ni ngei tur a ni a. Chu chu, Mizoram sorkar hian Private Placement Agency te hi DC hnuaiyah license pek chhuah anni tih a hriatpui em?

iii) Anni ho hian unskilled labour, a bik takin domestic helper-te hi an thawnchhuak thin a ni. Heng DC permit nei Mizoram-a Private Placement Agency eng emaw zah tena unskilled labour an thawn chhuahah hian ruahmanna felfai zawk neih tum a ni em?

HON. SPEAKER : *Zawhbelhna* - Aizawl South-III Bialtu zahawm tak, Pi Baryl Vanneihsang.

PI BARYL VANNEIHSANGI: Pu Speaker, Home Department changtu Minister hnena ka zawhbelhna chu - Nichina an sawi tak Jail indaihlohnaah hian, Hmeichhe Jail pawh a tel chiang khawp mai a. Hetah hian capacity aia tam anni lamah pawh hian an awm a, an tawt em em mai a. He harsatna hi hriain, sorkarin chingfel turin ruahmanna a nei em?

HON. SPEAKER : *Zawhbelhna* - Pu Lalmuanpuia Punte, Hrangturzo Bialtu.

PU LALMUANPUIA PUNTE: Pu Speaker, ka zawhbelhna chu –

i) Prison (Jail) hi Police hnuaiyah dah tumna a awm em?

ii) Hachhek Bialtu, Pu Robert Romawia Royte pawhin arawn zawh tawh ang khan, thingtlang lam Police Station-ah hian motor an indaihloh bakah motor pawh a chhe lam a ni deuh vek mai a. Chuvang chuan, thingtlang lam Police Station leh outpost kan dah te hi motor lama thuam chak tumna a awm em?

HON. SPEAKER : Chhang turin, Home Department changtu, Minister Pu K. Sapdanga ilo sawm ang.

PU K. SAPDANGA, HON. MINISTER: Pu Speaker, zawhna neitu Pu Clement-a, Champhai South Bialtu zawhbelhna (a hming hi a thui lutuk a; min lo hrethiam sela) chhanna chu - Tuna ruahmanna awm mek hi chu a tih lenna lam ni lovin, tihphuisuina tur atana ruahman a ni rih phawt a; a capacity tihlen lam kha chu a la kawk chiah lova. A chhan chu, an rawn zawh chhan tak a bialchhung Champhai District Jail te khi hun hmasa lama kan sawi tawh ang khan, rangvaa hung te a la ni a, concrete wall pawh kan la tlin lova. Chung chu a nih avangin, Jail awmsa hi tihphuisui tuma ruahmanna chu a awm the meuh mai a. Tin, chu mi atan chuan Champhai bikah hian, SASCI atangin 2024-25 ah nuai ₹750 ruahman a ni nghe nghe a ni.

Tin, Mamit Bialtu Pu H. Lalzirliana zawhna kha - Mamit hi tihchangtlun tum zingah hian a tel a, tuna Mamit Jail tan hian nuai ₹380 ruahman mek a ni nghe nghe a.

Tin, Pu Zira zawhna - Private Placement Agency-te DC atang a license pek annih kha kan hria a. DC te hi license pe tur anni ngei mai a, a pek pawh an lo pe a. Amaherawhchu, license neitu te'n an license an hmang sual thin niin a hriat a. License ah chuan, "Outside Mizoram" tih a inziak a, a vet ve deuh bawk a. 'Japan pawh, Singapore pawh *outside Mizoram* a lawm' tih zawngin an lo la a. Amaherawh chu, a license petute'n an mean taka hi chu, India ram chhung, Mizoram pawna placement te zawn sak tur angah an lo ngai a; khalaiah khan 'terms and conditions a lo kimchang tawk lo' tih kan sawiho tawh a. Hei hi chu tihfel thuai beisei a ni.

Tin, Aizawl South-III Bialtu, Pi Baryl Vanneihsanghi zawhna kha – Central Hmeichhe Jail hi kan nei tak a; tihphuisui a ngai viau a, an tawh hle bawk a. Chuvangin, tihphuisui tum zingah khan a tel tih kha kan chhanna ni sela.

Tin, Hrangturzo Bialtu, Pu Lalmuanpuia zawhna kha –

1. Prison Department hi tunmaiah chuan Police Department-ah dah tumna a awm hranpa lo.
2. Jail hmunah te leh Police hmun hrang hrangah lirthei a indaih lova, chu chuan jail tang tlanchhuak um kawng thlengin harsatna kan nei thin a.

Tin, thingtlang lam Police Station-a motor lam thumthat tumna tunah mai chuan kan nei thei rih lova, sum indaihlohna te a nasa a. Amaherawhchu, 'kan indaihlo hle a ni' tih hi chu department-in kan hria a, department lamah pawh kan lo in en zel ang a. Lirthei hlui thingtlang outpost-a awm emaw, a thar zawk a hmun puia awm emaw kha a awm hran lova. Chutiang te a lo awma, kan indaih thei anih chuan, a rem ang angin kan lo ruahman ang e. Ka lawm e.

Zawhna Neitu - Pu Lalchhuanthanga, Aizawl South-II Bialtu.

HON. SPEAKER : Aw le, *Starred Question No. 224* zawt turin, Aizawl South-II Bialtu, Pu Lalchhuanthanga ilo sawm ang.

Starred Question No. 224 - *New Market building sak chungchang.*

PU LALCHHUANGTHANGA: Pu Speaker, Commerce & Industries changtu Minister chhan atan Starred Question No. 224 chu -

- a) New Market Building sak mek hi engtik atangin nge sak tan a nih?
- b) Engtik chhunga sak zawh tur nge?
- c) Tun dinhmunah hna engzat nge zawh a nih tawh?

HON. SPEAKER : Chhang turin Commerce & Industries Department changtu, Minister Pu F. Rodingliana ilo sawm ang.

PU F. RODINGLIANA, HON. MINISTER: Pu Speaker, he House zahawm taka kan Member, Pu Lalchhuanthanga zawhna chhanna chu -

- a) New Market building sak mek hi 2 (pahnih) a ni a, Commerce & Industries Department hnuaiyah Aizawl City Centre Annexe 4 (ACC Annexe) sak a ni a, hei hi Ni 24.06.2020 ah sak tan a ni. Tin, UD&PA Department hnuaiyah Aizawl Smart City Ltd. atangin Smart City Mission hnuaiyah Aizawl City Centre (ACC) sak a ni a, hei hi ni Ni 10.01.2023 khan a sakthat hna thawh tan a ni.
- b) Aizawl City Centre Annexe building hi thla 36 chhunga sak zawh tura ruahman a ni a; Aizawl City Centre Building hi thla 24 chhunga zawh tura ruahman a ni.
- c) Tun dinhmunah Aizawl City Centre Annexe building sak hi 65% zawh tawh a ni a, Aizawl City Centre building hi 31% zawh tawh a ni.

Pu Speaker, ka lawm e.

HON. SPEAKER : *Zawhbelhna - Zawhna neitu Pu Lalchhuanthanga.*

PU LALCHHUANTHANGA: Pu Speaker, ka zawhbelhna chu - Tu nge a contractor hming? Estimate Amount hi min hrilh thei em?

HON. SPEAKER : *Zawhbelhna - Lunglei South Bialtu, Pu Lalramliana Papua.*

PU LALRAMLIANA PAPUIA: Pu Speaker, ka zawhblehna chu - Lunglawn, Lunglei-ah sawn Industry ram tha deuh mai a awm a, sawtah sawn khawl tha tak takte pawh dah a ni a, building te pawh a awm a. Hun rei tak saw building leh khawl saw enga tan mah hmang lovin, dah tawl mai mai a ni a. Saw saw tangkai taka hman theih turin hmalak tharna a awm em? Hmalak a nih loha sawtia a awm mai mai chuan, vantlangin hman tangkai kan chak khawp mai.

HON. SPEAKER : *Zawhbelhna - Pu W. Chhuanawma, Tuichang Bialtu.*

PU W. CHHUANAWMA : Pu Speaker, ka zawhbelhna chu –

- i) Bazar building sak chungchang kan zawt a; Mission veng, Thakthing Bazar vela Inrinnia va kal sawn a zia lo em em a, kea kalna kawng zawng zawngah sawn chawhmeh leh thlai bakah sa te, sangha te an zuar khat del dul mai a. Sawlai hmunah sawn bazar changtlung tak dah tumna a awm em?
- ii) Khawzawl khi khawpui a ni tawh a, bazar hmun pangngai tak, nghet tak a awm loh avangin, khilalah khian bazar hmun neih a pawimawh em em mai a. Chu chu min tihsak thei ang em?

HON. SPEAKER : Chhang turin, Commerce & Industry changtu, Minister Pu F. Rodingliana ilo sawm ang.

PU F. RODINGLIANA, HON. MINISTER: Aizawl South-II Bialtu, Member zahawm tak Pu Lalchhuanthanga rawn zawhna kha - A contractor chu Lushai Engineering te an ni a, Estimate amount chu: Aizawl City Annexe - Crore ₹36,41,59,000; Aizawl City Centre - Crore ₹ 42.83 a ni.

Tin, Pu Papuaia rawn zawhna kha chu - a hmun leh hma te kan la kal chiah lo bawk nen, tunah mai chuan Pu Speaker, ka chhang thei lo ni ta se.

Mission Veng chungchanga Pu W. Chhuanawma rawn zawhna kha - state sorkar dinhmun kan hria a, tunah mai chuan ruahmanna thar a awm rih lo a. Tin, Khawzawl Bazar pawh kha kan hmuh chinah chuan ruahmanna thar a la awm lo a, sum a awm a nih chuan hmalak tum zel a ni.

Tin, Pu Speaker, zawhbelhna a ni bawk a han sawibelh ka duh chu - Ni 13 February khan bazar sak lai mek saw kan va en a, ngaihtuahna a tithui khawp mai a. Kangthelh motor hi a tlan tlang thei dawn lova, saw saw hun kal leh zel turah a drawing saw keimahni sorkar approve a ni lova, sorkar hmasa te lo approved a ni a; eng emaw chhiat rup thleng pawh lo ni se, fire brigade tlankual thei lova awm saw a pawi khawpin ka hria a. Thil thleng thei a ni a, Kolkata-ah te pawh a thleng a, kan hre tawh a. Fire Brigade luh theih loh avanga nunna chan tam tak te an awm a, kha tiang te kha thil thleng thei a ni a. Amaherawh chu a thleng ang tih kan hriat loh a ni a, inralrinna atan kangthelh motor lenga siam dan awm se tih chu ka rilruah a awm a.

Tin, Mission Veng bazar kha - ruahmanna chu a awm a, NEC lamah te pawh dil a ni a, a lo chhuah hun leh a reality kan hre chiah lova. Kha kha ka han chhan theih tawk ni mai teh se. Pu Speaker, ka lawm e.

HON. SPEAKER : A lawmawm e. Tunah *Starred Question No.225*-naah kan kal anga zawt turin Champai North bialtu Member zahawm tak Pu H. Ginzalala i lo sawm ang.

Starred Question No. 225 - *Commerce & Industries hnuaiia Entrepreneur te chungchang.*

PU H. GINZALALA : Pu Speaker, ka lawm e. Hon. Minister, Commerce & Industries Deptt. changtuin min chhan atan ka zawhna, Starred Question No. 225 chu –

- a) Commerce & Industries Deptt. hian sorkar kumtharah thalai leh Entrepreneur-te tan eng scheme nge a duan?
- b) Engzat chiah nge thalaite tan employment a siamsak theih a inbeisei? A zat chiah a sawi theih loh pawhin, a vel tal a sawi theih em?

HON. SPEAKER : Chhang turin, Commerce & Industries Minister
Pu F. Rodingliana i lo sawm ang.

PU F. RODINGLIANA, HON. MINISTER : Pu Speaker, ka lawm e. He House zahawm taka kan Member Pu H. Ginzalala zawhna hi, ‘chuti zat chu kan la ang, chuti zat chu kan ti ang’ tia a figure han sawi theih a ni lova. Amaherawhchu kan policy kaltlang leh ruahmanna kan lo neih tawh te, department pawhin hmalakna a lo neih tawhna atanga chhan te pawh ka tum ang a.

- a) Commerce & Industries Deptt. hian thalaite leh entrepreneur-te tan theihtawpa hmalak a tum a. Central Sector Scheme thar, RAMP - *Raising and Accelerating MSME Performance* hnuaiiah strategic investment policy te a duang a, chung kaltlang chuan central policy-te thalai tam zawkte hmalakna tur atan leh tuna industry tenau lo khawihute puihbawmna tur te pawh hi a ni a. Hei hi Handholding policy nen inthlun zawmin eizawna tam zawk, kan ruahman ang a nih chuan a sang tel mai ni lo, a sing tel te pawhin kan policy mila eizawna packing a ni emaw, slice machine a ni emaw, dryer machine ang te lo enkawl ve theih dan kawngte kan ruahman a. ‘Chuti zat chu kan peih thei ang’ han tih kha a ni lo a. Amaherawhchu, kan hun lo kal turin hei chu a rawn hril turah ka ngai, Pu Speaker.
- b) Thalaite tan a tam thei ang ber an chhawr theih nan ruahmanna kan siam a, chungte chu central scheme-te pawh mahni tawnga kan chhiar theihna tur atan programme kaltlang hian (hmanniah ka sawi tawh a, Wind-up-naah khan) thalaite’n mahni duh thala an sawi theihna tur leh, an duh ang zawnga hma an lo lak theihna tur atan ruahmanna kan siam a ni, tih kha ka chhan theih tawk ni rawh se. Ka lawm e.

HON. SPEAKER : *Zawhbelhna - Zawhna neitu Pu H. Ginzalala.*

PU H. GINZALALA : Pu Speaker, ka lawm e. Hei, Champhai hi kan hriat angin border-a awm kan ni a, international trade te pawh kan nei a. Sorkar a buai a, duh angin thil a kal thei lo zawk a ni a; amaherawhchu, tih theih tam tak a la awm cheu niin ka hria a. Chuvangin, Champhai District tan hian sorkar hian engtinge ni hma min

lakpui a tum? Tum a nei em? Eng lam hi nge ni kan focus ang, tih lai hi tlanglawn deuhin ka'n zawt a.

A dawt lehah chuan, hei, IIDC te pawh kan nei a. Tunah hian eng chin hi nge hna kan thawh tawha, engtia kalpui zel tur nge? Pu Speaker, ka lawm e.

HON. SPEAKER : *Zawhbelhna* - Tuichang Bialtu, Pu W. Chhuanawma.

PU W. CHHUANAWMA: Pu Speaker, ka lawm e. Industry hnuaia industry tenau te te, handloom hi ka vei ve a ni a. Demand sawihonaah khan Handloom & Handicraft Wing kha Sericulture nena amalgamate tur khan rawtna ka rawn siam a. Handloom bik hi industry-ah hian kan tangkaipui leh a hlawtling pawl tak a ni a. Hmannia ka sawi, Thenzawl bikah khan handloom-a eizawng kha chhungkua sang chuang daih anni a.

Tin, June – December, 20203 chhung khan crore 9 chuang an thawk chuak a, chuta tanga an hlep chu crore 6 vel bawr daih a nih thu te kha ka sawi tawh a. Chuvangin, ram pumah hian industry hnuaiah handloom hi tihchangtlun leh tih hmasawanna tura ruahmanna siam belh a tul hlein ka hria a. Ram pum huapin handloom hi kan tui vena leh kan eizawanna te a lo ni a.

Entirnan: Kan inchnungah te mi-harsa deuh te an lo lut a, nachhawknate bak kan pe thei thin lo a; an damna khawp engmah kan tihsak thei thin si lova. Thenkhat chu, ka mangang hianin, 'puantah in zir ve duh em; ka lo zirtir ang che u' te ka lo ti thin a ni. Puantah hi Mizote thinlungah hian hna atan leh eizawanna atan hian an rilru hi an la pe lo lutuk ni hian ka hria a. Hna tha deuh ni si (**Hon. Speaker:** A zawhna ah luh theih dawn tawh em?) Zep thu a cheng lova; tunah pawh hian khawchhak lam atanga puantahtu hi an tam em em mai a ni. Chuvangin, department hian Mizo thalaite tan hian puantah a that zia awareness campaign te hi min neih sak thei ang em?

HON. SPEAKER : Chhang turin, Commerce & Industries Department changtu F. Rodingliana ilo sawm ang.

PU F. RODINGLIANA, HON. MINISTER: Pu Speaker a zawhna neitu Champhai North Bialtu rawn zawhbelhna – Champhai ah khian tunah hian flat-in-factory kan sa mek a khimi industrial estate ah khian. Chutah chuan chhungkaw 35-40 velin eizawanna an hmuh theihna tura ruahhman a ni a. IITC pawh hi tunah hian crore 15 in khilai bial bik tana ruahhman neih a ni a; chu chu zawhbelhna ka chhanna ni ta se.

Tin, Pu W. Chhuanawma zawhna kha - Thenzawl hi sawrkar pawhin ruahhman a nei nasa a, kan sawrkar tirh phat pawh khan mi 30 chuang hnenah cheng nuai

nuaikhat leh tih kan va sem a. Tunah hian ruahhmanna lian tak mai *textile hut* siam tum a ni a, crore 42 vel ruahmanna central ah kan thehlu a. Chu te chu a rawn puitlin hunah chuan, puantah tan leh puantah mai bakah a dawr neitute tan pawh malsawmna a nih kan beisei a ni.

Thu chungin min zawt na chu, ding chungin k'an chhang ang a. A ram pum ang pawhin hmalakna a neih kan tum a, chumi a tan chuan Central atangin fund kan dil a. Keimahni budget atang hian tih theih a tlem em avangin, hand-holding policy ah khan tlem kan dah tel bawk a, district tinah te pawh zau zawka hmalak kan tum a. Hand holding policy a lo chhuah hunah ram puma kan hmalakna chu, Pu Speaker, chiang zawkin a la sawi theih a ang. Ka lawm e.

HON. SPEAKER : *Starred Question 226* na ah kan kal ang. Zawt turin Hachhek bialtu member zahawm tak Pu Robert Romawia Royte I lo sawm ang.

Starred Question No. 226 - Mamit District Police Oupost-a motor mamawhna chungchang.

PU ROBERT ROMAWIA ROYTE: Pu Speaker, Starred Question No. 226 - Home Minister zahawm tak chhan atana ka zawhna chu –

“Mamit District Zawlnuam Outpost, Marpara Police Station leh West Phaileng Police Station te hian motor tha pangngai an mamawh hle mai a, motor condition tha deuh pek theih dan a awm em?” tih a ni e.

HON. SPEAKER : Chhang turin, Home Department changtu, Minister PU K. Sapdanga ilo sawm ang.

PU K. SAPDANGA, HON. MINISTER: Pu Speaker, Hachhek Bialtu, Pu Robert Romawia Royte zawhna chhanna chu -

“Motor thar tha zawk pek tur a awm ve leh pek tum an ni e” tih a ni e.

HON. SPEAKER : *Zawhbelhna - Zawhna neitu*, Pu Robert Romawia Royte.

PU ROBERT ROMAWIA ROYTE: Pu Speaker, ka zawhbelhna chu –

i) Motor thar lei tumna budgetary support he kan budget sawi tho lai mekah hian a awm em? Lo awm ta se, engtika beisei theih nge ni ang?

ii) Thinghlun atanga Assam ramri lam kalna khu a tha lo khawp mai a, SASCI project atangin tunah hian siam mek niin ka hria a. Tunah hian an camp hmun leh an hmunhma hrim hrim khu ral hmatawnga awm a ni a. Kan hriat angin, Thinghlun dai kha hmana Assam DC te leh Police Battalion ten Mizo huan thlai an han sam vakna kha a ni a. An samna hmun ngei ah khan tunah chuan Mizoram Police hmun a awm a. Hei,

kan Police te an chhuanawm hlein ka hria. Tin, Hachhek bial chhunga Kolalian khu Assam ramri hrula awm bawk a ni a. Khung camp te khu keipawhin vawi 2 – 3 ka zuk tlawh a; an in leh lote raldona atan chuan a phuisui lo khawp mai a. Khung khu tih changtlun theih a ni dawn em? Tunah kan budget sawi ho mekah te hian chutiang tur chu kan nei em? Ramri bul a ni a, a bik taka ngaituah te pawh a va tul em, tih sawi pahin, a tih changtlunna tur leh motor pekna tur kha he budget ah hian a awm em?

HON. SPEAKER : *Zawhbelhna* - Pi Prova Chakma, West Tuipui Bialtu ilo sawm ang.

PI PROVA CHAKMA : Pu Speaker, kan Home Minister-in min chhana tana ka zawhbelhna chu –

Kan bial chhung Tlabung hi SDPO thutchilhna hmun a ni a, chutah chuan hmanni lawkah khan Police 5 min pe a, lawmawm hle a; amaherawhchu, Police quarter kha luah tlak lohina awm a. Chuvangin, Police Quarter sakna tura hmalakna a awm em? Ka lawm e.

HON. SPEAKER : *Zawhbelhna* - Pu TBC Lalvenchhunga, Aizawl West-I Bialtu.

PU TBC LALVENCHHUNGA: Pu Speaker, Home Department changtu Minister hnena ka zawhbelhna chu –

Ka bial bik Aizawl West-I khu huam zau tak mai a ni a. Zonuam Outpost-a lirthei kan neih chhun chu bike a ni a, headlight pawh eng thei tawh lo, nawr kal ngai a ni a. Lirthei hi police-te duty-naa an hman tur kan Minister hian min ngaihtuahsak thei ang em?

Ka zawhna pahnihna chu - Mizoram Armed Police te hun rei taka ta tawh allowances, a bikin Rifle Allowances an lo hmuh ve hi 40/- a nihna hi rei tawh ngar ngar khawp mai a. Tin, tunlai chhanah 40/- hi awmze nei lo a ni a. Allowances kan inpek hian awmze nei ve deuh hi a awm a, Mizoram Armed Police te pawh hian chu chu kan beisei hlein ka hria a. Chung chu han tihsan tumna tun sawrkarah hian a awm em?

HON. SPEAKER : A theih ang anga chhang turin Home Minister PU K. Sapdanga ilo sawm ang.

PU K. SAPDANGA, HON. MINISTER: Pu Speaker, a zawhna neitu Pu Robert Romawia zawhbelhna chhanna kha - Tun budget ah hian a hranpain motor thar leina tur dah a ni lo a, amaherawh chu ngaihtuah dan te chu a awm mahna. Tin, khulai Hachhek bial chhunga kan outpost - Thinghlun te, Kolalian camp te hotute zarah kan han tlawh kual ve den den a, khawi lai mah hi duhthusam a awm reng reng lo a. Amaherawhchu,

kan police-te an fel em em a, nuam ti lo awm ang pawhin an awm lo a. An duhzawng te erawh chu an lo thlen zel a. Tichuan, khulai Hachhek bial chhunga mi chang ni lo, hmun tinah kan police outpost-te leh border outpost te tih changtlun tumin, department-in a theih ang anga hma lak a tum a ni.

Tin, West Tuipui Bialtu, Pi Prova zawhna kha, Mizoram Police hian quarters leh infrastructure lamah kan la pachhe hle mai a. Tlabung mai ni lo, hmun hrang hranga police housing tih chaka tih phuisui tum a ni a, heng atan hian hmalak mek pawh a ni nghe nghe a. Chuvangin, chumi rual chuan, Tlabung police quarter-te pawh department-in, a tha thei ang berin thuam kan tum dawn nia. Pi Prova hi kan duat hle a ni.

Aizawl West-I Bialtu, Pu TBC Lalvenchhunga zawhna kha, Central Jail lirthei neih thatloh chungchang kha sawrkarin a hria a. (**Pu TBC Lalvenchhunga**: Pu Speaker, Zonuam Outpost zawk). Ka tihsual palh a; ‘Zonuam Outpost ah khan bike pakhat chauh, chu pawh chu nam nun ngai’ tih kha a ni a. Ni e, kan lo enfiah dawn nia.

Tin, Rifles Allowance kha relna a rei tawh a, cheng 40/- tih a ni a. Tunah hian thutlukna thar siamah chuan, ‘a letin tihpun ni phawt teh se’, tih a ni a. A la beitham viau nain rifle allowance chu cheng 80/- ah hlankai a ni e. Ka lawm e.

HON. SPEAKER : A lawmawm e. *Starred Question no. 227* ah kan kal ang. Zawt turin Hachhek bialtu member zahawmtak Pu Robert Romawia Royte i lo sawm ang.

Starred Question No. 227 - Bungthuam IR Police Outpost chungchang.

PU ROBERT ROMAWIA ROYTE: Pu Speaker, Starred Question No. 227, Home Minister zahawm tak chhan atana ka zawhna chu -

“Bungthuam IR police outpost awm mek hi tihtawp tumna a awm em?” tih a ni.

HON. SPEAKER : Chhang turin, Home Department changtu, Minister Pu K. Sapdanga.

PU K. SAPDANGA, HON. MINISTER: Hachhek Bialtu Pu Robert Romawia Royte zawhna chhanna chu -

“Tun dinhmunah Bungthuam IR Police Outpost tihtawp tumna a awm lo” tih a ni e.

HON. SPEAKER : *Zawhbelhna* - Lawngtlai West Bialtu, Member zahawmtak Pu C. Ngunlianchnunga.

PU C. NGUNLIANCHUNGA: Pu Speaker, Home Minister zahawmtak min chhan atana ka zawhbelhna chu -

Ni 16/02/2021 ah khan Diltlang South ah police beat post hawn a ni a, kan lawm hle a ni. Chutihlai chuan a han kal chho a, kumin ni 4/01/2024 a thawktute engmah sawi rik pawh awmlo in an lachhuak leh vek mai a. Kha kha engnge ni a chhan, dah leh dan a awm thei ang em tih ka zawhbelhna pakhatna a ni a.

A pahnihna ah chuan, kha ka hma a zawhna chhanna, ‘pawisa awm ve leh motor thar tha kan pe ang, outpost-ah’ a tihte kha, Bungtlang South Police Outpost leh Longpuighat Police Outpost an motor te a chhe em em mai a. Longpuighat hi Bangladesh border a awm an ni a, Bungtlang South hian Myanmar leh Bangladesh border kawp a, an pawimawh khawp mai a, kha kha min hriatsak ve thei ang em?

HON. SPEAKER : *Zawhbelhna* - Mamit Bialtu, Member zahawmtak Pu H. Lalzirliana.

PU H. LALZIRLIANA : Pu Speaker, Home Minister zahawmtak min chhan atan, ka zawhbelhna chu: -

i) Sawrkar hmasa ah khan ‘in principle approval’ kan nei a, Lengpui outpost hawanna tur kha vawiinni thleng hian a la function lo a. Hei hi engtikahnge a function theih ang, sum leh pai leh manpower indaihlohna avanga la function theilo ni khan a lang a. Hei hi engtikahnge a function theih ang tih a ni a.

ii) 4th IR Battalion HQ, Mamit hi an hmunhma in a zo tawh lo hle a. Hemi ramchhungah hian private ram, remchang em em mai, a department pawhin an en fo tawh, sawrkar ah pawh kan thlen fo. Tin, file te pawh an kal chho ngial a, Amaherawhchu sum leh pai harsatna avangin Finance lamah hian a tawp leh thin a. Hei hi 4th IR Battalion HQ zauhna tur atan ruahmanna siam tumna a awm em tih kha ka zawhbelhna a ni e.

HON. SPEAKER : Chhang turin, a changtu Minister, Pu K. Sapdanga i lo sawm ang.

PU K. SAPDANGA, HON. MINISTER: Pu Speaker, Lawngtlai West Bialtu, Pu Ngunlianchunga zawhna – ‘Diltlang South beat post-a thawktu an lachhuak te dah kir tumna a awm em’ tih kha, hei hi tunah mai chuan ka chhang thei lova, hotute ka lo sawipui ang. Tin, Bungtlang South leh Longpuighat-te lirthei mamawh chungchang pawh kha, kan hre reng ang a, remchang a awm phawt chuan kan ruahman dawn nia.

Hmun tinah hian Home Department hnuaiah, a bikin kan police thawktute leh lirthei kan indaih lo em em a, chuti chung kan hotute an tang em em a. Mihring leh

lirthei semrual hi kan hnarpui ber a nih tak hi maw. Min lo hrethiam hram hram turin kan han ngen a ni.

Mamit Bialtu, Pu H. Lalzirliana zawhna pawh kha khatiang deuh tho kha a ni a. Sawrkar hmasa ah Lengpui Outpost din tura ruahmanna a awm a, Amaherawhchu, hei hi kan la thleng thui lo viau mai a. Mihring indaihloh avang leh a sakna tur sum indaihloh vang thovin bultan a la ni lova. A tan hun tur erawh chu tunah kan sawi mai thei lo a ni. Tin, Diltlang beat post kha emergency arrangement a ni a, a tul ang a zira dahah ni se. (Dah loh tur chi a nih awm chu maw). Tichuan, kan chhan mek Lengpui outpost kha chu, kan sawi tawh ang khan sum indaihlohna a ziaawm deuh hunah leh mihring kan indaih deuh hunah bultan kan tum dawn nia.

4th IR Battalion ram indaihloh thu sawi a awm thin a, hei hi lei belh a chakawm hle mai a, a bulah lei belh tur remchang tak a awm tih te pawh (official ni chiah lovin) hriat a ni. Engpawh ni se, tunah chuan department ang emaw, sawrkar ang emaw chuan han lei belh tumna a awm rih lo e. Ka lawm e.

HON. SPEAKER : Aw le, *Starred Question no. 228* ah kan kal ang. Zawt turin Tuichang bialtu member zahawmtak Pu W. Chhuanawma i lo sawm ang.

Starred Question No. 228 - Art & Culture Deptt. hnuaia post chungchang.

PU W. CHHUANAWMA : Pu Speaker, ka zawhna, *Starred Question No. 228* chu –

- a) Art & Culture Department hnuaiah post engzat nge ruak?
- b) Gazetted post engzat nge ruak?
- c) Non-Gazetted post ruak engzat nge awm? tih te a ni e.

HON. SPEAKER : Chhang turin, Art & Culture Department changtu, Minister Pu C. Lalsawivunga ilo sawm ang.

PU C. LALSAWIVUNGA, HON. MINISTER: Pu Speaker, Tuichang Bialtu zahawm tak, Pu W. Chhuanawma zawhna chhanna chu –

- a) Art & Culture Deptt. hnuaiah post ruak 68 a awm a ni.
- b) Art & Culture Deptt. hnuaiah Gazetted post 3 ruak a awm mek.
- c) Art & Culture hnuaiah non-gazetted post 65 ruak a awm mek bawk.

HON. SPEAKER : *Zawhbelhna* - Champhai North Bialtu. Member zahawmtak, Pu H. Ginzala.

PU H. GINZALALA : Pu Speaker, ka lawm e. Ka bial chhungah hian Aiduzawl-ah hian library kan nei ve a. A building hi Assam type chhe em em mai, a

tluk mai te pawh hlauhawm a ni taw a. Chuvangin, Hon. Minister-in hei hi min siamsak vat turin ka ngen a. Ka ngenna hi min ngaihpaawimawh sak thei ang em?

HON. SPEAKER : Chhang turin a changtu minister, Pu C. Lalsawivunga ilo sawm ang.

PU C. LALSAWIVUNGA, HON. MIINSTER: Pu Speaker, Champhai North Bialtu zahawm tak zawhbelhna, Aiduzawl library building chungchang kha - Engpawh ni sela, kan lo chhinchhiah ang a.

Hei, Mizoram-a kan library NGO te enkawl hi 513 kan nei a, chu chu Raja Ram Mohan Roy Library Foundation atang hian a sak tanpuina leh lehkhabu leina te kan hmuh thin a. Pawisa remchang te kan nei theih a nih chuan, ngaihtuahna seng turin kan rawn inruahman dawn nia.

HON. SPEAKER : Tunah chuan *Starred Question no. 229*-naah kan kal ang. Zawt turin Tuichang Bialtu member zahawm tak, Pu W. Chhuanawma i lo sawm ang

Starred Question No. 229 - Khawhai Police Outpost chungchang.

PU W. CHHUANAWMA: Pu Speaker, ka zawhna, Starred Question No. 299 chu –

- a) Khawhai Police Outpost awm tura order chhuak tawh, tun thlenga a taka hmuh tur la awm lo hi engnge a chhan? Hmalakna a awm thei em?
- b) Sorkar hmasa atang tawhin DIG Eastern Range Khawzawl-a awm tura sawi a awm tawh thin a. Hei hi tih hlawhtlin tumna leh hmalak dan kawng a awm thei em?
- c) District Jail hi Khawzawl-ah dah tumna a awm em?

Khawzawl hi Eastern Range atan chuan a laili ber a, Saitual lam te, Champhai lam te tan han ban mai theih a ni a, Serchhip lam tan pawh. Chuvangin, DIG Eastern Range dah tumna a awm chuan, Khawzawl-ah ngei hiann dah ni se, kan zavai atan awlsam taka kan tangkaipui tur niin ka hria a ni, Pu Speaker.

HON. SPEAKER : Chhang turin Home Department changtu Minister, Pu K. Sapdanga i lo sawm ang.

PU K. SAPDANGA, HON. MINISTER: Pu Speaker, Tuichang Bialtu Pu W. Chhuanawma zawhna chhanna chu -

- a) Khawhai Police Outpost la function theih lohna chhan chu, manpower indaih lohna vang a ni. Mizoram Police hnuai hna lak phalna neih huna lak fel a nih ve leh function tir nghal tum a ni.
- b) DIG Eastern Range hi Police Headquarters Aizawl atang a function mek a, hmun danga office sawn turin ruahmanna nei a ni rih lo.
- c) Tin, District Jail hi Khawzawl-ah dah tumna a awm rih lo.

HON. SPEAKER : *Zawhbelhna* - Hachhek Bialtu, Pu Robert Romawia Royte.

PU ROBERT ROMAWIA ROYTE: Pu Speaker, kan Home Minister zahawm tak ka zawhbelhna chu –
 “Mizoram Police Football Academy-ah hian residential hostel awm tela, tihchangtlun tumna a awm em?” tih a ni a, min chhan thiam theih nan ka’n sawi zau hret ang a.

Hei, Sports-ah lo inhmang ve thin thin te ka nihnaah thil thui tak hre ve ah ka inngai a. Mizoram Police hi football leh games item dangah pawh an thawh hlawk khawp mai a, football phei hi chu Mizoram-a football tungdingtu, football sustaintu pawimawh tak an ni a, tuna an academy atang pawh hian footballer tha tak tak a produce thin a ni. Chumi hria chuan sorkar hmasa hun lai khan Sports Deptt. atangin Home Deptt. te nen agreement sign-in, Armed Veng-ah khuan phul lem field leh a thlang lam atang chhawng chhoin, chung chu hostel leh eng emaw tan a building tha tak mai siam a ni a. Sak zawh a la ni chiah lo nangin, kan sorkar thar hian improvement eng eng emaw a tih chuan, North East chu sawi loh India rama residential football academy tha pawl ni thei turin Mizoram Police-te hian an ti theiin ka ring a. Chu chu, a facilities-phul lem te hi India rama phul lem field nei awm chhun an ni a, Mizoram Police-te hi. Tichuan, a hostel tur building saksa, a bang leh eng emaw chu duh ang chiah ni lo mahse, a awm tawh sa vekah chuan, coach te an nei a, zirilaite an neisa vek bawk a.

Footballer-te hi rethei te te an ni tlangpui thin a, (ka tawng mawi lo ni lo se la) chungte tana residential a run mai a hi an tan hian har lutuk lo turah kan beisei a. Kan Home Minister zahawm tak hian chutiang tih tumna te chu a nei thei ang em,? Ti thei turin rawtna te pawh ka’n siam duh a ni e. Ka lawm e.

HON. SPEAKER : Tunah Home Department changtu Minister sawm ila, zawhna kha Police Outpost chungchang a ni a. Amaherawhchu, football lampang kha zawh belhna ah khan a rawn awm a. A chhan theih leh chhang ta sela, chhan thei loh pawhin kan dem lo ang chu. Ilo sawm ang.

PU K. SAPDANGA, HON. MINISTER: Pu Speaker, Hachhek Bialtu Pu Robert Romawia Royte zawhbelhna kha, ‘Mizoram Police Football Academy hi residential/hostel-ah tih changtlun theih a ni em’ tih ni a. Mizoram Police hian football

academy a nei lo a, amaherawhchu, 1st Batallion MAP Football Academy a awm a, chu chu batallion mal ta a ni. Tichuan, tun dinhmunah chuan residential hostel awm tela tihchangtlun tumna a awm rih lo.

Tin, tuna kan ngaihthlak ang khan, Armed Veng-a 1st MAP parade ground kha football ground-ah kan chantir deuh reuh niin a lang a. Hei hi 'engtianga hmantawm tur nge' tih te pawh sawi deuh ngai te chu a awm mahna. Tunah erawh chuan 1st MAP ta a nih avangin, department pum anga tihchangtlun tumna chu a awm rih lo a ni e.

HON. SPEAKER : A lawmawm e. Dar 11:30 PM a ri tawh a, zawhna dang kan la tawh lo ang a. Zawhna & Chhanna hun kan duhtawk ang a.

Member zahawm tak Dr. Lorrain Lalpekliaana Chinzah kha rokhawlhna avangin bial lamah a awm a, kan Minister zahawm tak Pi Lalrinpuui pawh hian rokhawlhna a nei a, 'a remchan ve leh karawn zawm ang e' a ti a. Chu chu House ka hriattir a.

Ni 13 thleng kan session hi kal tur a ni a. Kan Chief Minister hian, 'Member-te in bei ngawrh a, in hah si a; ni 14 tlai hi chuan chaw mal i thlahu ho teh ang u' a ti deuh a; member zawng zawngte dinner min buatsaihsak dawn a ni, kan Chief Minister-in. Memberte kan zavaiin tel kan tum dawn nia; kawppuite nen theuh tur a nih kha.

Question Hour chu a lo tawp ta a. Tunah chuan, *Minister Statement* kan ngaithla ang a. Dr. Vanlalhlana, School Education Department changtu Minister zahawm tak hnen atangin Rules of Procedure & Conduct of Business in Mizoram Legislative Assembly, Section 60 angin, HSLC question paper chungchangah House-a statement siam dilna kan dawng a, phalsak a ni a. Hetiang hi discuss a ni ngai lo a, chu chu memberte'n hre ta ila. Tunah Minister zahawm tak Dr. Vanlalhlana ilo sawm ang u.

STATEMENT BY A MINISTER:

DR. VANLALTHLANA, MINISTER: Pu Speaker, ka lawm e. Kumin 2024 MBSE hnuai Board exam kaihnawihah subject pakhata suggestion leh exam zawhna inang tam lutuk avanga he House zahawm takah Official Statement siam a ngai ta hi School Education Department leh Mizoram Board of School Education (MBSE) chuan pawh kan ti tak zet a ni.

MBSE hian Borad exam-te hi a ngai pawimawhin kum tam tak kan hriat atangin fimkhur takin exam hi a buatsaih thin a. Printing press atanga zawhna siamsa put ru a awm lohna turin state board dangte pawhin an tih ve theuh angin Mizoram pawnah a chhut hna hi thawh thin a ni a. Mizoram chhunga exam centre hrang hrangah him taka a thlen theih nan District Headquarters tinah MBSE officer-te ngeiin an sem darh a. District Headquarters theuh atangin exam centre Superintendent ten anmahni ngeiin an lam a, an khua theuh police outpost-ah emaw, police duty awmna hmunah emaw him

takin exam chhung zawng vawn thin a ni. Centre Superintendent-te hi ziaka inkaihhraina dan pek an nih bakah uluk taka hrilhfiah thin anni bawk.

Exam chhanna lehkhaphuk (answer-sheet) zawng zawng hi number lem, code pek vek a nih hnuah exam chhanna endiktu examiner hnenah tu chhanna nge tih hriat theih loh turin pekchhuah a ni a. Exam chhanna endiktu examiner-in an en zawhah exam chhanna ennawntu - scrutinizer kutah a lut leh a, chumi hnuah pawh ennawn leh a ni thin. Result peihfel hnuah pawh fimkhur thu hla ah naupang titha zual eng emaw zatte chhanna chu zirtirtu thlan bikte ennawn tir leh thin a ni. Borad exam atana zawhna siam question papers setting leh endika lo thlitfim (moderate) kawngah MBSE hi a fimkhur em em a. Principal emaw Headmaster, Head of Institution-te hnen atangin zirtirtu thawk rei tawh, rintlak leh hmingthate lakhawmin mawhphurhna la thei tur zirtirtu hming a chhawp chhuak a. An zing atang hian zawhna siamtu tur leh endika lo thlifimtu turte chu a thlang chhuak leh thin. Ruat an nihna lehkhah appointment letter-ah pawh an hna chu thuruk vawn ngai thil a nih thu leh, dan an bawhchhiata hrem an nih theih dan thlengin tarlan thin a ni a. Kaihhraina dan ziaka pek vek thin an nih bakah, moderator-te hian hming zia signature pe thlapin dan zawm tura intiamkamna an nei leh thin a ni.

Zawhna thlifima endiktu Moderator-te hian MBSE office-ah ngei an hna hi an thawk thin a, pindan hran bik siamsak anni. Ziaka inkaihhraina pek an nih bakah mimala hrilhfiah an ni bawk a. Chumi hnuah chauh chuan an hna hi an thawk tan thin. An thawh chhung zawngin MBSE officer-in an vil chawt a, an hnathawhna lehkhate hi nitin hna an thawh tan dawnin Controller of Examination hnen atanga pekchhuah thin niin, tlaiah lakkhawm leh ziah thin a ni. An hnathawhna kaihnawih thil engmah lakchhuah emaw, hawn emaw phal a ni lo a. An ziah chhinna (rough sheet) zawng zawng pawh bawhlhlawhbawma paih phal a ni lo a, an hnathawhna lehkhah zingah thil tel vek thin niin, result chhuah atanga thla 3 hnuah tih ral a ni chauh thin. Heti khawpa MBSE a fimkhur chung pawha zawhna thlifimtute zinga miin exam atana hman tura zawhna an thehluh chu a zirlaite hnena suggestion atana a lo hmang ta mai hi pawh kan ti tak zet a; sorkar hnathawk inkaihhraina dan kalh tlat a nih bakah, na taka hrem theihna a ni.

March ni 8, 2024 tlaiah HSLC exam-a Social Science subject-ah board exam zawhna lo chhuak thei awmte rinlawkna suggestion ang chauh ni si, board exam zawhna nena inang deuh vek chu Govt. Mizo High School zirtirtu pakhatin a zirlaite hnenah a pek thu social media-ah a darh tih hriat a nih velah MBSE hotuten hma an la nghal a. He thil hi Govt. Mizo High School zirlai pakhat hnen atangin a chhuak tih hriat a nih hnuah MBSE chuan MISSTA President, Govt. Mizo High School Headmaster leh zirtirtu inhnawih nia rin chu ko nghalin, thu zawhfiah anni a. Zirlai-naupangte pawh thu zawhfiah leh niin, Govt. Mizo High School zirtirtu hian 'suggestion chu a lo pe ngei a ni' tih finfiah a ni ta a. He zirtirtu hian naupang zirnaa chak lo bik deuh thenkhat a hrana zirtirna - special class neihpuiin, suggestion (darh chhuak ta hi) pein zirlaite hian an lo

ziak thla hlawm a. Zirlaite'n an lehkhabu, rough book-a suggestion an lo ziahthlak pawh evidence atan kawl that a ni.

Social Science subject suggestion darh chiama lang hi uluk taka chhui a nih hnuah, nasa taka darh a ni lo hlauh tih hriat a ni a; a chhuahna school naupang pawhin an nei vek lo tih kan hria a. Zirlai thenkhat special class kal tura tihte hi an kal vek lo a, a kalte pawh hian an lo ziak thla vek lem lo tihte pawh hriat a ni ta zel a ni. He thil thleng ngaihtuah hian Minister hovin ni 9/03/2024 (Inrinni) leh ni 10/03/2024 (Pathianni) khan emergency meeting nei tawhin sorkar chuan a ngaipawimawhin, zialo a ti tak zet a. Vawiinah Examination Committee an thukhawm nghal dawn a, hemi paper bika hma lak chhunzawm dan tur an ngaihtuah ang. MBSE hnuaia class-X exam hi chu routine pangngai angin a la kal chhunzawm dawn a ni.

Hetiang thil diklo lakah hian sorkar thikthu a chhe thin hle a. Kum 2021 pawh khan hei aia te zawkah pawh a mawhphurtu zirtirtu chu suspend a lo ni tawhin, a chungah action lak a ni. Diklo taka Social Science latu, suggestion petu zitirtu hian sorkar-hnathawk a nih anga sorkar Dan a zawm loh avangin, a chungah action lak nghal a ni a. Ni 10.3.2024 khan, Classification, Control & Appeal (CCS) Rules, 1965 hmangin a hna atanga chawlh lailawk tir (suspend) nghal a ni a. Hemi ni vek hian MBSE pawin Police Station-ah FIR an thehlut nghal a ni. School Education Department lamin Disciplinary proceedings pawh a la chhunzawm ang.

He thil thleng hi a pawl kan ti takzet a, suggestion petu pawh hian hetiang a 'boruak awm leh mite ngaihven a ni dawn' tih hria selang chuan a tih kan ring hauh lo. Zirlai naupang suggestion lo dawngtute hi kan dem lova, chhuizui a umzui zel pawh kan tum lo. Zirtirtu 1000 chuang awm karah zilaite hnena zawhna lo sawi chhuaktu mipakhat hian zirtirtu dangte nihna a tarlang lo tih hi mipui te'n min lo hriatsak turin ka ngen tak meuh a. Hetiang zirtirtute zahawmna ti hmehemtu lakah hian dan ang taka hma lak kan tum a, hun dangah pawh khauh takin hma kan la zel ang. A zirtirtu-pui rilru na tak tak an awm tih kan hria a, kan khawngaih takzet a ni. Kan zirtirtute hi kan la ringzo tawk a, kum danga Board Exam-ah pawh kan la ring chhunzawm zel dawn tih he House zahawm tak hi ka hriattir a ni.

Pu Speaker, kumin MBSE Board Exam zawhna chungchangah hriatthiam loh nei zirtirtute leh nu leh pate an awm nual avangin he hun hi remchangah lak ka duh a. Mizo zilaite'n National Achievement Survey (NAS) 2017-a rampum chawhruah kan phak loh avang te leh, rampum huap exam dang JEE leh NEET-ah te kan tih that tawk loh avang te'n Mizoram Board of School Education (MBSE) chuan exam kalphung tlemin her danglam tulin a hria a. Tunhmaa '*Knowledge, Understanding & Application*' ti a kan hriat thin bakah khan Higher Order Thinking Skills (HOTS) hmanga zawhna kalphung - Scheme of Examination & Question Design chu 2019-2020 Academic Session atanga hman turin MBSE chuan a siam a. He HOTS zawhna hian a tum ber chu - zirlai

naupangte'n an zirlai *by-heart* ngawt lova an hriatthiam leh hriatthiam loh dan teh chhuah tum a ni. Hetianga thil thar hman a nih dawn avang hian MBSE chuan HOTS zawhna chungchanga inzirtirna (training) hi district hrang hrang 11-ah 13.8.2013 - 22.11.2019 thleng MBSE hnuaiia affiliated leh non-affiliated zawng zawngte tan a buatsaih a. Training hi avaiin vawi 23 lai neih a ni tawh a. Kum 2020 exam atangin subject tinah telh tan a ni a, a subject a zirin zawhna pumpui atangin 10-30% vel zel telh thin a ni.

National Education Policy (NEP) 2020 pawhin, zirlaite'n an zirlai hre ringawt lova subject bulthum man tir leh chik taka ngaihtuahna hman thiam tir a ngai pawimawh em em a, chumi pawchhuak thei tur zawhna siam chu a ngai pawimawh hle. MBSE chuan HOTS zawhna chungchangah training a buatsaih tawh nachungin, intuaitar leh nan *Training on Capacity Building of Teachers* in set-in, 'HOTS Question' tih thupui hmangin district zawng zawnga MBSE hnuaiia inziaklut leh inziaklut lo school-te tan training a buatsaih leh a, he training hian 18.4.2023-23.5.2023 thleng a aw h a ni. HOTS hmanga zawhna siam hi tuh hnaia zawhna kalphung thar a ni mai lova, kum 2020 atangin subject tinah telh tanin kumtin tih chhoh zel a ni a. Tarlan tawh angin, hei hi zirlai naupangte'n an thil zir an man nan leh chik taka an ngaihtuahna an hman thiam nana duan a ni a, kalpui zel tum a ni. Kum hmasa lam atanga zawhna chhuak leh chhuak lo atanga inbuatsaihin awmzia a nei tawh dawn lova, zirlai an hriatthiam dan endik a ni zel zawk ang. Hei hian kan zirlaite quality a siamthain, State dangte nen pawha khaikhina zirna lama tehna a sang zawnga min kalpui theih kan beisei tlat a ni.

Pu Speaker, Class-X Board exam awm meka suggestion inpek chungchangah sorkarin hma a lak dan leh question chhuak chungchang he House zahawm taka Special Statement siam min phalsak avangin ka lawm takzet a ni. Ka lawm e.

FINANCIAL BUSINESS:

HON. SPEAKER : A lawmawm e. Tunah chuan *Financial Business*-ah kan kal tawh ang a. Vawiin hian Minister zahawm tak tak pahnih Pu K. Sapdanga leh Pu Lalthansanga te Demand kan sawiho ang a. Passed nghal kan tum dawn a ni.

Hun kaltaa kan lo tih thin angin Minister-e pahnih demand hi a rualin kan la mai ang a. Tunah Minister zahawm tak Pu K. Sapdanga sawm ila. House dawhkanah a Demand te -

- 1) Demand No. 13 - Deptt. of Personnel & Administration Reforms.
- 2) Demand No. 16 - Home Department.
- 3) Demand No. 30 - Disaster Management & Rehabilitation Department.
- 4) Demand No. 46 - Urban Development & Poverty Alleviation Deptt.

Hengte hi submit-in, sawiho tura rawn move nghal turin ilo sawm ang.

PU K. SAPDANGA, HON. MINISTER: Pu Speaker, Governor of Mizoram recommendation leh i phalnain, heng ka department chante demand: -

<i>Demand No.</i>	<i>Purpose</i>	<i>Amount (in ₹)</i>
13	Deptt. of Personnel & Administration Reforms	4,14,80,000
16	Home	8,34,06,39,000
30	Disaster Management & Rehabilitation	64,46,63,000
46	Urban Development & Poverty Alleviation	3,72,28,94,000
TOTAL		12,74,96,76,000

Hengte hi, kum 2024-2025 chhunga heng ka department chante inrelbawlina hman atan he House zahawm takah hian ka rawn submit a, sawiho turin ka rawn move nghal e. Ka lawm e.

HON. SPEAKER : A lawmawm e. Tunah chuan Minister zahawm tak Pu Lalthansanga House-ah a Demand te -

- 1) Demand No. 33 - Land Resources, Soil & Water Conservsation;
- 2) Demand No. 35 - Fisheries Department;
- 3) Demand No. 36 - Environment, Forests & Climate Change Deptt;
- 4) Demand No. 41 - Sericulture Department te

submit-in, sawiho tura rawn move nghal turin ilo sawm ang u.

PU LALTHANSANGA, HON. MINISTER: Pu Speaker, ka lawm e. Governor of Mizoram recommendation leh i phalnain, heng -

<i>Demand No.</i>	<i>Purpose</i>	<i>Amount (in ₹)</i>
33	Land Resources, Soil & Water Conservation	28,47,39,000.00
35	Fisheries	11,01,43,000.00
36	Environment, Forests & Climate Change	1,40,46,08,000.00
41	Sericulture	16,85,64,000.00
TOTAL		1,96,80,54,000.00

te hi kum 2024-2025 chhunga ka demand chante inrelbawlina atan House zahawm taka sawiho turin ka rawn move e.

HON. SPEAKER : Demand No. 41 kha khawngaih takin han sawi nawn leh lawk teh.

PU LALTHANSANGA, HON. MINISTER: Demand No. engzatna maw? (**Hon. Speaker:** No. 41 - Sericulture Department) Demand No. 41, Sericulture - ₹16,85,64,000/-

HON. SPEAKER : A lawmawm e. Kan Minister zahawm tak takte khan an demand-te an rawn submit ta a, sawihona kan nei tan tawh ang a.

Memberte minute engzat nge kan inpek leh ang; minute 10 kha a tha mai em? (*House-in minute 10 remti a*) Awle, Minute 10-ah khung kan tum ang a, minute 9-ah warning bell kan rawn ti ri ang a, minute 10-ah chuan zawh hram kan tum dawn nia. Tu nge han sawi hmasa ang le? Champhai South Bialtu zahawm tak, Lt. Col. Clement Lalhmingthanga ilo sawm ang.

LT. COL. CLEMENT LALHMINGTHANGA: Pu Speaker, ka lawm e. Pu Speaker, A hmasain, Demand No. 16 - Home chungchang thu hi, 'I din apiangin Champhai District, i bial lampang i sawi ziah' min ti mai thei a, ka bial piah lamah ram chhung hnuk khawih, kan ram leh hnam hnuk khawih tak tak a nih avangin, kan Minister zahawm tak pawhin min lo chhinchhiah sak sela ka duh nghe nghe a.

Champhai District hmunah Police force tihchak chungchang a ni a. Pu Speaker, Champhai lam khi Zoram kawtchhuah, international border-a awm a ni a, Zoram kawtchhuah anih angin Zoram pawn atanga lo lutte tan kan ram hmel lanna hmasa ber, kan ram darthlalang pawimawh tak mai a ni a. Champhai chheh vela chengte pawh an Mizo em em mai a; sawina thenkhatah pheih chuan Champhai khawpui hi, 'Zo-khawpui' tia koh a lo ni hial thin tawh reng a, khi lai hmelhmanga lan thatna tur atan kan police force lampangte'n tan kan lak a ngaiin ka hria a.

Tiau Lui kana sumdawna atang khian Mizoram pumpuaia kan ei leh bar atana kan chhawr tangkai em em mai thil tam tak a rawn lut a, Aizawl Bazar thlenga kan lo zawrh - Tiau-antam te, sangha-tin atanga ngapih te thlengin, khangho zawng zawng leh bawngsa te kan mamawh tinreng a rawn lut a, insakna bungrua thlengin khilam atang khian a rawn lut a ni. Thil tha tam tak a rawn luh karah thil thalo a rawn lut bawk a, chungte chu kan thalaite suattu, kan ram hmelma, drugs leh ruihtheih thil hianin hmun a rawn khuar bawk a. Heng avang hian law & order chak zawk leh tha zawka a awm theih nan police force tichak tur hian a hmanrua lampang aimahin, hmanrua leh ralthuam, army te ang ni lovin, manpower oriented a ni a, manpower tihpun a ngai a, duty kan tihpun a ngai a ni.

Chutiang nei tur chuan a hmaa points kan member zahawm tak takte pawhin an rawn sawi - DIG, Eastern Range, Champhai - kan Zo-khawpui, kan District Headquarters-ah khian dah ni thei se. DIG - Northern Range office hi Aizawl-ah a awm a, DIG - Southern Range office hi Lunglei-ah a awm a. DIG - Eastern Range office hi Aizawl-ah tho a awm a ni. Kan ram kawtchhuah, kan ram pum hnuk vuantu kan police force-te hian chak tawkin law & order maintain a nih theihna tur atan DIG office hi a awm a inhmeh em em a ni; manpower a lo pung ang a, DIG-in hmun leh hmuna min awp chuan.

Tunah phei chuan kan ram chhungah drugs a hluar em em a, kan ram thenawm Manipur a buai mek lai a nih bawk nen, National News-ah pawh hriattur a awm a. ‘Mizoram lam kawng an rawn zawh a, Mizoram chhungah drugs a hluar phah a, a rawn punlun em em a ni’ tih te pawh hriattur a awm a ni. Chuvangin, khilai hmunah khian a hma aia chak zawk a thil tha leh a tha lo thliar hranga, a tha lo chu lo control-a, lo titawp theitu police chak zawk-a duty turin police manpower a lo pun zawk theih nan te, DIG level meuhin a rawn awp chuan law & order mumal tak a awm theih a beiseiawm a.

Champhai leh a chhehvel khi, ka sawi tawh ang khan an Mizo em em mai a, chutih ruala lehlampanga thil tha lo zawkina min rawn run, kan ram leh hnam, kan hnam, kan tradition tuai nungna hmun a ni a. Kan lo sawi fo thin, ‘Chhinlung chhuak kan ni e’ kan ti a, kan hnam tana rohlu, kan history a tan leh tourism lampang a tana thil pawimawh tak tak a awm a. Humhalh a ngai a, kan ram hmel tihlanna tur, a hmeltha zawnga tihlan theihna tura tan hum a nih theihna turin DIG-Eastern Range office khilayah khian awm ngei se. Ka hmaa Tuichang Bialtu, Member zahawm tak mai nen khan kan inchuh deuh hlek niin a lang a; amaherawhchu, DIG-Eastern Range Office hi Khawzawl emaw Champhai emawa a awm khian a tha ve ve tho na a; Champhai chu, ‘international border a ni’ kan tih tawh kha, khing lo lut thla tur lo danna leh law & order, khi lai area zawng zawnga tan a tangkai dawn avangin, nichina kan ngaihthlak ang khan, (kan Home Minister zahawm tak pawhin a rawn sawi tawh na a) ‘khilayah khian dah chhoh tumna/ruahmanna a awm lo’ a ti nachungin, rilru min lo put sak leh sela.

Champhai District leh a area tan chauh a ni lova, kan ram leh hnam tana tangkai tur leh kan chhawr tangkai tur; kan ram leh kan hnam chhanna tur atan police force khi tihchak turin DIG-Eastern Range-in khilayah min awp ngei sela, tih kha ka rawn ngen a ni.

Deamnd No. 46 - Urban Development & Poverty Allevation Department chungchang hi, PMAY - Pradhan Mantri Awas Yojana hnuayah *Housing for All* policy, mi retheite tana insak tanpuina project kal lai hi kan hre theuh a. Hetah hian 1st installment an dawng tawh a, amaherawhchu 2nd installment la dawng si lovin, 1st installment dawng tawh a thenin kha pawisa rinchhan khan an inluah lai, an chenna ngei ngeite an lo thiat a, (ka han sawi chhan chu, a progress show ve a ngai si a) 2nd installment dawng tur chuan, ‘an lo tan ngei a ni’ tih chianna thlalak nen verification a ngai a. He 2nd installment hi pek a ni dawn loa hriat a nih a vangin, an mahni in luah lai te luah theih lovin, sak zawh ni bawk silovin hnutchhiah a tam em em mai a. Chuvangin, 2nd installment hmuh thuai theih dan a awm em, tih te a ni a.

Tin, ka bial, Champhai District-ah khian DUDO – ‘District Urban Development Officer’ kan tih mai hi hun rei tak atangin a post ruak a awm a. Chumi awi tur chuan DC office atang hian SDC te hian an awi thin a, amaherawhchu SDC in regular takin a va awi thei lem lo a, a chang phei chuan SDO (Sadar) ten tunah hian an awi mek niin

kan lo hria a. Khi lai hmunah khian DUDO kan neih thuai theihna tura hma lak atan min lo note (chhinchhiah) sak turin kan Minister zahawm tak ka'n ngen duh bawk a.

Tin, Champhai District-ah hian District Jail hi kan mamawh ngang mai a, district jail hmasawwna tur khi. Tin, district jail ah khian staff indaihlohna a nasa em em mai bawk a; nimpiniah lawkah te pawh an la tan belh zel bawk a, mi 4 dan loh anga sa lo pel man belhte pawh an awm a; khang hote nen pheichuan mi 170 zet an tang mek a ni.

Pu Speaker, i thuawih em em nih reng hi ka duh a, thahnem ngaihna a na ve si a; hun tlemte ka lo dil belh a nih paw'n min lo hrethiam hram turin ka ngen dek dek che a ni e.

A dawt lehah chuan, Forest Department changtu zahawm takin min lo hriatsak atan ka duh bawk chu - Champhai District khian DFO tha tak mai kan nei a, khi khi mipuite paw'n an fak a. Ani hi hmun dangah min sawnchhuah sak lo hram se, khilai hmasawwna atana hma latu pawimawh tak a nih avangin, hemi House kaltlang hian ngenna kan siam duh bawk a.

Tichuan, Demand No. 35 - Fisheries hi, khi laia kan eizawwna bulpui ber, kan inngahna a nih avangin Fisheries changtlung tak min ruahman sak turin ka ngen a. Tin, Champhai District-a sangha khawitute'n a sangha chi an lakna hi phai lam a nih avangin, phailam atanga supplier-te hian sangha chi dik lo, thang thei mang lote a rawn tel thin a; chu chu an khawi hnuah chauh an hrechhuak thin si a. khilai ah khian sangha chi tha te kan neih theihna tur leh, hmun leh hmuna kan intodelhna turin sangha chite khi lam atanga tharchhuah a nih theihna turin hatchery chungchangah te hma min lak sak turin, a changtu Minister zahawm tak hnenah ngenna ka siam duh bawk a.

Tichuan, Sericulture-ah hian, minute 1 lek Pu Speaker. Tlangsam-ah khian pangngang khawina hmun ruahman a ni a, oak tasar te a hmunah an ching a, khingah te khian tunah hian pangngang khawia eizawng tur chhungkaw tam tak lo inruahmante paw'n chhunzawm a nih loh avangin nghakhlel takin an thlir reng a ni.

Tichuan, Minister zahawm tak te'n a demand an rawn put luh hi he House zahawm tak hian lo pass sak turin ka rawn ngen sak a ni e. Ka lawm e.

HON. SPEAKER : Lunglei West Bialtu, Member zahawm tak Pu T. Lalhlimpuia ilo sawm ang.

PU T. LALHLIMPUIA : Pu Speaker, ka lawm e. Vawiina kan Minister-te pahnih demand-a ka'n tarlan hmasak duh chu, hun rei tak atanga kan lo nghahhlel em em Leitlangpui, Lunglei Municipal Council chungchangah hian, tuna kan sorkar budget tharah kan Finance Minister-in duhsak taka budget min dahsakah hian a hmasain

lawmthu kan sawi a. Social Service Sector hnuaiah UD&PA ah khan MLC atan nikum lamah khan GIA salary-a lakh 124 vel bak kha hmuh a ni lova, kuminah hian LMC budget atan cheng nuai 602.97 min dahsak a; chutah chuan, general atan lakh 478.38 leh salary atan lakh 124.59 min dahsak a, a chungah leh department chungah pawh lawmthu kan sawi duh bawk a ni.

Lunglei chuan bungthar a kai a; nikum March thla ah khan inthlan a ni a, chutah chuan kan hriat theuh angin theitawpin sorkar hmel thar lanna tur a nih avangin theitawpin kan tang tlang a. Kan hre theuh a, Lunglei atangin bungthar kan kai ta a. Chutah chuan, LMC function atangin kum 1 a lo vei ve dawn ta a. LMC ah hian Lunglei khawchhung veng 24 a huam a, chutih rual chuan LMC ah hian Municipalities subject 18 atangin subject 15 pek anni a, vawiinah hian mumal taka hengte hi kalpui a la ni hleitheh lova, sorkar lam atanga heng subject tarlan te pawh hi approve mumal kha a la awm lova; parking enkawlina erawh chu nikum khan lak fel a ni a, a bak hi theih tawpa hna han thawh ve hi LMC-a kan hotute'n an chak takzet a, Lunglei hmasawn tir an duh takzet a ni. Nimahsela, vawiinah hian chung te ni thei tura kan sorkar tharina hma a'n la hi a lawmawm ka ti hle a. Chutih rual erawh chuan heng budget thar hian min la daih dawn chuang loh avangin, ULB fund te pawn min pui thei turah kan ngai a. Tin, subject la transfer loh awm thenkhatte pawh kan sorkar thar hian hma min lakpui turah kan ngai a. Vawiinah hian Leitlangpui chuan he sorkar thar hian kan Municipality enkawlina turin hma min lakpui dawn a ni tih hriain, nghakhlel takin kan thlir dauh dauh a ni.

Tichuan, hmannah ka lo hriat ruk danin pollution hnuaia vehicle test chungchangah a bikin chhim lam saw kan buai em em mai a, chutah chuan, kawng a awm thei lawm ni, tih te'n kan han zawt kual a. Tichuan, pollution control board ten hma an la a, Rahsi Veng-ah khuan hmun te pawh an nei dawn niin ka hria a.

(Hon. Dy. Speaker-in Chair a la a.)

Chutih rual, smart city project atangin pollution control board hnuaiah mobile test van hi 5 pek niin, ka hria a hmannah kan hotute pawh kanrawn a. Vawiina House member zahawm takte hmaa ka'n sawi duh chu - pollution control test hi a pawimawh em em a, amaherawhchu, Mizoram mipui pawh hian kan aware tawk lo niin ka hria a; mobile van te pawh hi a thlawn deuh deuhin a kal chang awm thin a. Chuvang chuan, vawiin niah hian Sorlar hmalakna avangin miobile van te pawh 5 kan nei dawn a. Heng, hunbi/timing nei chi angah te hi mipuite pawhin a kan aware a ngai a, 'kan tih tur a ni' tih te pawh hi he House hmaah hian ka sawi duh a.

Tichuan, kan harsatna ber chu - khawiah pawh, khawchhakah pawh, khawthlangah pawh, chhim ah pawh chhak ah pawh a kil kil hi kan buai em em mai a ni, pollution test chungchangah hian. A hranpaa pan zel a ngaih avangin vawiinah hian hengte pawh hi UD&PA-a kan hotute hian min hriatsak ula ka duh bawk a ni.

Tichuan, Demand No. 16 - Home chungchangah hian sawi tur kan ngah hlawm hle mai a. Lunglei chungchang bawh hi han sawi leh ta ila. Old Tennis Court hmun Home Deptt. hminga la awm, revenue tax pawh la pek reng chu tunah hian LAD kutah a awm nanging, LMC kutah paper-in an hlan tawh a ni. Hei hi Congress term hmasaa vantlang ram atana a thua pek kha a ni a. A tu ve ve, a enkawltu tan pawh, a mawhphurtu tan pawh he sorkar thar hian a tihchian law law te pawh hi a tha hlein a rinawm a. Chu chu wawiinah hian House hmaah ka han tarlang duh bawh a ni.

Tichuan, wawi tam tak kan sawi tawh a, Police staff quarter hi; 1990 hma lama sak te kha a ni a, repair tlakloh pawh a awm nual a. Hmunhma tha tak tak a awm a, nimahsela, staff-quarter hi mumalin a awm lova. Tin, quarter awmchhun pawh fur a han nia, a quality a chhe em em mai a; a chung atangin a far a, floor hnih te a ni a. Khami a farna chhuat atang khan a groundfloor-ah pawh a far leh chhawng a ni. Chutiang khawp chuan kan building-te hi a tha lova, chung te chu ka'n tarlang duh bawh a.

Tin, term hmasaa Ministry khan *5 years plan* kha a nei ve deuh a. 2020-25 chhunga staff-quarters eng emaw zat sak tum kha ruahman a ni. Chungte chu tihpuitlin a ni dawn em, tih te hi zawhna lian tak Chhim lam chuan kan thlir mek a ni.

Tin, Natinal Hghway avangin Hrangchalkawn Police Outpost tihchhiat a ni a, compensation-ah pawh ₹47,54,754 kum 2020 khan dawn tawh a ni a, Home Deptt. account-ah dahluh a ni tih kha kan hriat dan a ni a. Tin, hemi *5-years action plan* turah hian, hmun 33-ah 2570 sq. meters, a estimate amount, ₹142, 07,000 kha siama, quarter-te hi hmun hrang hranga - Tlabung leh Bunghmun-ah te, outpost tihchangtlunna tur a awm a. Sorkar tharah hian hengte hi hma kan la ve thei dawn em, tih hi House hmaah hian, he budget sawi karah hian k'an aupui duh a.

Tin, District Jail chu kan sawi ngun tawh a; wawiinah hian a dinhmun dik tak chu hmeichhe ward mi 10 awm theihnaah hian mi 30 chuang an awm a, camping nei reng ang anni, a awmziaah chuan. Zannah bedding an pharh a, zingah an tel leh a; chutiang chu mipa lam pawh an ni tho a. Thenkhat phei chu natna eng emaw inkai hlauhawm te an nei a ni. Perimeter wall te a der tawh em em a, helaih hian thil tha sawi tur a vang hle. Chuvang chuan, wawiinah hian chu chu House hmaah ka han aupui a, kan budget tharah hian kan hotute'n min lo hriatsak sela.

Tin, a tawp lamah chuan, Lunglei traffic chungchanga hi sawi leh plan a tul ta hlein a lang a. Hei, vehicle a pung tual tuala; traffic dinhmun chu Aizawl kan experience atangin a lang reng mai a. Lunglei pawh hi reiloteah a tawt dawn a ni. Hmanniah khan LKMC atangin notification an tichhuak a, chutah chuan motor parking neilo leh kawngpui sira dah reng reng senghawi turin ruahmanna a awm a. Nimahsela, hengte hi, Aizawl ang tho kan nih chuan awmzia a awm leh dawn miah lo a ni. Chungah chuan, Aizawl-ah hian traffic wing hran SP hnuaiah a awm a, heng te pawh hi mumala tun

aṭanga kan kal lo a nih chuan, kan experience tur chu Aizawl ang tho hi kan ni dawn a, motor tlemte intlanhhawk hi reiloteah kan nei nghal ringawt dawn a ni. Chuvang chuan, heng te pawh hi rilruah a awm a, traffic personnel indaihlohna avangin. Enzuitu awmlo chuan, Lunglei-a kan hma tur hi, hetiang hi kan dinhmun a nih avangin Pu Dy. Speaker, khawngaihni kan budget tharah hian heng te hi min enzuisak turin kan hotute ka ngen a ni.

Tichuan, vawiinniah hian kan Minister zahawm tak takte pahni - Pu K. Sapdanga demand ₹12,74,96,76,000 leh Pu Lalthansanga demand ₹1,96,80,54,000 te hi House hmaah hian 'ka thlawp a ni' tih ka'n puang a ni. Ka lawm e.

HON. DEPUTY SPEAKER: Thorang Bialtu, Pu R. Rohmingliana ilo sawm ang u.

PU R. ROHMINGLIANA: Pu Dy. Speaker, ka lawm e.

Vawiinah hian he House zahawm takah Minister pahni department demand-te kan han sawiho a ni a. A hmasa berin, Demand No. 16 - Home Department chungchang hi ka sawi duh a.

Hei, Home Department budget-ah sum tam tham tak dah a ni a, a lawmawm viauin ka hria a. File deal ai ngawt chuan mihring deal hi a hahthlak hle a ni, tih pawh kan hre tlangin ka ring a. Home leh Education Deptt. te hi mipui deal tam anni a. He department changtu minister tan pawh hian thil hahthlak tak tak a awmin ka ring a.

Tichuan, Pu Dy. Speaker, kan Home Minister zahawm tak khan he House-ah police lak a nih tur thu te a puang tawh a, lawmawm ka ti khawp mai a. Police post ruak 4000 chuang daih mai a awm te kha kan han hria a. Sorkar liam ta khan a sorkar tirh khan police indaihlohna hriaiin lak te a han tum a. Amaherawhchu, Covid-19 hri avang khan a kaltlang hleithei ta lova, hnaruaq pawh a tam phah chho zel niin ka hria a. Tun sorkar chhung hian lak ngei in tum thu te Home Minister hnen aṭangin Pu Dy. Speaker kan ngaihla kha a lawmawm ka ti a; fair tak leh felfai takin, a fit te lak ngei ni sela a thain ka hria a. Tichuan, khanga fit rau rau zingah pawh inang reng, intluk tlang rengah chuan thingtlang lam hi rawn hawi nasa deuh sela ka duh khawp mai a. Chhungkaw pakhata Sorkar-hnathawk awmlohna te hi a tam em em mai a. An fit em em bawka a, thingtlang lamte pawh, a lak tura chu a tua pawh ni sela. An fit dan inang reng annih chuan, thingtlang lam te hi mi rawn en bik sela tih kha ka'n sawi lang duh a ni.

Tin, Pu Dy. Speaker, kan Police neih mekte hi an chhuanawm a. Tin, keini Mizote hi police hi kan kalna awm tak niin a lang a; Pathian-ina min siam dan a ni te pawh hian a lang a. Tun hmaa 'police' kan tih awm hma, kan pi leh pute hunah pawh khan, thalai

zawng zawng kha police an ni mai a. Pawl leh khua an inrun pawhin, thalai zawng zawng an thiam leh an theih ang tawkin an training a; chutiang chuan an khaw venhim nan te an tang thin a ni.

Chutiang chiah chuan, tunah hian Zoram-a kan Police-te hi an fakawm a. Kha, hmanni lawkah pawh kan hmu a, sap-chanchinbu ah te pawh a rawn lang uaih uiah a. Kan Mizo nula ngei Delhi Police tang fakawm zia te pawh kan hmu a ni. Chutiang bawkin, kan Mizoram Police tuna awm mekte pawh Assam nen buaina kan han neihah te khan an fakawm takzet a ni. Kan hre vek e, khang te pawh kha; sawi thui a ngai lo. Chuvang chuan, kan Police administration-ah te pawh hian kan Sorkar, a ruaitu te lam pawh hi inrawlh dan tawh kan thiam te pawh hi a pawimawh viauin ka hria a ni. Force annih anga an discipline tichhe thei zawnga kan va inrawlh luh te pawh hi a hlauhawm viauin ka hria a ni.

Pu Dy. Speaker, vawiin nia kan sawi duh chu, kan Home Minister zahawm takin he House-ah ngei hian Champhai jail tang nula rim chungchang a sawi kha, a serious hlein ka hria a; kha thil kha a pawl ka ti a, State dangte hian an hria ang tih pawh ka hlau a. Khang te kha engnge a chanchin, nakina a windup-naah - khati hunlaia duty-te kha suspend anni em; eng angin nge hmalak a nih; tun hnuaha a la awm em, tih te kha min han hrilh thei sela. Hetah hian a thawktuteah an kangkai leh mai ang a, kan dem leh mai dawn em ni? Hmunphiah chungchanga RR Associates te kan dem ang mai khan nge kan kal dawn? 'Hengah hian moral responsibility ka nei a ni' tiin, kan Minister hian anmahniah an inpuh ngam dawn em, tih laia kha, a wind-up naah te pawh min sawilan sak thei se la thain ka hria a.

Tin, Pu Dy. Speaker, thu dik chiah phei chu ka hre lova; Sorkar hmasaah khan Havildar atanga SI kaisanna tur khan vawihnih lai tih a ni a, complain ri ka hre lova. Tun sorkar thar, January thla mai khan khang kha a rawn awm leh ta a. January Ni 29 atanga February Ni 5 chhunga exam chungchangah khan eng eng emaw rumour te kan lo hria a. Hengah te hian kan sorkar hian moral responsibility a la ngam dawn em? Thil dik lo hi a lo awm chiah nge; tute'n emaw an tlin loha vanga sorkar dem tumna avanga thiltih a ni mai mai zawk em, tih laia te pawh kha kan hriatchian a pawimawh hlein ka hria. Khang an test te pawh kha written chauh a nih ka ring lova, practical a tam em em a, force-ah chuan; practical-ah te kha video record a awm em? A awm a nih chuan, han hmuh ve te pawh a chakawm hle a, 'tunge dawt sawi zawk' tih laia kha. Nge, chutiang chu lo awm tak tak ta se, a officer lam kan inpuh leh ringawt dawn nge, 'keimahni a ni' kan intingam dawn em, tih laia pawh kha a windup-ah khan min han sawichhuah sak thei se la a thain ka hria bawh a ni.

Demand No. 46 - UD&PA hi department lian tak, thang duang tak, thang chak tak a ni a. Amaherawhchu, engineer lam hi duh ang tawh an nei em; an work load a sang si a tih lai te hi ka rilruah chuan a awm deuh a. Tin, hmannah UD&PA lama zawhna kan

Sports Minister zahawm takin a lo chhansakna ang chi te pawh kha, ‘engnge ni dik ber’ ti kha, theih ang tawk in ka zir a. Sports chungchang, a bik takin football ground chungchangah te pawh khan ka’n zir vea, ka hriat ve chin tarlan ka duha chu - Football standard-ah hian a length (a sei zawng) hi meter 90 - 120 inkar leh, a vang hi meter 45 – 90 inkara a awm tur niin ka hria a. Amaherawhchu, FIFA te pawh khami chhungah khan an indah lut vek niin ka hria a. Ka hriatsual loh chuan, ka source, google ka en te atang chuan, FIFA hian a length meter 105, a width meter 68 hi standard size-ah an pawm niin ka hria a; chu chu ka chhiarna atanga ka hmuh a ni. Chu chu a nih si chuan, standard size hi, a tak tak a lo awm thei ngei a nih hi, tih kha keimahah chuan min convince em em a, mithiam tam tak ziah ka’n en pawhin.

Chuvang chuan, hmanna Smart City lamin a field an siam chungchang kan han ngaihthlak te pawh kha, ‘thudik lo an ti chiah em aw’ tih hi ka ngaihdan a ni a. Tin, Mizoram hi tlangram a nih avangin, a amount chungchangah chuan a inang lo thei viau a ni. Hmun zawla an phah chuan, a tlem thei a; lung rem belh ngai a nih chuan, a tam thei a. Tin, building tam tak sak belh ngai a nih chuan, a amount kha a sang lo thei lo a ni. Amaherawhchu, an sak zelnaah pawh a quality laia hi kan control a ngai zawkin ka hria a.

Tin, hemi ka sawi lai hian, kan bial chhung, Thorang ka sawi lo thei lo a. Hmun lum tak tak a awm a; football an khelhna te hi hmun lumah vek hian an kal thin a ni, ram dang leh State dangah te pawh. Chuvang chuan, kan sportsmen-te pawh hian an practice-na a tan hian khawlum deuh te hi Mizoram-ah kan mamawh ve tawh a. Chuvang chuan, hetiang sports infrastructure tha, ‘phul lem phah’ kan tih ang chi te pawh hi kan bial chhungah te han awm se la chuan, an tough phah sawtin ka ring a ni. Chuvang chuan, helai sports chungchang kan han sawi pawh kha UD&PA chan mah ni se, sports thil te an va tih sak a ni, tih lai kha ka’n tarlang ni sela.

Pu Dy. Speaker, Forest-ah hian tawi te han sawi leh duh ka neih chu - kan ram te reuh teah hian ramsate humhallhna tur sanctuary te hi kan ngah viau mai a; a chang hi chuan a uihawm ka ti thin a. Ka bial chhunga khua pathumte pawh khua a mite’n ui em em leh hreh em em chungin sanctuary-ah kan rin luh sak a. Vawiinniah pawh chhungkaw 11 la chhuak duh lo an awm a ni a. Chuvang chuan, kan pi leh pu te hman atanga an thlahtute’na an lo awm tirna te kha sanctuary-a kan han puan sak te pawh hi lehlam takah chuan Central a rawn inrawlh tawh thin si a.

Tin, Riverine Reserve Forest chungchangah te pawh a bik takin ka bial chhunga ka hriatchian chu, tunah hian an pass te pawh an renew thei lova. Thil buaithlak tak tak tax-ah kan hniam phah tur te leh thil dangte eng emaw chungchangah te pawh kan neih ka ring. Chuvang chuan, heng te pawh hi uluk taka kan Minister zahawm tak pawhin min ennawn sak a thain ka hria a.

Pu Dy. Speaker, department dang sawi tur ka inpuahchah nasat teh reng nen khalai kha kan duh tawk mai ang e. Vawiinni a Minister zahawm tak pahnih te'na demand an rawn phawrh chhuah zawng zawng hi pass ngei turin ka rawn thlawp e. Ka lawm e.

HON. DEPUTY SPEAKER: Tuichawng Bialtu zahawm tak Pu Rasik Mohan Chakma ilo sawm ang.

PU RASIK MOHAN CHAKMA: Pu Dy. Speaker, nangmah kaltlangin Zirtawpni ah khan India President-in Pu Nirupam Chakma, helaia member pawh ni thin politician senior tak chu National Commission for Schedule Tribe Board member-ah a appoint a ni a, a lawmawm ka ti hle a. Amah nen hian political party-ah awm hrang mah ila, mimal tak paw'n thiantha tak kan ni ve a. Chuvangin, khatiang dinhmun tha a chan takah chuan nangmah kaltlangin ka congratulate duh a. tin, India ram pumpuiah amah kaltlangin Schedule Tribe te hamthatna, a bik takin Mizoram pawhin kan hlawk phah ngei ka ring a ni.

Demand sawi tan dawn ila; a hmasa berah Hon. Minister Pu K. Sapdanga demand pahnih-khat chauh ka sawi ang a, hun a tlem thei si a. Home Department chungchangah, kan hriat angin Police vacant post a tam em em a, henga vang hian Police administration-ah pawh harsatna nasa tak a awm ka ring a. Kan area-a Police Station-ah te pawh police pakhat chauh an awm chang pawh a awm a, Chawngte-ah phei chuan an indaih lo lutuk a ni. *Zawhna & chhanna* te kan ngaihthlak ang khan, recruitment a awm thuai dawn in ka hria a. Khatah khan suggest duh ka neih chu, recruitment hi a district quota zawngin siam dan awm thei hram sela. A chhan chu, Mizoram hmun hrang hranga chengte hi rualkhai deuhin Police Force-ah awm thei ila; district quota siam a nih loh chuan district angin pakhat mah chan loh te pawh a awm theih a. Chuvangin, a district quota zawnga siam theih dan tur kha Minister zahawm tak khan ngaihtuahna min hman sak se ka duh a.

A thu hrimin Mizoram-ah Home Deptt-a Police-te hi thingtlang kilkhawr deuh deuha post awm chu an ni a. Chuvangin, better facilities te pek annih loh chuan an tan pawh hard posting a awm thei a, facility tha zawk hi pek theih ni sela. Tuna kan kal mek danah hi chuan, sorkar hnathawk an nihangin khawi hmun pawh an transfer-na hmun kha an awmna tur chu a ni a. Nimahsela, Aizawl hmun boruak thaa awm thangte tan chuan hmun kilkhawr - Chawngte te, Longpuighat te, Tlabung tea han awm tur chuan harsatna tam tak, a hmun boruak chungchangah te pawh a awm ve thei bawk a. Loh theih loha awm tur annih pawhin, a facility lam - quarter te, vehicle te, hlawh chungchangah te pawh special compensatory allowance te an la hmu em, ka hre chiah lova. Tun hma chuan Chhimituipui District ah posting annih chuan, special compensatory allowance te an hmu thin a, kha kha an la kalpui zel leh zel loh ka hre ta lova. Khatiang facility kha pek theih dan awm sela tha takin an duty theih ngei ka ring a ni.

Engpawh ni sela, khatiang hard postingah chuan mi fel deuhthe dah a tha ang a. Khawpuih chuan hotute an awm a, hmun kilkhawrah erawh chuan mifel deuh an awm loh chuan administration a felhlel duh khawp mai a. An vaiin an sual e, tihna a ni lova, an tha tlangpui a. Mahse, sorkar-hnathawk rau rau ah pawh thahnemngai bik an awm ve thin a, khatiang mite kha dah theih dan awm sela, tih hi ka ngenna a ni.

Tin, Pu Dy. Speaker, Disaster & Rehabilitation ah kal ila. Kum 2013 ah khan helam area - Tlabung te, Chawngte te, Borapansuri-ah te flood nasa tak kan tuar a chhungkaw tam tak in leh lote a tichhia a, a khua chawp chawpin tuiin a chim a, leilet hmunte a tichhia a. Khang flood victim te khan victim ho khan tanpuina an dawn awm ka hre lova; engnge a chhan aw, ka ti a. Sorkar-a disaster management atang tein chawp leh chilhin immediate relief fund te kha a awm thin khan ka hre si a; phailam chanchinbu tea a landanah chuan. Heng te hi a hnu kum hnih-khat ah tal chuan hmu thei sela chuan a ziaawm tura ni a, mahse tun thlengin an dawn awm pawh ka hre lova. Kan buaina ber chu, kan leilet hmunte tuihawkin a hawrh a, leilet siamthat theih miah loh changte a awm thin a ni; khangte kha reclaim dan hi a awm em aw, ka ti a. Chhungkaw khawsa thei tak tak, leilet zau tak tak neite pawh kha an retheih phah ngawih ngawih a, an eizawna berah an buai vek avangin. Chuvangin, an heng ka han sawi relief fund te hi pek dan awm thei se a lawmawm hle ang.

Tin, Pu Dy. Speaker, Urban Development & Poverty Alleviation ah hian, Chawngte khawpui hi sub-Divisional town a ni a, block headquarters a ni a, Chakma District Council headquarters a ni bawk a. Amaherawhchu, Kan town road te a chhe em em a, furah khawlaiah motor kan nawr thin a, thalah vaivut khu in a bawh leh a. Sub-divisional Hqrs. ni si, block hqrs. Ni si, Chakma District Council hqrs. Ni si hetiang em ema town road chhia hi a nihin a ni lova. Hei hi PWD chuan theihpatawpin an bei thin a, mahse an ti seng lo a ni.

Ka hriat dan chuan, Urban Development & Poverty Alleviation hnuai ah hian Ministry of Urban Development atangin pawisa hi a awm thin a. Pu Dy. Speaker, chutiang char thei tura kan mamawh hmasak chu, Chanwgte hi district hqrs. a nihna angin town-a puan (town declaration) hi a ngai a ni. Tichuan, PWD leh Urban Development te tangkawpin, kan town road te hi kan town road te hi tha taka an enkawl theih hi ka ring a. Chuvangin, khatiang zawng khan hma min lak sak thei hram se, tih hi ka ngenna a ni.

Pu Lalthansanga depts. chan, Land Resources & Water Conservation ah hian ka zawh duh chu Hmunphiah bawk hi a ni a; a sawi loh theih lova, tunlai issue a ni a. Kha, a changtu Minister-in Finance lam pawhin crore 100 an tifel tawh tih kha a sawi a. Chuti si, eng harsatna nge la awma, engvangin nge hmunphiah hi kan leisak mai loh ka ti a ni. Kan mipuit hmunphiah chingtute an thawkrim nasa si a, mahse an produce an hralh leh

thei si lo hi, a tuartu tan chuan a na lutuk a ni, Pu Dy. Speaker. Chuvangin, engtin emaw tala leisak theih dan hi awm hram se, tiin ka ngen sak ngawih ngawih a ni e.

Tin, broom stick chungchangah hian ka propose du chu, hmunphiah kan tharchhuahte hi keimahni hian kan hman theihin siam ila, nakuma tang chuan value addition hmangin phai lama hralh dan ngaihtuah ila, kha kha facilitate mai ila, tih hi.

Tin, Fisheries chungchang hi, centrally sponsored scheme PM-Matsya Sampada Yojana kha tunhma sorkar hmasaah khan District Council atang khan project an siamte kha central ah min thawn sak thin a, vawihnih lai kan hmu tawh a ni. Kha kha sawlai mipuite khan an hlawkpui em em a. Tunhma khan local sangha hi kg-ah 600/- a ni thin a, tunah hian 350/- te, 400/- te a ni tawh a. A awmzia chu, sangha production kha a pung tihna a ni. Chuvang chuan, District Council te'n kan project siamte central-ah min thawn thlak sak leh dawn avang hian kan mipuite aiawhin Fisheries Minister chungah lawmthu ka sawi a.

Tin, Sericulture ah hian, sorkar hmasa khan District Council pathumte project min siam sak a, a sanction te kan hmu a. Kan House Leader, Hon. Chief Minister pawh khan hmannah hawnna te pawh a nei a, kan lawm takzet a. Tin, kan sawi ang khan, khang scheme te kha tha takin implement sela, a beneficiary te'n sum thawh chhuah nan hmang thei ngei sela, tih kha kan Minister hnenah pawh ka ngen duh a. Amah ngeiin min enpui sela, khang pawisa te kha ral mai mai lo turin leh mipuite pawhin chhawr tangkai theih ngei turin min enpui sela ka duh bawk a ni.

Pu Dy. Speaker, tikhan ka duh tawk mai ang a. Pu K. Sapdanga, Minister chan Demand Nos. - No. 13, 16, 30, 46 te leh, Pu Lalthansanga chan Demmand Nos. 33, 35, 36, 41 te hi a tha thawkkhatin ka hria a, pass turin ka thlawp a ni e. Ka lawm e.

HON. DEPUTY SPEAKER: Tunah chuan, Member zahawm tak Lunglei South Bialtu, Pu Lalramliana ilo sawm ang u.

PU LALRAMLIANA PAPUIA: Pu Dy. Speaker, ka lawm e. Vawiinah Demand kan sawi turte hi Minister pahnihte chan a ni a. Sawi tur a tam viau laiin, ka ngaih pawimawh Home Department atang hian bul han tan ila.

Home Department hi sorkar hmasa lam atanga kan tawn hriatte atanga ka'n sawilan hmasak duh chu, compassionate ground-a Constable lak chungchangah hian fimkhur a ngai khawpin ka hria a. Compassionate ground ah hian Police lak thar zingah hian drug addict sa te, zu ngawl vei sa te an lo awm thin niawm tak a ni.

(Hon. Panel of Chairman, Pu Lalrinsanga Rate'n Chair a la a.)

Pu Chairman, tuna kan Home Minister-ah hian rinna kan nghat thui em em a, tunhma lama eng emaw sawi nawi lo awm thin te kha, thil tak tak a nih pheii chuan uluk taka kan Home Minister-in min enzui saka, kan hmalam hunsh pawh rilru fim tak nena hma min lakpui hi a tul ka ti a. *Entirnan*: An pasal te boral avanga compassionate ground-a luh dil te an han lut a, amaherawhchu, pasal dang an lo nei leh tawh a; an luh hma te pawhin sorkar hnathawkte pawh an lo ni leh hman tawh a. Tin, thenkhat chu medical fitness-a fit thlap si, mahse, medically-a fit si lo te pawh kha an awm thei thin niin a lang a. Heng avang te hian Police hi duh uluk a ngai em emin ka hria a. Hemi chungchang hi ka vei deuh a, thenkhat tan erawh chuan ngaihthlak nuam lo pawh a ni mai thei e. Mahse, Pu Chairman hei hi kan Demand sawi lai hian han sawilan ka duh avangin, sawi hmasakah ka'n nei a ni.

Sawi thin ang khan mahni tuanna lam leh bel lam hi kan tarlang lo thei si lova. Hmanniah zawhna ka zawt zawk tawh a, kan Home Minister khan hun a chep deuh avangin min chhang kim hman ta chiah lova. Hrangchalkawn Police Outpost hi kawng sial avangin nuai 47 vel compensation pea nawr chhiat kha a ni a, nimahsela, waviin thlenga hmalakna a awm ta lo hi; sorkar hmasa lama compensation te pawh hmuh vek tawh a nih avang khan, kha kha hman ral vek tawh a lo ni nge? Kan Home Minister hian hmalak zui a nih lohna chhan hi min hrilh theih se Pu Chairman ka duh khawp mai a. Ka hriat dan pheii chuan, kum 2022 tawp lam khan hemi sak that lehna tura atana proposal nuai 140 bawr vel Home Department-ah thehluh tawh niin ka hria a, waviin thleng hian a chin kan hre lova. Sawlai outpost saw a cover zau si a, kan chhawr tangkai bawk si a, churang chuan ngaihthah chi niin ka hre lo; chu chu ka'n sawi nawn ka'n sawi nawn a nih chu.

Tin, Fire Department chungchangah hian; hei, khua a ro chho dawn chauh a, chhim lam pheii chuan hman kuma kangmei kan mangan pui zia kha min hre vek a; churang chuan, kan Fire Department te pawh thuan chak an ngai em em mai a. Office hmun hma mumal pawh nei lovin, Saikuti Hall hnuaiah rem leh rem lovin an la inhnawh a; sawlai chhuahka kawngpui tawt takah sawn an la inzep ve a ni. Sawngte pawh saw engnge ni hmalakna kal zel tur ka hrethiam lova, an hmunhma neih saa an building te sak that leh tumna avangin vuak thiah niin a lang si a, mahse, hma lakna a awm zui bawk si lo te pawh hi engnge ni a chhan, tih te pawh hi hriat a chakawm khawp mai.

Tin, traffic chungchang hi hmanni kan sawina pakhat chuan, ka kawm pa official pakhat khan min nuizhat deuhlek a, tawng mawilo ni lo sela. Lunglei te chu traffic-ah in buai lem em ni, ti ti ah khan min ti deuh a ni. Mahse, kan sawi fo thin angin, prevention hi a tha a, a tul a ni. Buai tawt lutuk, mangan tawh hnua 'engtingge kan solve ang' tih ai chuan, tun atanga ruahmanna fel tak nen Lunglei traffic movement enkawl dan tur saw ruahman kan siam tha ka ti em em a. Tunah hian Lunglei SP hnuaiah LOC hran pawh nei lem lovin an function ve mek a ni a, PHQ lam ten theih ang anga ruahmanna siamin han tuam hlawm thin bawk mahse, an mamawh a phuhru zo tak tak

lova. Chuvang chuan, unit puitling deuha dah a, SP emaw, Inspector rank talin emaw a enkawl ve te pawh a tul hlein ka hria a. Hna indaihlo indaihloin an thawk tha em em mai a, tun kum kal mek calendar year-a kumral tur chhung ringawt pawh hian, lirthei 1449 dan bawhchhiah atanga compounding fine an collect ringawt pawh nuai 17 a chuang a ni. Chutih lai chuan anmahni pual traffic tihchangtlunna atana sum ruahman allocation thlan pawh nei lovin tisawn an kal a ni a. Theih ni sela chu, compounding fine an collect atanga 56-60% tal hi chu anmahni puala allocation siam sak te pawh a tha ka ti em em mai a, chungte pawh chu ka'n bawk a.

Tin, sawi tak ang khan, Police hi keini bial lamah te pawh 2nd Bn. MAP te kan kawl a, Luangmual-ah; 1988-a din daih tawh kha a ni a. Sipai indaihlohna te pawh saw sawi a inthlahrun awm a, sum dinhmun a nghawng zel avang hian. A nihna takah chuan tunah te pawh post awm thei tur 36% a ruakin a awm a ni. Amaherawhchu, kan sum dinhmuna zirin kan Home Minister te'n an hre turah ngai ila. Sipai khatiang zat post ruak hnawhkhah mai a theih loh a nih pawhin thil tul tak pakhat nia ka hriat chu, Sawlai Batallion-a doctor pahnih awm tura tih ni si, doctor kawl an nei lo a ni. Sipai ho leh sawlai a khaw chheh vel - Thangte, Thangpui, Vaisam a mite'n kan chhawr thin em em a, Police doctor an awm chuan. Chuvang chuan, engtin emaw ruahmanna siama, Health Deptt. lam te pawhin ruahmanpuin, doctor thutchilh an awm a pawimawh em emin ka hria.

Tin, hei sawi rik a tam a, min chahte pawh hi an tam ve thin a; thiante atang pawh hian. Sorkar hmasa hun laia ramri buai leh covid vanglaia police duty te TA te pawh kha, Pu Chairman, la pek tlak loh te hi a awm em ni? Hei hi sawilan a awm leh fo mai a. Tute emaw tawngkam ang deuhin, kihhnawk then tur hmabak tam tak awm hi kan hotute'n thawk leh khata han hal fai duak dan hi han hria sela chu a tha mang e aw, ka ti a. Police heti zat mai waviin thlenga sawi nawi tur nei neia kan han siam te pawh hi an lainatawm vein ka hria a, ka'n sawilan sak duh ve bawk a ni.

Tin, kan Minister Pu Sapdanga chan UD&PA hnuaiah hian, nichin khan member dangte pawhin an lo sawi ri tawh a; Lunglei Municipal Council hi kum khat dawn a kal ta a, tuna kan Municipal Council member-te pawh, sorkar hmasaah khan a ruling lai party thisen zawmpui an ni lo nge, thuam an ni lo lutuk a. Tlangval-Nula tha lehkhathiam tha za rual, ram vei, mi-inpete thlan chhuah anni a, tunah hian a nihna takah chuan, lo vat turin an lo pen chhuak ve tawh laklawh a, hnathawh kawr nen, chawfun nen an lo pen chhuak ve laklawh tawh a; chawfun bak engmah pai tir lovin, hmanrua keng lovin kan awm tir rei ta lutuk a, awm ngaihna an hre lo a ni. An tha a za zek zek tawh a; ram tan, khawtlang tan thawh an chak a ni. Chuvang chuan, anni pawh tun kan budget-ah hian sum eng emaw zat kan Minister-in min ruahmansak tih te kan han hria a, kan lawm em em a, lawmthu te pawh kan sawi nghal ni sela.

Aw le, hun ka lak hek tam lohna turin pakhat chiah ka sawilan leh duh chu, kan Minister Pu Lalthansanga chanah hian Sericulture chauh hi kan sawi teh ang. Kan bial chhungah Sericulture Village ang deuh hi siam kan rilruk ve a ni. Chutiang chuan Deptt. hian eng emaw pilot project neia hma kan lak a tulin ka hria a. Convergence te pawh MNREGS nen. Horticulture nen tiin thingtlang khua kan bialah te ruahmanna kan han duang deuh a; chung te pawh chu nakinah department te nen sawihoin, min hriatpui ta ula. Department-in theih tawpa hma lakpuiin, an hnathawh rah te buai lovin an tiral thei a, harsatna awm lovin. Chuvang chuan, heng hi kan inzirtira, kan chawi nun hi a tul takzetin ka hria a ni.

Aw le, Pu Chairman, vawiina kan Minister pahnih te – Minister Pu Sapdanga chan Demand Nos. - 13, 16, 30, 46 te leh Minister Pu Lalthansanga chan Demand Nos. - 33, 35, 36 leh 41 te hi, he House zahawm takah hian lungrual taka pawmpui tha ka ti a, kei pawhin ka thlawp a ni, tih ka rawn tarlang e. Pu Chairman, ka lawm e.

HON. CHAIRMAN : Tunah chuan, Champhai North Bialtu, Member zahawm tak Pu H. Ginzalala ilo sawm ang.

PU H. GINZALALA : Pu Chairman, hun min pek avangin, ka lawm e. Hei, Pu Chairman, i vei lama mite hian ding lama mite hi Hmunphiah hmanga mi vuak an tum deuh niin ka hria a. Hmunphiah hi invuakna tur a ni lova, bawlhhlawh phiahfaina tur a ni. A hmanna tur diktak chu bawlhhlawh phiahfaina tur, tual zawlte, inchhung bal te phiahfaina tur a ni a. Ka tet lain ka Nuin hmunphiah fawngin min vaw tawh a, a na khawp mai, Pu Chairman. Chuvangin, keini chuan bawlhhlawh phiahfai nan kan hmang dawn a; theih pheih chu ni se, sorkar hmasa te bawlhhlawh phiahfai nan kan hmang maithei a ni. Chu chu thuhmahruai deuhin ka sawi duh a.

Pu Chairman, hun hi minute 10 kan inpe ziah mai a, tu pawh hian kan duh tawk lo ka ti a. Keimahni dan siam hi keimahni vek hian kan bawhchhe zel hi a diklo, Legislature-te tan chuan; he House zahawmna kan vawn him nan te pawh a tul ka ti a. Minute 15 kan phal lo deuh a nih pawhin, 12 emaw, 13 emaw strict taka tih hi a tha lawm ni, tih kha ka rawn rawt ve mai mai a ni.

Aw le, bial lampangah ka'n lut chat teh ang. Hei, DUDO hi kan nei lova, Champhai hian; tin, district dang pawh an lo ni tho mai a. Pu Chairman, hei hi chu a concern minister hian min lo ngaihtuhsak se ka duh khawp mai a. Tunah hian senior Specialist te pawh an nei a, CSS programme-a lak anni a, kum 10 chuang an thawk tawh a ni. Generation khat the meuh an lo thawk tawh a; hengte pawh hi absorb-in, Asst. DUDO ah te pawh dah ta ila. MCS officer te hi DUDO-ah an rawn kal a, annite chu *coming and going* anni mai a; chuvangin, duhthu a sam lo deuhhlekk a. Permanent-a lo thawk tawhte khatianga District Establishment-a a an lo awm hi tul tak a ni.

Tin, Pu Chairman, ka bial tana ka sawi duh, a concern minister-in min lo hriatsak se ka duh chu – Champhaiah hian traffic te pawh a jam ve thin a, hmun thenkhatah ‘pedestrian tan fly-over bridge te hi siam ve ila’ tiin manifesto-ah te pawh kan lo hmang a ni; chu chu min lo hriatsak sela. Kawngpui chungah mihring kalkaina tur siam ila, kan ti a, mahse, tuna kan siam ang lo deuh, ‘innovation telin ni rawh se’ kan ti a ni. Van boruakah ATM Booth te pawh dah theihna, fast-food te pawh awm theihna, khatianga structure rinawm tak a awm theihna kha kan resource mobilisation atan a pawimawh a ni hetiang te te hi. Space a indaih lova, van boruakah space kan ngah lutuk; chu chuan mihring kal vel te pawh a promote ang a, ATM-a pawisa la turte pawh an kal zut zut mai dawn a, kan ram tana innovation pakhat tur a ni.

Chutiang chuan, parking te pawh kan indaih lo khawp mai a, Champhai khawpui chhungah; chungte pawh chu min lo hriatsak sela. Hon. Mnister, UD&PA-in min lo hriatsak leh atana ka duh chu – ‘Khawnkawn’ kan ti a, Champhai luh dawna police checkgate awmna saw; khata tanga kawng hlui zawk (ti mai the ang) tuna highway thar an rawn siam nilo, Champhai khawchhung luh chhohna hi tawi te a ni a, km 2 bawr vel bak a ni lova; hei hi engtin emaw a concern minister hian min siamsak theih dan ngaihtuah sela a tha awm mang e, kan ti a, kan dil bawk a ni.

Tin, DP & AR changtu a nihna zawnah kan minister hnena ka sawi duh chu, Pu Chairman, he tah hian notification pakhat ka rawn keng a, 2008 kuma mi a ni a. Hei hi ka bial chhung Hnahlan khuaah hian PHE Deptt. Sub-Division hawnna a ni a, cancel-na awm awm hi kan hre lo a. Hei hi a theih chuan tunah hian function tir ni se ka duh khawp mai a, tin, ka ngen nghal bawk a; PHE-SDO hian awp ve tawh sela, tih hi, he notification base-in ka ka ngen bawk a ni.

Tin, nichina kan Member-te rawn sawi tawh kha ka’n tuihnih ve lawk ang a, DIG Eastern Range chungchang bawk hi. Kan pawimawh khawp mai a keini hi border-a awm kan ni a, kan boundary hi a luh-chhuahna a tam lutuk a, tin, hei hi kan ram hmel lanna a ni dawn, tih hi, sorkar hian hrechiang se ka duh khawp mai a. Chuvangin, Champhai-ah hian DIG Eastern Range, staff tam tawk nena kan dah a ngai, Pu Chairman. A chhan chu, tunah hian Manipur a buai a, Burma a buai bawk a; refugee an rawn tam em em mai a tunah hian. Champhai District hi ka rin danin population-ah pawh 1,70,000 – 2,00,000 bawr vel kan awm ka ring a. Chu chu a ni a; Law & Order-ah hian problem a awm lek lek a ni. Tin, nichina ka sawi ang khan, drugs te a tam a, tin, Silai leh a mu (Arms and Ammunition) tawlh ruk te pawh a awm maithei; thil awm thei a ni. Chu chu a nih avangin, khilai khi ven uluk a ngai khawp mai a.

Tin, population tam na na na hi Law & Order-ah hian problem a awm thin a. Tin, zirna lam leh thildang dang health sector-ah te pankhawm ruih ruih kan ni a, Champhai hi; Khawzawl atang pawhin rawn kal an awm a, a then chu. Hei, Khawzawl nen phei chuan

kan inhnaih tawh khawp a, minute 40 lek travelling hour a awm a ni. Chu chu a nih avangin, khilai khi focus viau a ngai ta a.

Tin, Swadesh Darshan atangin tourism lam project lian tawh kan nei dawn a; chu chu 90 crore velin project kan han siam a. Chu chu a nih avangin, tourist ho hi an rawn kal khawm dawn a; an danah phei chuan Police Outpost te pawh siam a ngai dawn a ni, tourist destination thenkhatah. Chu chu a nih avangin, kan indaih dawn lo a ni.

Tin, kan zawlneite pawhin in sawi in sawi kha maw le. 'Ral a lo lian dawn' te an ti a, lo lian tak tak ta se, kan police ho hi an indaihlo dawn nasa mai si a. Aizawl atanga tlan vut vut ai chuan, khita silaimu tam tawh nena lo inbun lawk kha a tha lo em ni, ka ti deuh a ni, Pu Chairman.

A dang leha ka sawi duh chu, traffic police te pawh kan indaih lo a. Chuvangin hei hi chu Home Department lam hianin min lo ensak turin ka ngen a ni.

Tichuan, Forest lamah hian; hei, kan forest resource hi kumtin lo vah, lo hal a ni a. Kan vat a, kan hal hluah hluah mai te hi a uihawm ka ti a; lo vah hi kan la bansan lawk thei dawn si lo a. Chuvangin, Forest Department angin engtinngge kan tih ang helai hi? Kan thing kih zawng zawngte hi a zavaiin kan lachhuak thei ang ka ti hauh lo a; tlem technology input, intervention a awm chuan, kan lo vaha thingfakte hi tam tawh kan la chhuak thei a ni; kan harvest thei a ni. Chuvangin, khatiang zawnga ngaihtuahna kan sen a ngai. Thing tumte kan hal khan pollution a siam a, carbon dioxide kan atmosphere ah kan inject a ni. Chu chu kan lo lak then khan, kang ral mai lova economic resource atana kan lo hman then theih dan hi kan ngaihtuah a ngai a. Employment generation turu lutuk mai awm thei thil hi kumtin kan hal thin, tih hi kan hriat atan ka sawi duh a. Chuvangin, hei hi ngaihpawimawh ni se ka duh a. Ropeways system, simple te te pawhin thalaite hnenah entrepreneurship development a tan capacity building programme tlem nen han ti ila chuan, khang laia thingfak kha an harvest ang a, an lachhuak ang a, economy ah hianin nasa takin awmzia a nei dawn a ni.

Tin, thil pawimawh deuh mai (**Hon. Chairman:** Ngawi rawh lawk rawh aw. Kan chawhma hun a tawp a; sawi tlang se, hun a rei tawh lo bawh a.)

Pu Chairman, ka lawm e. Tin, Forest ah hian, thil ho tea kan ngaih pawimawh deuh nia ka hriat tak chu - lo kan vah hian kawngpui hi kan vat pawp thin a ni; hei hi tha ka ti lo khawp mai a. Kawngpui atanga metre 10 emaw tal hi reserve nei thin ila a tha lo em ni, tih hi ka ngaihtuah a ni. Hei hian hnim a ti tlem ang a; kan vah pawh khan hnim a rawn to a, loneitute'n engvak mah an thar phah lo a ni. Tin, motor accident tur te pawh a veng a ni. Hmanni lawk pawh khan kawngthlangah a tlan liam a, motor pakhat chu; Kawng thlanga thingtuai khan a lo dang bet a, nunna hlu tak kan chhanchhuak a ni. Tin, kawnga kal te tan pawh daihlim a siam ang a. Chuvangin, kawng atanga metre 10 bawr vel ve ve, kawngchhak leh kawngthlang hi zuah theih ni se ka duh a.

Tin, Pu Chairman, Skill Development lamah hian, Urban Development lam deuh te pawh a ni ang chu. Skill development-a kan kal hi a pawimawh khawp mai a. Khaw pakhat Rajivnagar-a thalaite zawng zawng te chuan JCB, Hitachi, Excavator te an khalh thiam deuh vek; an operate thiam vek a ni. In 1000 khuaa thalai 400-500 hian an thiam vek; lo neih an tum tawh lo. Chuvangin, skill development lamah hian an entawntlak ka ti a ni.

Chuvangin, kan policy tur chu, *One village, One skill* policy deuh hleka kan kal a ngai, Pu Chairman. Chutiang zawng chuan Urban Development lam te pawh hian min hriatpui se la. Kan bial angah te pawh hian skill development lamah hian nasa taka min kalpui turin ka sawm a. Heng, welder te, plumber te, mistiri te pawh kan mamawh a ni.

Urban Development chungchang ka sawi duh tawite in, Pu Chairman. Tunah hian highway NHIDCL atang te pawhin an rawn kal a, ti hian an rawn siam a. Urban Development lam hian lo ngaihtuah se ka duh chu, hemi kawngpui denchhenin urban planning kan tih a ngai a, urban policy te pawh kan neih a ngai a ni. Chuvangin, khua hi insawn zel a lo ngai dawn; tunah pawh insawn tur ka hre teuh, kan bialah pawh an awm dawn a ni. Chuvangin, NHIDCL ten emaw kawng an rawn sial laiin khawpui atana kan it lai kan lo thlang ang a, awmze nei taka kan kal khan nakinah khawpui, sustainable development tak tak, planning nen kalkawp thei kha, khawpui mawi tak emaw thingtlang – Smart village kan nei thei dawn hi a lo ni reng mai. (**Hon. Chairman:** I duh tawh thei dawn tawh em?) Chulai te pawh chu kan resource kan la exploit loh a ni a, explore dan awm thei se ka duh a Pu Chairman.

Tichuan, kan Minister zahawm tak takte - Pu K. Sapdanga demand ₹12,74,96,76,000/- leh Pu Lalthanganga demand ₹1,96,80,54,000/- te hi he House zahawm takah hian pass ni se, tih hi ka duh dan a ni e. Ka lawm e.

HON. CHAIRMAN : Dan zawma, dik tak leh khauh taka kal duh pawhin, minute 1 leh a chanve vel khan kan pel tho mai zel a; a har deuh a ni ang e. Kan chawhma rorel hun a lo zo leh ta a, dar 1 a ri a. Kan chawl ang a, chawhnu dar 2 ah rorel kan tan leh dawn nia.

(Recess till 2 PM)

2:00 PM

HON. SPEAKER : Aw le, kan Minister zahawm tak takte demand discussion kan nei kha kan han chhonzawm ang a. Tunge han sawi leh ang aw? Hrangturzo Bialtu zahawm tak Pu Lalmuanpuia Punte ilo sawm ang.

PU LALMUANPUIA PUNTE: Pu Speaker, ka lawm e. Hei, vawiin ah hian kan Minister pahnihte - Pu K. Sapdanga leh Pu Lalthansanga te demand, department 4 ve ve kan sawiho dawn a. Department zawng zawng ka sawi kim seng dawn lova. A hmasain, Pu K. Sapdanga demand - Home hi han san luh chilh deuh hlek ka duh a.

Hei, ILP kan pek dan hi tunhma deuh khan fel lo a awm leh deuh zeuh zeuh a, tunah erawh chuan an felfai viau taknain, Smart Card pek theih ni tawh sela a tha hle ang a. A bik takin, vaiho hi mihring ve tho an ni a, an khawngaihthlak angreng a; ILP hi A4 paper ah hian an pe a ni. Chu chu Mizo tlangval ho hian khawilaiah emaw hian, “permit in nei em; in neihloh chuan Police-ah ka’n report ang che” te an ti a; kha kha pawisa dilna remchangah an hmang thin a. Chuvang chuan, ILP xerox copy hi an laminate a, an thlep a, an ak ringawt reng mai a, an khawngaihthlak angreng viau mai a, a kengtute hi. Hei hi Smart Card-a tih mai ni sela, Smart Card-ah hian monitor a awl zawk dawn bawk a. Smart Card man, a senso belh kha chu anmahniin a permit holder te khan an tum leh mai ang a. Chuti chuan, Smart Card-a tih mai hi ni se la, a sponsor tuin a enkawl em, a permit a thih dawn khan Computer-ah a rawn lang zat zat ang a; amah locate te a awl dawn a ni. Chuvang chuan, hetiang a tih hian a system hi kan vawng tha zawk dawn bawk a ni. Tunah kan tih dan ang atang hi chuan, mi permit thi mai tur pawh hi hriat a har a.

Tin, hei ai hian ti strict deuh hlek thei ila. A danah chuan, ‘sponsor-tu hna an thawk tur a ni; tin, an inah an awm tur a ni’ tih a ni a, hetiang hi kan zawm lo nasa lutuk a. Thil an lo tihsual deuh hlek hian, a phek lehlamah, “The sponsor shall be responsible of all the conducts of the past holder” tih a ni a, hetah hian hriatthiamnain kan ti a ni mai a. Hmanah pawh Zarkawt-ah nula an that a, anni kha chu Nepal-ah an tlanhhia a, an zuk man mai a. Khang te kha a sponsor tute tawrh tir an ni em; man hma khan man ve an ni em; case pek an ni em, tihte kha an responsibility a ni. Khatiang chi te kha tha taka enkawl zui ni sela; a hman hman hian an sponsor ringawt a, thenkhat te pheh chuan hlawh nei te hian an sponsor niin a lang a ni. Chutiang deuh te chu a nih avangin, hei aia mumal deuh hlek zawk leh tha zawka enkawl theih nan Smart Card-a ILP siam ni sela a tha hlein ka hria a ni.

Tin, tunah hian Aizawl khawpui-ah traffic light tur niawm tak an dah thleh thluah a, hengte hi hman deuh hlek khan an han test ni te khan kan hria a, mahse test zui a ni ta lova. Hengte hi a tangkai em? UD&PA lama Smart City hnuai atang dah niin ka hria a. Lehlamah Traffic pawh hin Home hnuai tho a nih rualin, hemi Traffic light system hi chu Smart City hnuai atanga tih niin ka hria a. UD&PA te hi uluk deuh hleka tiha, mumal taka test ni sela. Kan traffic duty te hi an hah em em a, sorkar-hnatawk unit pakhtah hi chuan a hah ber an ni awm e.

Tunah hian, Aizawl khawpui-a traffic police te hi an zavaiin 300 vel an awm a, an khawngaihthlak an hah lutuk bik a ni. Chuvang chuan, Aizawl khawpuiah hi chuan

500 tal hi chu tih theih ni sela a zia ang. Traffic Police ho hi a lehlam zawng chuan an zaidam hi ka ti zawk a. Kawng chep dan bakah mi tam takte an awm duhdah dan leh an parking duhdah dan te, thenkhat hian an han rel thla rawk a, an fel hle hian ka hre zawk a; an zaidamin an dawhthei hian ka hre zawk a ni.

Chuvang chuan, hengte zawk hi Aizawl khawpuiah hian 500 tal, Lunglei khawpuiah 100 tal, Siaha leh Champhai lamah te pawh 40-50 bawr vel emaw te leh district headquarters lamah te pawh hian awm sela; khawi khawpuiah pawh hian lirthei a pung chak a, kan kawngpui a lo zau tawk lo vek mai si a. Chuvang chuan, hengte hi tihpun chhoh theih ni sela a.

Tin, IR hi, a bik takin Bangladesh border-ah BSF an awm a; BSF rawn lut chhuak hi an check lutuk lo hian a lang a ni. Chuvang chuan, kan ram tho a ni a, international boundary a nih avangin a theihlohna a awm chuang em ni? Khawthlang lam atanga infiltrator rawn lut tur ven nan hian kan BSF karah post hi dah phei ve zat zat hi a tha em, rawn lut belh zel turte check tu atan, tih hi ngaihtuahnaah a awm a tha hlein kan hria a ni. Amaherawhchu, international boundary a lo nih vangin a remlohna te a awm em? A awm chuango a nih chuan, sawng BSF ho karah sawn tunhnaiah ngat phei chuan Bangladesh-a kan unaute thlabarin an awm a, rawn lut tur zo-hnahthlakte chungah an strict viau ang lawi si a, midangah an strict bawk si lo a. Chuvang chuan, kan police-te hi dah ve an tul hian ka hria a ni.

Tin, nichinah zawhna te pawh a rawn lang tawh a, Thingtlang lamah Outpost leh Police Station lamah hian motor hi an indaihlo mai bakah, an motor neihchhun a hlui lutuk hlawm a, hengho hi tunhma atangin zirlai pawla kan lo inhman tawhna ah Mizoram dung tluan hi kan lo suartluan ve thin a, thingtlang police station leh outpost te hi an khawngaihthlak hle a ni. Chuvang chuan, motor tha tlan zar zar thei reng te hi pek zawk ni sela. A khawpui lamah hi chuan a tha lo zawk te pawh hmang mahse workshop te a lo hnai zawk a. Hengte hi a tha deuh hlek te hi ruat ni sela a tha hlein kan hria a.

Nichina ‘Rifles allowances tihpun a ni dawn’ tih kan Home Minister-in zawhna a chhanna kha kan ngaithla a, a lawmawm takzet a. Tin, Jail hi englai pawh hian an tawt deuh reng mai a; tunhmain kan han lut ve zeuh zeuh a, zirlai hruaitu kan nih laia kan zu tan ve zeuh zeuh pawh khan; a tawt em em zel a, an khawngaihthlak takzet.

Tin, jail tangte ration hi duh ai hian a chhia a, hei ai hian an eitur leh an budget pawh hi tlemin han tih that sak ni sela a lawmawm hle ang a. Tin, tunhnaiah hian thil, tha vaklo tih ka nei a, jail-ah hian. Cable TV an la lut a, a channel kha an filter si lova, thil tisuat thang (habitual offender) awmkhawm kha chuan film pui deuh deuh kha an en ve thei vek mai a. Helam office atang khan channel thianghlim deuh chin filter sak a nih si loha direct-a an duh duh an en theih te hi a tha lo ang reng hlein ka hria a.

TV hi an la lut a nih pawhin, a channel thianghlim deuh chin leh jail tangina an enawm chin hi a awm a ni; hei hi ka ngaimawh viau a, helamah hian tan la deuh hlek ila.

Tin, Pu Lalthansanga chan Fishery lamah hian tun hmain Mizoram hi kan lo la hniam viau a. A nursery siam te, a tui leh a note siam lamah te hian duh angin hma kan la sawn lova, kan la siam chhuak tam lova. A chi lamah hian tan lak a tha hlein ka hria a ni.

Tin, Environment, Forest & Climate Change-ah hian, Aizawl Sahuan hi naupang han kalpui nan a tha a, a hlimawm viau rualin, duhthusamin a hmun khu a lian tawk lova. Khung te pawh khu zauh theih hret dan a awm em, khung lamah te khuan kan sorkar hian hma han la deuh sela a thain ka hria.

Tichuan, Pu Speaker, Pu K. Sapdanga chan Demand Nos. 13, 16, 30 leh 46 leh, Pu Lalthansanga chan Demand Nos. 33, 35, 36 leh 41 te hi he House hian pawm pui ngei ila, tiin ka thlawp a ni e. Ka lawm e.

HON. SPEAKER : Tunah chuan, Aizawl South-III Bialtu, Member zahawm tak Pi Baryl Vanneihsangi ilo sawm ang.

PI BARYL VANNEIHSANGI: Pu Speaker, ka lawm e. Vawiinah demand pawimawh tak tak kan sawiho leh a. Hun hi minute 10 chhung chauh a nih avangin kan sai kim hman lo deuh turah ngai ila.

A hmasa berah chuan, Minister Pu K. Sapdanga chan Demand No. 46 - Urban Development & Poverty Alleviation hi han luh chilh ka duh a. Budget-a kan hmuh ang hian UD & PA Deptt. hnuaia infrastructural assets siamna atan nuai ₹18,265.84 lai mai dah a ni hi, sorkarin khawpuia chengte tana hmasawna tur ruahmanna leh welfare measures tha tak mai a nei tih a tarlangin ka hria a, hei hi lawmawm ka ti hle a.

Tichuan, central sorkar leh Externally Aided projects atanga tanpuina cheng ₹20,949.93 aia tlem lo dawng thei tura ruahmanna/hmalakna lo langa a hi a lawmawm hlein ka hria a ni. A bik takin, Aizawl Sustainable Urban Transport Project (ASUTP) hnuaia hma lakna avang hian Aizawl khawpuia mipui leh motor chet velna kawngah bung thar kan kai ngei ka beisei a. Amaherawhchu, hetah hian theih tawp kan chhuaha tan kan lak erawh a ngai dawnin ka hria a. Chutih rual chuan kan state fund atang hian khawpui tih changtlunna te, tih mawina te pawh a niang chu, city beautification leh urban poverty - khawpui chhunga chengte retheihna, (tawng mawi lo ni lo se la) miharsa zawkte dinhmun hei aia thaa an awm theihna tur atana hmalakna tur hi tam se kan ti a; ka duhthusam kan sawi anih chu. Helai city beautification leh urban poverty tih hniam hi ka ngaihpawimawh lai a ni a.

Tichuan, Pu Speaker Aizawl Smart City Ltd. chungchang hi sawi lan thain ka hria a. Heng hnuaiiah hian nitina kan mamawh - *Ease of living* atan project hi a awm thin a, kan mamawh hi a phuhru lo hlein ka hria a. A project hi a tam tawk lova, a pawl ka ti a. Hetiang project hi kan nei leh dawn a nih chuan, tuna kan kalpui dan ai a tha zawk, tuna mi hi chu a huam kim lo deuhin ka hria a, tlem te te hmasawna a ni deuh a. Chu ai chuan, heti lo zawng hianin, infrastructure siam aia mipui nawlpui mamawh remchanna – ‘public utility leh service’ kan tih hi, hemi siam kawngah hian lian zawka hma lak ni ta se la, a chhawrtu pawh kan tam zawk ang a. Aizawl Smart City Ltd. hi chutih rual chuan, kan minister te an awm a, min chhang thei turah ka ngai a - Central Sorkar hian kalpui zel a la tum em, tih lai te pawh hi hriat a chakawm a, ka zawhna te pawh ni sela.

Tichuan, Pu Speaker, bawlhhlawh sawngbawlna hi ram pumin kan buaipui a, municipal lam pawhin an theih tawp an chhuah a, reilote chhung kan awm ve pawhin keni pawhin kan theih leh phak ang tawk kan hotute hnung zuiin kan han ti ve kha a ni a. Amaherawhchu, tunah hian beisei angin a kal lova. Vawiinah hian Pu Speaker, nangmah kal tlanga ka sawi duh chu, sorkar lam, a concern depts te hrim hrim hi chuan theihpatawp an chhuah tih hi a lang chiang khawp mai a. Awareness-te pawh an pe a, tv-ah advertisement thlengin an chhuah a, a hlate an siam a, ‘*bawlhhlawh, a bawmah paih rawh*’ tih te leh thil hrang hrangte pawh an buaipui a, sum tam tak pawh an seng a ni.

Amaherawhchu, a zawmtu tur a mipui lamte hian kan zawm tha tawk lo a, in bul kawra han paih mai te leh motor-a hlan dawna thliar loh te, thil hrang hranga kha kan ti hlawhtling duh lova. Tichuan, fur a lo ni a, ruah a rawn sur a, kawrte a rawn hawlh chhuak a, khalaiah khan a thuneitute an han puh leh mai thin a. Hetiang hi a nih lohna turin tun sorkar hi chuan chak leh zual leh awmze nei zawkin bawlhhlawh sawngbawl hi kalpui se kan ti takzet a, chulaia chu Minister hriatah kan tarlang ni ve se la.

Tin, *Swachh Bharat Mission* hnuaiiah hian *ODF Plus* khawpui kan la tlem viau mai te hi inbih chiana, tan lak a ngai hlein ka hria a. Kan state hmel lanna a ni a, Central lam atang pawhin an rawn ngai pawimawh em em a, lehkha a khat tawkin an rawn thawn ve reng thin a. Chuvang chuan, *ODF Plus* nei tura bial tinah tan kan lak te pawh a ngaiin ka hria.

Tichuan, khawpuia in leh lo nei lote tana in sakna, *PMAY - Urban Housing For All* te pawh hi in sak sakna kawngah hianin tun aia hma lak chak dan hi awm se. Tin rualkhai zawka tih dan te pawh hi awm se la kan ti khawp mai a, mimal ngaih dan deuh te pawh a ni a. State sorkar hian a matching share te pawh hi han ti ve thei ta se la chuanin, kan in sak quality-te pawh a thain, chenna tlak tak takah te pawh a chhuah ka beisei a; khalai kha ka han tarlang a ni.

Tichuan, Pu Speaker National Urban Livelihood Mission (NULM) hnuaiia khawpui a retheite dawmkanna atana hmalakna pawh hi tun aia chak zawka kalpui dan awm se kan ti takzet zet a. MZSRLM hmalakna te nen hian kal kawp thei pheis se chuan hei ai hian awmzia a nei leh zual pawh kan ring a ni. Tichuan, kan Hon. Chief Minister leh Finance Minister-in a Budget Speech-a sawi, a tarlan ang khanin kum 2024 - 2025 chhunga Central sorkar atanga ULB Grant kan beisei kha crore ₹39 a ni a, kum kal mekah crore ₹37 a ni a. Hetah pawh hian AMC tan engzat neg tih leh LMC tan ruahmanna siam pawh hi hriat ve kan chak ve khawp mai a. Tichuan, municipal body-te in a fund an release hnuai an dawn tlai thin avanga state ina a sorkar in a penalty kan chawi, cheng nuai tam tak kan chawi thin te pawh, pumpelh dan awm se la, a hun taka pek chhuah thin ni se tih te pawh hi suggestion kan han dinpui ve a ni.

Tichuanin, Demand No. 13-ah ka pakai ang a. Pu Speaker hei hi tawitea comment ka duh a; suggestion angin min lo ngaihsak mai sela a changtu kan minister-in. Hei Secretariat-a Supervisory level Officer-te service hrang hrang atanga lak khawm kan nih hianin ka inrelbawlina hi a chang hi chuan a ti chhangchhe zawk em aw, tih te leh, service inang lo atanga lo kal khawmte inkarah hian eng emaw a awm palh thei em, tih te enchian a ngai hlein ka hria a. Hei IAS te, Mizoram Civil Service leh Mizoram Secretariat Service tih loh hi chu deputation bak hianin kal thei lo ta sela. Tin, duhthusamah pheis chuan MCS leh MSS pawh hi Mizoram Administrative Service (MAS) hnuaiia te a khawmin han awm ta se la, chu chuan kan inrelbawlina, kan administration te pawh a tifel faiin, hei aia chak zawk leh awmze nei zawk hian kan kal mai lawng maw, a effective zawk mai lawng maw, tih kha kan Minister-te hriatah ka'n sawi lang duh a, rawtna te pawh a niang chu. Tin, mode of recruitment-ah pawh hianin duhthusamah chuan MCS hi zawm ni ta se, tih te thleng pawh hian rilruah a awm a. Amaherawhchu, a changtu Minister leh department te, a thiam tak tak awmkhawm an ni a, an niin kan ram tan tha tur zawkin ruahmanna an rawn siam ngei ka ring a ni.

Tin, operation leh field-a hnathawk tura lak emaw thiamna bik neite hi chu anmahni thiamna field-ah hian thawkin, administrative post-a dah loh hram ni ta se la. Anmahni line theuhah hian an thawh hlawk em em mai a. Chu bakah Civil Administration a experience nei lo, Central service te leh State Administration-a administrative post vuan tura kan chawlut thin hi a tul lo lam deuh niin kan hre ve a, chung te pawh chu ka'n dinpui ni sela. Pu Speaker, an inzir chungin an deputation period a lo zo a nih leh a hmanna a tangkai nep thin baw si a, chuvang chuan, kan Minister hian helai hi min ngaihtuah pui sela a tha awm e.

Tichuan, Demand No. 16 - Home-ah hi chuan ka hma lamah an sawi nual tawh avangin a tawi thei ang berin kan sawi ang a. Hemi Mizoram Police Station hrang hrangah te hi a tlangpuiin motor an indaih lo; manpower indaih lo; engkim mai hi indaih lo a lo ni baw si a. Hetah hianin motor fit tha vak lo, amaherawhchu, bial zau em em mai tlan ve reng ngai mai te a ni a, thingtlang khaw thenkhatah pheis chuan an jurisdiction

chhunga fit vak lova han tlan ngai te a awm thin a ni. Hengte hi ruahmanna a awmin ka hri a a lawmawm ka ti a. Tin, bial zau tak tak a ni a, a hautak em avangin POL tihpun dan te hi a la awm thei ang em? Kan kal zel na turah kan minister te pawn min lo hriatsak sela.

Tichuan, Demand No. 30 - Disaster Management & Rehabilitation hi emergency thila kan hman ber an ni a. Hmanni lawkah pawh kan bialah in a kang a, kan han thlen a, norms & guidelines alo awm a, an lo strict em em a. Hetilaia an sum demand pawh hi a awm viau rualin, nakina ram pumin kan ban leh tur a nih avangin an ni hi duhsak theih an nih chuan duhsak ni sela.

Tin, bialchhung thil pakhat lek ka'n sawi lawk anga. Hlimen quarry te pawh a history kan hre vek ang a, khangah te pawh khan DM & R lam hian danger area-ah puanga chhuah tir te kha an ni a. Amaherawhchu, waviin thleng hian LSC nung, tax la pe te pawh an lo awm niin kan hria a. Hei hi mihring tan a him lova, nakinah sorkar mawhpuhna thil te pawh thleng leh thei a nih avangin, kan minister te pawh hian khawngaihin min lo enpui ta sela a awm e.

Kan Minister Pu Lalthansanga Demand hi chu a hlawmin ka'n sawi mai ang a. Kan ram hmasawna tur environment tichhe lo zawnga development kalpui dan hi kan zawn zel a ngai dawnin kan hria a. Hmasawna awm tur chuan eng emaw chenin a tawrh chu a ngai dawn tih kan hria a, a lehlam atanga alternate plans kan neih thiam a ngai dawnin ka hria. Tree plantation te pawh kan han ti a, kan phun vak vak a, a hnu lawkah thildang tih nan te kan duh avangin kan cut leh mai thin bawk a ni. Khatiangte kha a uniform lo hle mai a, heng kawngah hian theihpatawp chhuah a ngai tak zet zet a.

Tin, Illegal wildlife crime lamah te pawh hian department-in theih tawp an chhuah a ni tih kan hria a, mahse, staff indaihlohna a nasat em avangin duh angin hma an la thei lova, hengte pawh hi kan minister ten lo enpuiin, theih tawpin thuamchhak se kan duhpui tak zet zet a ni.

A tawp nan tak tak, Pu Speaker, tunlaih hmanrua kan nei tha a, silai te, chainshaw te kan nei tha em em tawh mai a; thingtlang lamah phei hei hian ramngaw leh nungchate han vaia han sam mai te leh han suat mai te kan ching hle mai a, hemi kawngah pawh hian hetiang a ti lo tur hian mipuite paw'n theihtawp chhuah ila, kan minister te hmalakna kan lo thlawp ve pawh a ngaiin ka hria. (**Hon. Speaker:** Minute a liam ta e.)

Pu Speaker, he Demand hi ram tana tangkai tak tak turte an ni a, a tangkai ang ngeia an hmanchhuah theihna turin duhsakna ka hlan a, ka thlawp bawk a ni. Ka lawm e.

HON. SPEAKER : Tunah chuan, South Tuipui Bialtu, Member zahawm ta Pu Jeje Lalpekhluva ilo sawm ang.

PU JEJE LALPEKHLUA: Pu Speaker, ka lawm e. Vawiinah hian kan Minister chhuanawm tak pahnih Pu K. Sapdanga leh Pu Lalthansanga te demand kan sawiho tur hi a lawmawm ka ti takzet a. Hun te a rei loh nan Demand No. 16 - Home Department-ah hian han sawi hmasak ber ka duh a.

Home Minister-in thlahnih awrh chauh Office a la luah chhunga Home Department tana a thawhrimna leh thil tam tak a kaihhruaina hnuiaia kan hmu chho mawlh mawlh hi a lawmawm ka ti hle mai. Home Department hi mipuite'n kan thlamuanpui ber pakhat leh security min petu ber a ni a, chutih rual chuan kan police-te indaihlohna hi a nasa hle mai a.

Hnahthial hi district thar kan ni a, kan buaina ber pakhat chu, hmeichhe police kan nei lo thin hi a ni a. Tunhnaiah hmeichhe police eng emaw zah sorkarin Hnahthial-a a rawn dah thar ta hi a lawmawm kan ti hle a, he House zahawm tak kaltlang hian a changtu Minister hnenah pawh khan Hnahthial bial mipui aiawh pawhin lawmthu ka sawi a.

Tin, Police Station DEF-ah hian POL mamawh khawp pek an nih thin loh avangin duh anga tam Crime Scheme patrolling - tang phurh kual leh thildangah te pawh harsatna an tawk nasa viau nia sawi hi hman atang tawhin a awm thin a. Heng harsatna hi ngaihtuahpui a duhawm viauin ka hria a. Law & Order atana hman tur hi a hranpaa dah a nih loh avangin, Law & Order thila police te an deploy hian zing dar 5:00 atanga thim thleng te pawh a awm a, a chang pheh chuan tlaivar te pawh a awm thin a, hengah hian fund hran a awm miau loh avangin office lam atangin tui leh an thil ei leh in tur te, chaw te pawh inpek vak ngaihna a awm thin lova. Hemi hi humanitarian ground atanga han en pawhin hetiang hi han pui deuh se, mipuite tan pawh thlamuangin an duty thei deuh ang a, tih vawiinniah hian ka'n sawilang ve duh a.

Pu Speaker, Police Station-a case IO ten case an chhui changin hmun hrang hranga an kal a tul thin a. An case khawih dana zirin POL a hautak chang a awm thin hian a hriat a. Mipui tan hian an pawimawh si a, case IO ten investigation an tih hian fund hran emaw, an mamawh han ngaihtuah sak theih dan hi awm thei ta se tun aia chak zawkin an kal thei dawn a. An case khawihah khan anmahni sensoa han ti tur chuanin an sum leh pai, an hlawh te pawh kan hriatpui awm e. Hetiang kawngah hian a changtu Minister pawh khan ngaihtuahna lo seng ve turin ka'n ngen duh bawk a ni.

Tin, mahni bial lama han luh ve lawk ka duh a. Hnahthial-ah hian SP office atan land-lease kan nei tawh nachungin, office hi tun thlengin sak a la ni lova. SP office kan neih ve theihna tura hma min laksak turin a changtu Minister kha ka'n ngen nghal duh bawk a.

Pu Speaker, Hnahthial district-ah khian district khat khi ka bial a ni deuh mai a. Pu Malsawmtluanga leh Pi Rinpuii hi kan bial chhung khaw hnih-thumah an lo awm ve a

ni a. Hei hi a changtu Minister te pawhin min lo hriatpui ve turin ka duh che u a; Hnahthial District-a fire service hmun tur hi kum 2005 khan quarter leh fire tanker dahna hmun turte sak a ni ve tawh a, mahse, tun thleng hian a la function lova. Kan Minister pawh khan min lo hriat saka, a rang lama a hmun ngeia min rawn hmuhpui ve tur pawhin, he House zahawm tak kaltlang hian ka ngen nghal bawk a.

Pu Speaker, Demand No. 36 - Environment, Forests & Climate Change chungchang hi sawi leh ka duh a. Forest clearance chungchang hi a pawimawh khawp mai a. Mizoram-a project pawimawh thenkhat hi forest clearance lama harsatna avangin hna a huna thawh tan theih loh leh zawh theih loh, rei tak an delay ngai awm ta zeuh zeuh hi, a tuartu chu mipuite kan ni leh thin a, hei hi a pawl tak zet zetin ka hria a. Pu Speaker, hetiang project te hi Mizoram hmasawna tur a ni a, India ram mai ni lo, khawvel hian forest humhalh hi a ngaipawimawh telh telh zel dawn niin alang a. India sorkar pawhin forest clearance-ah Dan tha leh khawng tak mai a nei a. Forest chungchangah pawh Central leh State sorkarin thuneihna intawm, thil inchuh a awm changa central-in thuneihna a neih tamna zawk a lo ni bawk si a.

Pu Speaker, forest clearance chungchangah harsatna a awm tawh loh nan, department ten project an siam reng reng hian forest clearance hi uluk taka siam hmasak ni thei thin sela, project tan hmaa tih fel ni vek thin se, tih hi ka rawn rawt duh a. Kan CM office siam ho hian pa-chan chang takin department project nei forest clearance nei tur reng reng chu monitor thei se, an hnenah report hi lut vek thei se, an niin forest department nen coordination tha tak neinin a tir atangin an siam ang a, forest clearance tih hmasak vekin project hi a kalpui theih dan kawng a awm theih a rinawm a, he kan harsatna tawh thin hi a kiang thei viauin ka ring tlakt a ni. Tunah hian Hnahthial-ah pawh 132 kV line laih theihna tur a fel chho mai tura kan ngaih kha forest clearance lamah khan harsatna a awm avangin hna tan thei lovin kan awm reng ringawt mai a ni.

Tin, Pu Speaker, district thar chauh kan ni a, district tih puitlinna lamah mamawh kan ngah mai a, kan mamawh zawng zawng hi sawi dawn ila chawhma zawng daih sawi tur a awm dawn a. Forest department-ah hian a changtu minister pawh khan min lo ngaih pawimawh sela ka duh chu, division kan la ni lova, tunah hian kan district chhungah hian Forest Range - Hnahthial, South Vanlaiphai, Thingsai, Cherhlun leh South Chawngtui te a awm a ni. Kan Range behchhan hian division pawh hi hawn harsa lutuk loh turah ka ngai a, division min hawnsak ngei turin kan Minister pawh ka ngen nghal duh bawk a ni.

Pathumnaah chuan, Pu Speaker, Demand No. 46 - Urban Development & Poverty Allevation chungchang han sawi ve ka duh a; mimal tak pawhin ka thil vei han tarlan ve zuai te pawh ka duh a. Mizoram-a kan khawpui ber Aizawl hi kan tawtin, a chep tawhzia chu tute mah hi hrilh hran an ngaiin ka hre lo a. Chep zel mah ila, Aizawl hi Mizoram-a khawpui ber a nih tlat avang hian kan la pun belh dawn chauh si a, khawpui

sawn hlawk emaw hi chu tuna tan pawh thil harsa tak a nih a rinawm a; awmze nei deuh hleka project siamin Aizawl khawpui extension hi ngaihtuahnaah seng ila a tha viauin ka hria a. Department mal tana buaipui vek thei chi a ni lo a, UD & PA kaihhruaina hnuaiah hian department hrang hrangte'n vision mumal tak nen project-te siam thei ta se. Kum hnih-khata tihhlawhtlin chi a nih loh avangin, tun atanga kum 10 lo kal leh tur thleng ngaihtuahin, kum 2034 vela a vaia tihhlawhtlin hman tur ang te hian target han siam hmasaka, hmalakna han awm ta se, tih te ka sawi duh a. Khawpui chhungah sorkar office-te, institution-te sawn chhuakin, awmze neiin han kalpui thei ta ila. Chulam hawi project-te han awm sela chuan, hun lo kal zel tur atan kan State khawpui ber hi awmze nei zawkin kan sawngbawl thei ngeiin a rinawm a ni.

Pu Speaker, kan bial lam han sawi lan ve leh ka duh a. Hnahthial-ah hian sorkar hmasa hmalaknain DUDO Office changlung tak kan nei a. Hei hi a lawmawm rualin, district kan nih rualpuite'n SASCI lam atang khan sum eng emaw zat an hmuh thu te kan lo hria a, district nih rualpuite an nih takah chuan kan lo awt ve a ni; district hmasawanna turte a ni a. Kan la dawng kim lo av hamthatna hrang hrang han hmuh tur ang chi te kha. Thawktu lam pawh NULM staff kan la neih ve loh avangin hmalak a la harsa rih hle a. Khawpui thang mek kan ni a, UD & PA hnuaiah Town & Country Planning Wing atang hian Khawzawl leh Saitual tan master plan buaipui chhoh mek a ni a. Hnahthial khawpui master plan min tih sak ve thuai turin a changtu Minister kha kan ngen nghal duh bawk a.

Pu Speaker, vawiin chu i thuawih ka tum lutuk a, minute 10 chhunga khung zawh ka tumna lutuk lamah, a hun tha ber hmang nih kha vawiin chu kan tum ang a. A tawp berah chuan kan Minister-te pahnih - Pu K. Sapdanga leh Pu Lalthansanga te demand hi ka pawmpui a, House-ah hian pass ngei turin ka rawn thlawp a ni e. Ka lawm e.

HON. SPEAKER : A lawmawm e. Mamit Bialtu, Member zahawm tak Pu H. Lalzirliana ilo sawm ang.

PU H. LALZIRLIANA : Pu Speaker, ka lawm e. Vawiinah kan Minister zahawm takte pahnih demand kan sawiho theih avangin a lawmawm ka ti a. A hmasa berah chuan Home Department chungchang hi ka sawi duh a.

He department hi fak tlak a niin ka hria a. Vawiinah hian an manpower shortage hi tam tak a ni a; zawhna leh chhannah pawh khan kan hmuh tawh kha. Chuti chung chung chuan vawiinah hian tha takin an la function thei hi a lawmawm ka tih rualin, kan Finance Minister leh kan House Leader zahawm tak pawh hian recruitment hi ngaihpawimawh sak thei sela ka ti hle mai a. A chhan chu, kan hriat tak ang khan hmun tinah indaihlohna a awm a, department-ah indaihlohna a nasa hle a. Lengpui outpost pawh heng te avang hian kan la tan thei lo pakhat te pawh a ni a. Sorkar hmasa atang tawh khan Lengpui hi ka sawi fo a, a pawimawhna lai hi kan hre fuh tawk lo deuh em

aw, te ka ti a, kan hre tho mai thei a. Khualzinte lo luh khawmna a ni a, foreign tourist-te kan nei a, domestic tourist te, a khawtual mi pawh kan kal tamna hmun pawimawh, kan hmel lanna a ni bawk a.

Ka sawi fo angin, ‘infrastructure, emergency handle thei’ tih ang deuh khan police outpost hi a pawimawh tak zet zet a ni. A chheh vel outpost hnai ber chu Sairang a ni a. Dampa bial te, kan bial chung hmun thenkhat, khaw hrang hrang khuan Sairang an pan khawm thin a ni. A hla a, eng emaw emergency road accident te a lo awm a, a buaithlak em em a ni. Chuvangin, Lengpui outpost hi a rang thei ang bera function tir a nih theih nan recruitment te pawh hi han tihsak ni sela, tiin kan ngenpui a ni. Jail-a thawktute an indaih lo a, manpower lama an indaihlohna hi phuhruk theih ni sela, tih kha kanrawn ngenpui a ni e. IR chungchang te, jail chungchang te chu zawhnaah te khan kan zawt tawh a, kan la bawhzui zel ang a.

Soil Department, Pu Lalthansanga chan - Hmunphiah hi kan sawi thin a, a department changtu tak hnenah hian ka la sawi lo a. Zoram dung leh vanga hmunphiah chingtute pawh kha lo lungngai lo ula, vawiinah a changtu tak Minister a thleng chauh a ni. A demand windup-naah, ‘lo lungngai suh u, ka rawn ti fel dawn e’ a ti thut lo ang tih pawh a sawi theih loh. Kan hmunphiah hi phiah fai nan a tha a, han inkhawn lawlh nan te pawh a tha tho tih kan hriat tawh kha. Vawiinah hian Zoram dung leh vanga hmunphiah chingtute, kan Soil Department Minister zahawm tak hian an au thawm hi beng sikin han ngaihthlak sak leh sela, sum awm ang ang te pawh a hunlai a la ni a; sawhthing lei a la hun lo a, aieng lei a la hun bawk si lo a, vaibelchhe 110 kan dah kha lapse thei te chu ni se financial year a tawp dawn leh nghal a, a lapse mai te pawh a hlauhawm a. Engpawh ni se, a changtu tak, a thlenna tur dik tak chu, ‘vawiin hi a ni’ tih kha kan sawi duh a ni. Vawiin hian a changtu Minister hian kan Zoram dung leh vanga hmunphiah chingtute aurawl hi lo bengkhawn sela, tih kha ka’n ngen sak ni sela.

Environment & Forest-ah hian nichina member zahawm tak Pu Jeje Lalpekhlua’n a sawi ang khan, ka bial chung pawh hi affected area, a victim hi kan ni chiang khawp mai a. Forest clearance avang hian kan project lian tak tak 3 - 132 kV line, Bairabi to West Phaileng via Mamit te, NIT Lengpui te, Semen Boring Station, Vety Department, Lengpui te hi kan mu tan a ni. Department pahnih - P&E leh Environment Forest-te pawh high level thleng thlenga meeting te pawh kan han neiho thin a, solution siam tak hi a har khawp mai a; an lo bawhchhe ve deuh tawh bawk nen. Kan hriat angin project lianah hi chuan hei hi a ngai a ni, tih chiang takin hria ila. A department lam pawh hian mipuite leh department-ah te hian awareness campaign hi nei sela a thain ka hria a. A tawpah, thil tam tak tih tawh hnuah, ‘hei hi la tih loh; chuti zat chu rawn chhun a ngai’ tih hian min ti tangkhang em em a ni. Convergence te kan ti fo a, department leh department han thawhhona tur lai te pawh niin an lang a.

Vawiinah hian Forest Minister ka request duh chu, (a pawimawh lutuk) BRTF/BRO kawng, Dapchhuah to Tuipuibari, Rajiv Nagar, hei hi BRTF-in an thawk a, an zo deuh vek tawh a. RCC bridge hmun 3-4 velah an siam a, hmun khat phei chu all India project, kan Union Defence Minister Pu Rajnath Singha'n a hawn lai khan, keiin kan bial chhung a lo ni bawk a, BRTF hotute nen a hmunah ka hawn sak a. Zawh tawh sa, mahse approach kha Dampa Reserve Area chhung a ni tlat bawk si a, tlema han zau deuh ngai lai kha a awm a ni. An khawih ngam bawk si lo a, hei hi nakinah a hranpa te pawhin kan la sawi dun turah ngai ila. Bridge an zo tawh a, a approach lai, han kualna lai bawr khu hmun 2-3 khawih theih miah loh kan nei a ni. Hei hi BRTF/BRO hotute pawhin harsatna an tawk a, ka hnenah te pawh an rawn thlen ve cham chi a; chungte pawh chu min lo hriatsak turin tun hunah hian kan ngen ni sela.

Tichuan, UD&PA ah hian kan sawi duh chu, district office kan nei a; DUDO te hi an awm ve a ni deuh ber mai a, engmah financial power an nei lo a. Sing 5 man hna an department-ah hian thawk pawh ni sela, a bill Aizawl-ah tih vek a ngai a ni. hei hi financial power te pek ve theih ni sela a tha ngawt mai; eng emaw chin limitation te chu a awm teh meuh ang a. Amaherawhchu, an area chhung leh an jurisdiction chhunga han thawh pawh a bill zawng zawng Aizawl veka tlanpui ngai hian a ti khailak khawp mai a, cheng sing 4-5 man thawk tan chuan a kalkawng vel leh eng ilo ah khan an hlawkna tur pawh kha a ral vek zel a ni. Chuvangin, hei hi han thuam chak deuh te ni sela, tih te ka'n sawi duh a; bial zawng zawng, district zawng zawng aiawhin kan sawi a ni. District dang pawh chu chu an problem ve tho niin kan hria a. PMAY urban insak chungchanga installment dawn har lutuk hi, thingzai a mawih chhiat hman phah a, henge pawh hi chak zawka kalpui thei ni ta sela.

Tin, bial chhung han sawi lawk ka duh chu, sorkar hmasa khan Mamit GSA playground hi UD&PA ah nuai 300 min pe a. Kan han bei chho ngar ngar a, a tih tur ang zawng zawng chu kan han zo khat a; pavillion te, changing room te, fencing te, field leveling te, side drain te, retaining wall leh a gate te pawh kan zo thawkhat mai a. A grass phahna tur hi Mizoram-ah chuan a lian deuh ber pawl a ni a. Tunah hian field han zauh te kan han retain nasa bawk a, grass phah hi kan la hmabak a ni a. Chuvangin, UD&PA hmalakna a ni bawk a, han chhonzawm leh theih ni sela aw, tih hi kan duhthusam a ni; hmun hrang hrangah an phah tho bawk a. Hei hi kan hmabak la awm chhun a nih avangin khawngaihtakin UD&PA Minister hi min lo hriatsak turin ka'n ngen a ni e.

Vawiina demand kan sawite hi keipawhin ka pawmpui a, Zoram hmasawn nan hma tha taka an lak theihna tur ni sela, tih hi ka thuthusam leh ka duhpaina a ni e. Ka lawm e.

HON. SPEAKER : Tunah chuan, Tichang Bialtu, Member zahawm tak Pu W. Chhuanawma ilo sawm ang.

PU W. CHHUANAWMA: Pu Speaker, ka lawm e. Vawiina kan Demand sawiho tur hi a pawimawh hle mai a. Amaherawhchu, ka sawi thiam lo viau zel mai si a, kei hian; ka rilrua awm pawh ka sawi thiam thin lova. Engpawh ni se, ka thiam ang tawkin kan sawi ang a.

A hmasa berin Home hi han sawi ka duh a. Police-te hi kan ramah an indaih lo em em mai a, dan leh thupek kengkawh tu an ni a. Kan population tlem ngaihtuah hian crime rate hi a sang em em mai a, a khat tawkin *dan bawhchhiatna* han tih mai piah lama tual thahna emaw, thihna chhuichhuah hlei theihloh te hi a tam em em thin a ni. Chuvangin, dan leh thupek keng kawhtu hi an pawimawh em em a, kan thuam chak a ngai hlein ka hria a. Ramri vengtuah hian kan hmang nasain, border chu sawi loh India ram chhunga kan ramri ngei te pawh an veng a. *Entirman*: Ramri ah chuan kan buai ngei mai; Assam nena kan inrinna te pawh kan police ve vete hian an veng thin hi, thil chuangtlai a ni thei em, tih te pawh hi ngaihtuahna a thui hle a, engtianga solve chi nge ni ang, tih te ka ngaihtuah a ni.

Tichuan, bial chhungah a kai loh theih loh a. District thar te kan ni a, kum 5 zen zawn a ni ve tawh a. Khawzawl hi IR Battalion awmna a ni ve a, Saitual te, Khawzawl te, Champhai te'n an rin a ni a. Khawzawl IR battalion ah hian sanction post 920 a awm a, chutah chuan a thawk mek hi 478 chauh an ni. Chuvangin, a shortage hi 442 lai a nih avangin an mamawh belh a, mamawhna a sang em em ringawt mai a ni. Chuvangin, heng te hi engtia tih tur nge ni ang? Kan Minister zahawm tak Home changtu hian a ngaihtuahna han seng sela a lawmawm ngawt ang.

Tichuan SP - Superintendent of Police office ah te pawh Inspector kan nei loh avangin kan mamawh a. Tin, Sub-Inspector 3 leh Assistant Inspector 3 kan mamawh bawk a ni. Chutiang khawp chuan he district headquarters ah hian mamawhna a sang em em mai a ni. Chuvangin hei hi min ngaihtuhsak kan duh em em mai a ni.

A dawt lehah chuan UD&PA hi, Urban poverty hi rinaiin a lo nasa a, 'a ni em em dawn em ni' tih tur khawp hi Aizawl khawpui chhunga miretheite hi an lo rethei em em mai a. Nuamsa tak, mihausate karah hian miretheite, '*rethei*' han tih piah lamah hian an rethei a ni. Thingtlangah te chuan chul leh thlawhlai eng eng emawte bakah kawng kam rah leh tumbu ilo te pawhin mangan tawpah chuan a la intihpuar theih a, buhfai thlak tur awm tawh loh hnuah pawh a tawp khawkah chuan a la tih theih a ni; khawpui chhungah hi chuan hetiang hi a awm lova. Mirethei, han zirchian tak tak chuan he Kristian rama rethei, an rethei lutuk hi tah a chhuak takzet a ni. Chuvangin, helama poverty alleviation - *Urban poor* ah hian thahnem ngai lehzuala kal hi a pawimawhin ka hria a. Hei hi ka ngai pawimawh em em avangin han sawi ka duh a ni.

A dawt lehah chuan, Fisheries - Demand 35 hi, Minister Pu Lalthansanga chan a ni a. Sangha ah hian engti zia nge ni kan intodelh loh em em mai thin chu aw, ka ti a. Phailam sangha hi tunlai chu kan ei ngam lo a, dam rei te hi kan la duh ve si a; 'Formalin-a

injection a ni' tih, hmana a rawn than atang khan, phai sangha hi kan ei tha ngam lo a, Mizoram chhunga tuikhuah-sangha hi chu kan ei ve thin a ni. Khawthlangah khuan ka lo zin ngai lo khawp mai a, nikum hmasa khan khawthlang tawp - Kanhmun thlengin ka zu kal a; Sangha dil tur a va han tha hlawnm teh lul e aw; engatinnge heti chung hian sangha hi kan lo intodelh loh em em mai le, ka ti a. Kan dil-sangha te hi a lian lo thin lutuk te hi, keini mithiam ve lo tan chuan a dil thuk loh vang te nge ni ang a, a dil len tawk loh vang; engvang hi nge niang aw, te ka ti thin a. A sangha chi hi a lian chi a ni lo nge, tih phe chu ka hre hauh lo na chu, sangha a intodelh thei tur hi chu kan ni maw le. Chuvangin, Fisheries hi a sum pawh a tlem lo khawp mai a, hetah hian tan han la leh zual ila a tha awm mang e.

A dawt lehah chuan, Demand No. 41 - Sericulture chungchang hi kan session tawp lamah hian ka sawi tam ta hle mai a; handloom te, sericulture lam te hi. Silk leh cotton te hi kan Mizo puan bihah hian hmang thin a. Amaherawhchu, silk hi kan thar tlem em em mai a, a man a to bawk nen; cotton kan thar bawk lova. Tin, kan hmeichhiate puan bih hi cotton a ni lo tlangpui a, acrylic yarn a ni a. Hei hi 100% chemical awm a ni a, heng hi khawvelin an duh lo; cotton leh silk hi an duh a ni a. Kan Mizo hmeichhiate incheina zahawm ber chu *puan-bih* hi a ni a. Pathianni ah inkhawm tura kal reng rengin puan an bih lo ngai lo a ni. Chutianga puan bih hnam chu an ni. Kan hmeichhiate incheina zahawm ber leh mawi berah hian khawvela an duh ber chu, silk leh cotton hi a ni a, silk hi kan tharchhuah ve theih a ni. Chuvangin, Sericulture Deptt. hi kan bawhchak hle a ngai dawnin ka hria.

Hnam incheina, *eng hnam nge a nih* tih lanna ber chu, hmeichhiate incheina hi a ni awm e, ka ti thin a, puan an han bih hian Mizo an ni tih a hriat mai a, Hindu hmeichhia chu sari an han kaih hian a hriat mai a. Kan hnam nihna leh culture kengkawhtu hi chu hmeichhia hi an lo ni awm e. *Entirnan*: Japanese te pawh, *Kimono* an tih te hi Japan an nihna tilangtu a ni. Chuvangin, Sericulture hi a pawimawh em em a.

Kan bial bawkah lut leh ila. Tun hma chuan Khawzawl ah society te pawh a lo ding ve tawh a, chhungkaw 50 - 60 te'n pangang an khawi ve thin a ni. Amaherawhchu, a hralhna rate a chhe lutuk a, tihngaihna an hre thin lo a ni. A rei telh telh a, a zuih ral telh telh a, tunah hian chhungkaw 15 - 20 inkarin pangang an khawi thin a, Mulberry, Eri, Muga silk te an ni. Chung chu an duh na na ah an hralh theilo, department-ah lo chuan. Chuvangin, department kaltlanga chah a ni a; hei hi a tha ber em aw, ka ti a, ka ngaihtuahnaah chuan.

Thil reng reng, sumdawna, mimal ah te pawh, monopolise hi sumdawna a zau hleitheilo. Chuvangin department hian engtin emaw a tihdan chiah ka zu hrethiamlo, tihdan a awm em tih te hi ngaihtuah ila, a tha ka ti hle mai. Chuvangin heng kan han sawi te bakah demand zawng zawng te hi tha ka ti a, ka thlawp a ni tih ka sawi e.

Ka lawm e, Pu Speaker.

HON. SPEAKER : Lawngtlai West Bialtu, Member zahawm tak, Pu C. Ngunlianchung a ilo sawm ang.

PU C. NGUNLIANCHUNGA: Pu Speaker, ka lawm e. A pakhatnaah ka han sawi duh nghal chu, Demand No. 31- Fisheries Deptt. hi a ni a. Chawhma lamah khan ka zawhna a chhuak hman lo chiah chiah a; kan Minister zahawm takin min react nghal se ka duh a.

Ni 29 April, 2021-ah khan Ngengpui Sanctuary-ah Hmunnuam Nu, Hniang-hniangi saiin a chil hlum a, chu chu helaiiah hian term hmasa lam pawh khan ka zawt ve thin a; vawiinni thleng hian zangnadawmna la pek loh a niin ka hria a. Hei hi engnge a chhan aw ka ti a. Term hmasa lama min chhannaah khan, 'sanctuary chhunga an lo lut kha a buaithlak angreng khawp mai a', an ti a. Sanctuary kha hung a nih loh chuan, anni ho hi luiah te an kal ve thin a, khatah khan vanduai thlak takin Pi Hnianghniangi hi saiin a chil hlum a.

Tichuan, a pasal hi Wildlife Guard-ah lak ve deuh ni awm tak a ni a. Wildlife Guard ho hi an khawngaihthlak hlawm khawp mai a, Pu Speaker. An hlawh pawh hi thla 8-10 an la lo thin a. Central Scheme atanga lo kal a ni a, hei hi chhungkaw ingghahna atan a tlak loh khawp mai a, ₹10,000 leh tih emaw lek an hlawh a. *Entirnan:* Zangnadawmna a cash-a kan lo pe theilo a nih pawhin, a pasal tal hi PE-a dah sak theih dan awm sela. Maharashtra lamah chuan saiina a chilhlumte hian zangnadawmna lakh ₹25 Sorkarin a pe a ni. Keini Mizoram-ah hian kha kha tih a la awm ve tlat lo mai a, khawngaih takin kan Minister zahawm tak hian min react sak se, nakin a wind-up hunah, tih ka sawi duh a.

Tin, Ngengpui Sanctuary leh Phawngpui Tlang National Park te hi District Council area-a awm an nih angin District Council te nena Agreement siamin, 2018 kha a term tawp tur a ni a. Khami hnu khan extend leh niawm tak a ni a; engchen nge an extend chiah ka hre lo a. Hengte hi District Council-ah peklet tumna a awm em, tih kha min han react nghal bawk se ka duh khawp mai a.

Tichuan, Demand No. 16 - Home Deptt. hi, chawhma lama question chhannaah khan, Diltlang post kha emergency deuha dah mai ni ang khan sawi a ni a. Sorkar hmasa khan a dah a, an lawm khawp mai a, khawtlangin inluah tur te pawh an ngaihtuah sak a. Tikhan, khawtlang hruaitute pawh engmah inhrilhhriatna awm lo khan, a thawktu thleng thleng khan an hnuk haw mai a. Kan Minister zahawm tak hian, Beat office hi a lo awm tawh angin min dahlet sak leh hram thei ang em le? Hei pawh hi min react bawk se ka duh a.

Tin, Bungtlang South hi kan bial angah chuan khaw lian ber awm chhun a ni a; Block headquarters a ni a, BDO awmna a ni. Thal a lo ni a, nikum hmasaah pawh an kan vak

tawh kha; in 20 chuang a kang a, an khawngaihthlak khawp mai a. Hetah hian fire station min dah sak ve thei se, ropui tak a nih loh pawhin, eng emaw thil lo awm thutah khan, hei hi a awm chuan chhiatna thleng thei ah te min chhawk zangkhai thei dawn a ni. Chu chu min hriatsak se.

A pahnhnaah chuan, kan hriat angin jail hi Mizoram pumah, helaia Central Jail pawh hi ka hriat danah chuan, mi 400 vel tan theihna turah 900 vel an awm a ni. Kan ti hreawm lutuk deuh a. 'Jail hi inhremna tur a ni lo' tih Prison changtute'n an lo sawi tawh thin a; nungchang inzirtirna leh insiamthatna tura indahna a ni a. Tuna a dinhmunah chuan, a hmeichhia emaw, a mipa emaw pawh heti em ema kan mitangte an tawt lutuk hi an khawngaihthlak a ni. A lehlamah chuan ringtute kan ni a, suamhmang tawkte ang deuh khan anhmani duh vang pawh ni loin, tam tak hi chu tih palh, vanduai thil avanga jail luh ngai te an ni a. Hengte dinhmun en hian, Sorkar hian SASCI-atanga jail sakna tur pawisa dah a nih thu kan ngaithla a, a lawmawm ka ti a. Chutih rual chuan, ngaihsak deuh ni ta sela, heti lutuk lo deuhin, tih lai kha Pu Speaker, ka han rawt ve duh a.

Tin, Demand No. 30 - DM&R hi kan lo enkawl ve tawh kha a ni a. Kan enkawl ve lai kha chuan Session dawn hian silpauline hi kan pe thin a, a ruling leh ling lo pawh, Chief Minister leh Opposition MLA te pawh hi inang vek hian kan pe thin a ni. Khalaiah khan crore ₹18 kan nei thin a, SDRF-ah. Tunah chuan crore 52 te, 54 vel te a ni tawhin ka hria a. Kan Hei keini thingtlang bialtute phei chuan silpauline hi kan mamawh em em mai a; hei hi a tih leh dan awm thei thei se. Tunhma kha chuan a thlawna sem tawp a ni thin a. Kan hun ve lai khan, "A thlawn ngawt hi chu a fel lo e" tiin, a lian ₹200/-, a te ₹100/-in kan khulh tir ve thin a. Chu chu thingtlang bialtute tan a tangkai em em a ni, tih kha min han hriatsak se.

Tin, Lawngtlai L-3 kan tihah lei-tlahniam a awm a. District Council-a kan awm ve lai khan Central atangin project te kan siam a, 'Upgradation of Lawngtlai Town' tiin. Chutah chuan check-dam te kan siam a, eng emaw emaw chen kha chu a him a ni. Amaherawhchu, nikum lamah khan Starred Question-ah pawh ka zawt a, chhanna a chhuak tawh a. Mi eng emaw zat an in a chhia a, chumi a tan chuan pawisa pawh tam tak kan pe a ni. Hei hi DM&R lam atang hian min ngaihsak saka, a concept paper te pawh an pe tawh nge, ka hre chiah lo a; Sorkar hmasaah pawh khan ka buaipui tawh viau a. Khalai te pawh kha min han hriatsak se.

Tin, KMMTTP road kawngpui laih hian Civil Hospital thlang a ti min vak mai a, Civil Hospital tan pawh hlauhawm khawp a ni a. A hming deuh chauh hian company lam hian retaining wall ang deuh an siam ve a. Hei hi a pawimawh khawp mai a. Civil Hospital hi hetia a min zel chuan, Lawngtlai Civil Hospital hi a ral mai a hlauhawm a ni.

Tichuan, Demand No. 46 - UD&PA hi Congress sorkar lai khan (ti daih teh ang) khawpui nichina Chawngte Bialtu sawi ang khan, khawpui kawng eng emaw zat zauh a ni a, side-drain te, nala te pawh siam a ni a. Amaherawhchu, an hnu atang khan chuan ngaihsak a hlawh lo khawp mai a, term hmasaah pawh khan ka sawi tawh a. UD&PA hi Lawngtlai te, Siaha te, Chawngte te pawh *town* kan ni ve a, Aizawl khawpuiah hian kan in concentrate lutuk deuh em aw, ka ti a. Chuvang chuan, Lawngtlai te, Siaha te, Chawngte te pawh hi min hre tel ve se; kan sorkar hi mipui-sorkar a ni bawk a Sawlamah pawh mipui kan awm ve nual mai, tih hi min hriatsak se kan duh a ni.

Tichuan, Demand No. 33 - Land Resources, Soil & Water Conservation hi, Lawngtlai ah Division a awm ve a, a hmingin. A quarter pawh ni sela, han kal ula, director te an awm chuan kal se; khilai khi kan department office a ni a, 'division a ni' tih zahthlak tur khawp hian, UT hunlai a mi tawh kha a ni. Enkawl lohin ti khian a awm ngawih ngawih mai a. Tichuan, District Council khian a nei ve a; District Council-ah khian a pumin entrust mai se chuan thu dang a ni a. A hmingin a awm ve a, '*thi reng si, nung hmingpu*' tih ang deuh tlat a ni. A nung ngawr ngawr a ni. Hei hi kan Minister zahawm tak hian min hriatsak se ka duh khawp mai.

Pu Speaker, second 5 a la awm a, thil pakhat Fisheries chungchangah hian. Ka hma chiaha sawi Tuichang Bialtu khan, 'engatinge kan intodelh theih loh' a ti a. Kan intodelh theih lohna chu, kan system a dik lo a ni. Khawilaiah nge potential a awma, 'khawilaiah nge sangha dil siam theihna tur tha a awm' tih lam aiin, kan kalpui dan a dik loh avangin. Hei kan bial te, Tuichawng bial te, helaia Mamit lam kan hotute bial lam hi a potential area a ni, Fisheries-ah chuan. Ruling lam nih loh pheii chuan kan char vawng vawng ringawt mai a ni. Chuvang chuan, kan sorkar hian khawilai atangin nge sangha a thar theihna tur nia, tute nge sangha dil nei tha, tute nge sangha thar thei ang, tih hi; kan Minister-in a hmaa a chhannaah khan, 'party kan thliar dawn lo' a ti kha, lawmawm ka ti a. Kha kha a takin kalpui sela, chutichuan, Fisheries Department hian hma a sawn ve ka ring a ni. Pu Speaker, ka lawm e.

HON. SPEAKER : A hmang dik hle mai maw; a lawmawm e. Tunge han sawi leh le? Tuirial Bialtu, Member zahawm tak Pu K. Laldawngliana ilo sawm ang.

PU K. LALDAWNGLIANA: Pu Speaker, ka lawm e. Vawinah kan Minister zahawm tak tak pahnihte chan department 8 te demand sawiho thei tura hun tha kan nei hi ka lawm hle a ni. Minister zahawm tak Pu K. Sapdanga chan Demand No. 16 - Home Department hi han sawi hmasak ber ka duh a. Ram ralmuang leh zalenna tura tana hma latu depts. a ni a, hmasawna tur tam tak ka hmu a.

Hei, budget ka thliir vang vang a, nikum aia tun kum budget tamna hi crore ₹3379.95 a ni a. Hna lak tharna tur *salary*-ah pawh hian crore ₹1633.10 a awm a, *wages*-ah pawh hian Nuai ₹412.13 lai a awm hi a lawmawm hlein ka hria a. Mizoram Police hnuiaia

hnuarukhte hi, kan sawi ang khan 4,268 a awm a. Ka rilrua awm chu, Group C bikah hian post 3,528 a ruak a; hei hi a pawimawh ta lo bik viau em aw, ka ti deuh a, lo enchian deuh theih ni se a thain ka hre hle mai. Hnathawktu tur kan mamawh te lak belhna tur a awm teuh hi lawmawm ka ti hle a ni.

Jail hi kan sawi fo mai a; kan jail te hi siamthat an ngai a. A pawimawh zawka chu, 'jail-ah khan leng lo se' tih lam ai hian, tlem zawk tura hmalak hi a tulin ka hria a. Tam tak hi han bawhzui tur leh hmalak tur tih a ni a. Kan target lam zawk kha a tam lam ni lovin, jail tang titem tura hmalak a ngai a ni, tih kha ka sawi duh a.

Kan mamawh tak mai Homeguard hi Mizoram hnuaiah hian 1,235 an awm a, regular employee hi 76 chauh an awm a ni. Hei pawh hi lo en chian deuh a tha hle mai. Kan sawi fo angin kan unaute ralhlante hi an tam hle mai a; hman ni report kan dawnah khan, an zavaiin mi 42,576 lai an ni a. Hei hi nasa deuh hleka sorkar hian ngaihven deuh a va tul ve, tih kha kan sawilang tel duh bawk a ni.

Hei, kan mamawh viau mai chu, kan Chief Minister zahawm tak nena Chapchar Kut kan hman khan ka sawi tawh a. Aizawl-a Assam Rifles-te hi chhuak vat thei tura hmalakna lo awm tawh nikum September Ni 8,2023-a MoU sign tawh leh a lehkha pawh thehluh tawh kha an rawn la chhang lo a niin ka hria a. Hei hi chak zawka hmalak a tul hle mai. Hei hi an chhuah vat a tul hle a ni, tan lak kan mamawh hle a ni. Tin, silai license chungchang hi kan sawi fo thin a. Mamawh tam tak a awm avangin, ti tawp ringawt lovin an dilna te enchian deuha, a mamawh tak tak hi chu pek a va tul em, tih kha kan sawi lang tel duh bawk a ni.

Hei, hnamdang ILP chungchang hi online-a dil theiha tih kha a ni a. Amaherawhchu, hei hi uluk leh zuala zirchian a tul hle a. Bialchung sawi loh kha a ni a; ka bial chung a nih avang ni lovin, Mualvum IR Bn. Kawnpui ah hian sanction post 797 a awm laiin, tunah hian 457 chauh an awm a, 340 vel hnawhkhah loh a awm a. Heta an problem lian deuh chu, tunhma atangin MR bill leh TA/DA leiba hi kan la ngah khawp mai a, hei hi min lo chhinchhiah sak se ka duh bawk a ni.

Tichuan, Demand No. 46 - UD & PA Deptt. hi ka'n sawi lang tel leh duh a. Hei hi deptt. pawimawh tak mai a ni a, kum kalta ah khan hmasawna tam tak hmuh tur a awm a. Tun kum budget hi ka'n thlir vang vang a, nikum aia a tlemna hi a tam em em thung mai a, nuai ₹21,956.22 hian a tlahniam tawk mai a ni. State bikah pawh hian CSS tel lo hian nuai ₹1,837.97-in a tlahniam bawk a. Hei hi engnge a chhan leh a tum ka hre lo a.

Tichuan, Aizawl traffic jam hi kan sawi fo thin a. Sorkar hmasaah khan Aizawl - Sustainable Urban Transport Project kha engtia kalpui zel tur nge, tih te ka rilruah a awm deuh hlek a. Hei, PAHOSS hi sorkar hmasa a lo awm tawh, sum awm teuh kha tih

tawp tum a niin ka hria a. Hei hi Aizawl traffic jam tihziaawmna atan a project hi divert theih em, tih te kha ka rilruah chuan a awm a, chu chu ka'n sawi lang tel duh bawk a.

Tin, Laldenga Culture Centre sakna tur Aizawl Smart City atanga tih kha, kha kha chhunzawm tum a ni em, tih te ka rilruah a awm deuh bawk a. Tin, deptt. hnuaiiah Urban Local Body Grant te, LAD hnuaiia Rural Local Body Grant chungchang te hi la kawp kan awm em? Hmanni khan ka sawi tawh a, heng te hi a nihna ang rawta kan nih a pawimawh ka ti a. Thil lawmawm em em mai chu, Lunglei Municipal Council kan han dinah budget lian tham tak mai, hmasawmna tur an han dah hi lawmawm ka ti a, a aia changtlunga kal zel hi a tul hlein ka hria. Ka ngaihtuahna tithuitu erawh chu, hetia Lunglei Municipal Council a awm tawh si chuan, High Power Vice-Chairman hi a kalphunga awm zel tur a ni em, tih hi zir- chian deuh a tul mang e, tih kha kan sawi lang tel duh bawk a ni. Tin, Aizawl Master Plan thar siam mek hi a taka hman tangkai theih a ni dawn em; AMC in a neih mek nen hian a danglamna engnge awm, tih te pawh hi zirchian ni se.

Tin, Housing for All hi kan hmang tangkai khawp mai a, amaherawhchu, 1st installment chungchang hi zirchian deuh a tulin ka hria a. Ka bial te chuan hei hi an hmang tangkai khawp mai a; amaherawhchu, MLA fund-a pek belh ngai a tam ta riau mai a. Hei pawh hi a nihna tur anga kalpui a tha hle mai, tih kha ka sawi lang tel duh bawk a ni.

Tichuan, kan Minister zahawm tak Pu Lalthansanga chan, Demand No. 36 - Environment, Forest & Climate Change chungchang hi han sawi leh ka duh a. Ramngaw humhalh hi kan uar viau pawh a ngai a. Amaherawhchu, ka thlir ka thlir a, kan ram development daltu a awm em? Project lian, forest clearance la pek fel theih si loh kha hectare 2,02,526 a awmin ka hria a. Khangte kha zir chian deuh a tul mang e, tih kha ka sawilang tel duh bawk a ni.

Tin, JAICA project lian tham deuh kha kalpui chhunzawm zel a ni em, tih te leh tuihna humhalh chungchang te kha ka sawilang tel leh duh bawk a. Hei, Environment Forest, department lian tak ni thin khan tun tum chu boruak tha te leh kan mamawh ang hian he department hi kalpui kan tum ta lo nge, an budget nikum aia a tlemna hi nuai ₹2119.05 a ni. Hei hi RE lamah a tul a nih chuan tih tur pawh a ni mai thei e; uluk lehzuala tih erawh a tul hle a ni. Tin, kan Sahuan te enkawl that deuh hlek a ngai a, kan Minister leh a department te pawh hian hei hi an enzui deuh a tha hle mai.

Demand No. 35 - Fishery Deptt. hi kan sawi fo thin a. Taksa hriselna lamah BP sang te, damlo natna chi hrang hrang neite pawh hian sangha hi chu kan ngeih vek mai a, a tha tlat mai a ni. Chuvang chuan, sangha hi intodelh a ngai a, intodelh thei tur hian hma pawh kan lak a tul hlein ka hria a. Nikum pawh khan kan thar tam viau mai a, hei aia tam hi a thar theih a; intodelh thei tur hian hma a lak theih a ni. A chhan chu, sangha chingtute tan sangha dil tanpuina 50% subsidy pek a ni a. Nichin khan thenkhat pawhin

an rawn sawi tawh a, a nih tur takah hian hmanhng ila chuan intodelh thei kan ni. Chuvang chuan, deptt. hotute leh kan Minister te pawhin a aia uluk leh zuala kan enkawl chuan, hengah hian intodelh thei kan ni, tih kha ka'n sawilang tel duh bawk a. Amaherawhchu, ram pawn atanga lo lut hi chhinchhiahna mumal kan nein ka hre lova. A checkgate hi Vairengte ah nge ram ri-ah te hian awm ve ta sela, sangha thianghlim leh thianghlim lo thlitfimna atan pawh hian a tha hrim hrimin a. Tichuan, Mizoram-a sangha dil siam tawh zat hi record kan hmuhah hian, hectare 5,758.54 lai a ni, tih kha ka sawilang tel duh bawk a ni.

Tin, BMMS scheme hnuaiah hian project approve tawh a awm a. He project hi sanction tawh a nih chuan, hei hi sangha dil te, sangha note siamna tur te, sangha note vulh lenna tura tan te a ni a. Tin, vur siamna khawl ice-plant te, sangha phurhna tur motor te, two-wheeler motor te khatiang atan a ni a. A lo hlawhtlina, a nihna ang taka kan hman theih chuan, kan ram hi sangha-a kan intodelh ka beisei a ni, tih kha ka sawilang tel duh bawk a ni.

Aw le, Pu Speaker, Demand No. 41 - Sericulture hi ka'n sawi ve hram teh ang, hun a la awm bawk a. Hei, *Muga* kan tih hi, Cooperative Society ah hian kan lo awm rei ve a; Serifed te nen hian Sericulture hi a inzawm thin a, eng emaw chen kha chu harsatna an tawh a. Tunah erawh hi chuan Sesawng hmuna Serifed ramah te hian beneficiary-te development nasa tak hmuh tur a awm dawn a, hma an la mek a ni tih ka hria a, a lawmawm hle a ni.

Amaherawhchu, budget ka thlir vang vang a, hmasawanna thang tura kan beisei lain kan budget ah hian nikum ai hian nuai ₹50.15 in a tlem leh tlai mai a ni. Chuvang chuan, RE atangin emaw ngaihven a tul hle a ni, tih kha ka sawilang tel duh bawk a ni.

Tichuan, kan Minister zahawm tak takte pahnih department chan, a vaiin demand pariat te hi tha ka ti a. Ram tan chhenfakawm tak leh tak taka hman a nih theihna turin ka rawn thlawp a ni e. Ka lawm e.

HON. SPEAKER : A lawmawm e. Tunge sawi leh ang le? Nge, pass kan dil tir tawh mai dawn em ni ang? Aw, Hachhek Bialtu, Member zahawm tak Pu Robert Romawia Royte ilo sawm ang.

PU ROBERT ROMAWIA ROYTE: Pu Speaker, ka lawm e. Pu Speaker, I dinglam atang khan kan member-pui pakhat khan, "recess room ah ka sawi ang a, ka sawi zawhah I rawn sawi dawn nia", a ti a, ka'n nghak deuh a; a lo la lut rih lo a nihawm hi maw. Engpawh nise, hei, vawiinah Minister zahawm tak tak pahnihte demand, deptt. pariat budget kan han sawiho thei hi a lawmawm hlein ka hria a.

A hmasa berah chuan Home Deptt. chungchang hi tawitein sawi ka duh deuh a. Kan hriat angin Home Deptt. te a lenzia leh pawimawhna tam tak an neih dan te sawi thui ngai lovin kan hre vek a. Tawite ka sawi duh erawh chu, kan police te, a bik takin Daido leh ramri area-a awmte, tin, state danga han awm ang chi te an fakawm hle thinin ka hria a. Assam lama awmte pawh khu Nagaland lama hna kan thawh laite khan kan kaltlangna lai kawng area ah te an awm thin a, kan in hmu fo a; a area te tana charity activity an han nei thin te hi fak an hlawh em em a ni, tih hi ka sawi tel duh a. Tin, Bairabi te, Thingmun te, Kanmun te leh hmun dang dang, hmun kilkhawr tak tak New Kawnpui te, facilities pawh awm mang hlei lovin kan police te an awm a, an chhuanawm hle thin a ni.

Nimin lam khan ‘chaw ei man pek loh’ tih te kha kan sawi deuh a, ka’n insawithei ve deuh ang a. Ka kal kual velna ah hian police duty-te hi chawhmeh ka suah thin a; ka zin dawn hi chuan, ‘Pu RR-a hian chawhmeh min suah leh ngei ang’, ti hian uisa ei turah te hian an lo inngai thin a ni. Ka’n insawithei ve lawk a nih chu. Engpawh ni se, police-te an fakawm a. Assam nena kan buai chungchangah kan police te avanga kan hmingthat zia te a lawmawmin ka hria a. Kan inkah vak hnu khan Union Minister, kan official pakhat nen a inah kan zuk hmu a, chungah te pawh chuan min ngaihsan phahin ka hria, ti mai ila, sawi chhawn leh lohah, off record ah ka’n sawi ang a, a in record tho turah te pawh ngai ila, a pawl chuang lovah ngai ila; kan pulum rawn luahlan kha chu kan kap lo thei lo a ni, tih kha ka tanfung a ni a. Khangah te khan kan police rorelna fel zia te, kan Home Deptt. that zia te a takin kan hmu a. India ram pum huapin kan hmingthanpui a, kan hmingthatpui a ni; a thia te kan tuarpui lo tihna ni lovin, tih kha ka sawi duh a ni.

Tin, Supplementary Demand Bu, phok 44-na kan en chuan, supplementary demand ah hian Home Deptt. hian crore ₹50 (nuai ₹5,000) lai mai kan han nei dawn a. Kan Home Minister zahawm tak pawh sorkar tharah nuai ₹5,000 chuang rochunin a’n awm thei hi ka congratulate duh a. SASCI-V an ti a, a Part I hi chu kan hre khawp mai a, allocation awm sa a ni a, kan state ta tura amount dah sa a ni a. Kan sorkar hmasa hun laia kan minister-te, kan official ten Part V atanga nuai ₹5,000 lai mai an lo tichhuak hi, official te leh kan hotu hmasate an fakawm hlein ka hria a. Tin, kan Home Minister thar pawhin phur takin a chhonzawm a, open tender te chhuahin, contractor-te pawh an thlang chho mek niin ka hria a, an zavaiin vawiinah hian fak tlak an niin ka hria a. Open tender kan chhuahah hian L1, a rate hniam ber hi kan thlang ang em, nge chhuanlam fahrah te te hmangan a rawng eng lam hi kan thlang leh si ang em, tih erawh hi chu kan lo thlir ve ran dawn a ni. Tin, hei hian danglamna tam tak a thlen ka ring a. SASCI-V atanga sum la chhuak thei ngat, Home Deptt. hi an fakawm a ni tih kha ka sawi duh a ni. Merit base-a heng project hi sanction a ni a, state insem ve mai ang chi kha a ni lova.

Tin, helaia kan sawihona boruak hmasa lamah khan kan Chief Minister hmasa ina Myanmar lam atanga kan unau raltlante puihna atan khan *out of the way* deuh hlek te pawh a ni mai thei e; ‘crore 3 (cheng nuai ₹300) min pe’ a tih kha, zawi tein a sawi se

se thin a. Engpawh ni se, helai kan House ngei ah pawh kan House Leader leh kan Home Minister pawhin “nuai ₹300 raltlante tanpuina kan hmu a’ an ti a, ‘a hmanna erawh chu kan hre lo’, an han ti tel hram thin lai kha. Sorkar hnu hi chuan tawngkam hi firmkhur hret a tha em aw, tih kha a awm a.

Pu Speaker, i phalnain, kan sorkar document pawimawh takah hian kha nuai 300 kha SIB kaltlangin nge kan hmuh ka hre chiah lova, a hmanna hi chu detail tak mai hian a lo awm a; hei hi, ‘sorkarin a hre lo’ han tih emaw, ‘department lam pawhin a hre lo’ tih emaw tawngkam hmang tur hian tlema fimkhur deuh hi a tha em aw, tih kha rilruah a rawn lang a. Kha nuai ₹300 kha Deputy Commissioner te kaltlangin hman tangkai a nih hmel e, tih kha ka’n sawi duh a ni.

Tin, a dawt lehah chuan, UD & PA Department chungchang hi tawitein ka’n sawi lang leh duh bawk a, lawmthu te pawh ka’n sawi duh a. UD & PA department hian tunhma atang tawhin kan Sports Minister hmasa (UD & PA Minister ni bawk) Pu Zodintluanga Ralte, a hming te pawh han sawi ri ila, khang hun lai atang khan Sports facilities thalaite’na kan mamawh em em, keini sports ngaisang chi te pawh kan lo ni ve a, kan lo lawmna thin chu UD & PA Department-ina sports facilities tha tak tak Sports Department lam atanga tih mai theih loh ang chi te min lo tihsak thin a, kha Sports-loving fraternity hrim hrim hi kan lawm thin a. Sorkar liam ta Congress sorkar laia UD & PA Department Minister-ina theih tawp a chhuah ang tho khan kan UD & PA Minister kan Deputy CM zahawm tak khan Sports leh Allied facilities siamna kawngah rilru zau leh thui tak puin Sports facilities tha tak tak UD & PA Department-in a siam a, direct-in a ma hova UD&PA siam te pawh a awm a, tin, Aizawl Smart City kaltlanga siam te a awm bawk a. Chunga avang chuan, tunah la zo vek lo mah se, tournament te pawh zing zawk leh kan duh angin, football lamah pheih chuan kan han siam thei tan lek lek tawh a, kan la zo vek lo na a.

Helaia ka sawi duh, football bik hi; hei hi kan hriat lam leh kan tuina lam te pawh a ni a. Football ah hian, ‘football size hi tam tak a awm a ni’ tih hi he House zahawm tak hian kan hriat a ngai a. Pu Speaker, i phalnain - FIFA hian Laws of the Game, 2023-24 (hei a thar ber a ni a) ah pawh hian chiang takin a hma zawka a sawi ang tho khan, ‘football field hi chu a rawng a hring ngei ngei tur a ni’ tih te hi chu kan hre vekin ka hria; ‘football field rawng hring lo hi FIFA hian a approve thei lo’ tih te kha kan hriat hrim hrim a pawimawh a. A size chungchang pawh hi chiang takin a sawi a – *‘A vang hi 45 meters aia te a ni tur a ni lova, a dung hi 90 meters aia te a ni tur a ni lova. Tin, a len zawng hi 120 meters aia te a ni tur a ni lova A avang hi 90 meters aia lian a ni tur a ni lo a ni’* tih hi, FIFA Laws of the Game ah hian a inziak a. Chuvang chuan, FIFA standard hi a tam khawp mai, Football bikah hian. A chhan pawh tam tak a awm a, hei hi in debate leh workshop te pawh an neih fona a ni a. Hei hi tuna a thar ber a ni a.

Tin, international match bikah hian prescribed size a awm leh a, International match hi sawifiah a ngai lovang chu maw - Hetah hian a minimum size chu 64 meters a ni tur a ni a, a vang hi a lian berah 75 meters a ni tur a ni a. Tin, a maximum-ah chuan, a dung 110 meters a ni tur a ni. K'an sawi tum chu, football hi table tennis te, badminton te ang a ni lova; badminton game ah hian size khat chiah a awm a, table tennis ah pawh size khat chiah a awm a; football ah erawh chuan size tam tak a awm a ni. Chuvang chuan, he lai size-a hi a area azirin, duh anga lian a nih chiah loh pawhin FIFA standard hian siam thin a ni a. Sorkar hmasa hun lai khan kha kha UD & PA lam te'n helaiah hian FIFA standard conform tura theih tawp an chhuahna kha kan appreciate thiam a tha pawhin ka hria a. Chutih mek lai erawh chuan, hei, kan hriatthiam ngai leh chu - Edenthar football ground a zatve deuhthaw siam belh a ni a; a tir chuan a te a ni. Constituency tinah dah tum a nih avang khan, Aizawl North-III ah chuan field nei theihna awm chhun pawh a ni deuh a. Lengpui lama Sport Council-in kan siam kha a size chu a lian khawp mai a; nuai ₹500/- a ni a, *Khelo India* rate angin. "Edenthar-ah nuai ₹800 leh tih a ni a, a size khu a te si a", tih laia kha, UD&PA khan mi rinhleh te kha a kai ang tih ka hlau khawp mai a.

Ka'n bel chiang ve a, non-field item hi 13 lai an lo siam a, UD&PA hian an priority hi field ringawt a ni lova, field leh a chheh vel, Smart City Project a nih angin, parking leh thil dang tam tak kha an priority te pawh a nih telve avangin leh, a location te pawh uluk taka thlan a nih avangin field lian saa va phah ringawt nen khan a inang lova. A field item ah hi chuan sum hi a tlem khawp mai a, nuai ₹200 pawh a tling lovin ka hria a. A chhan chu, phullem phah hi metre-wise a tender chhuah thin a ni a. A metre kha a tlem miao chuan, a rate kha a tlem dawn niawm tak a ni. Tin, UD & PA ina an sak hi, north-east state hrang hranga an rate te pawh ka'n en a, ka theih ang angin; 'North East State dang zawng zawng aian an rate hi a hniam bawk a ni' tih kha ka'n sawi lang ve duh bawk a ni.

Tichuan, hei Pu Speaker, minute hnih-khat lek min pek belh la, Forests chungchang hi sawi ka duh a. Khawthlang lamah khuan Langkaih te, Tlawng te, Teirei te, khawthlang balu khu Mizoram hmun tinah kan duh dan a ni zel tawh a; building tha deuh sak duh chuan, '*Langkaih Balu ngei*' tih a ni zel tawh a. Hetih lai hian Forests lam atang hian harassment kan ti dawn nge ni; an dan kenkawh chu a ni ve tho ang a, balu latute engtin emaw han tihbuai a, "lo chawl lawk rawh u", tih ang te kha a tam khawp mai a. Helai hi Forests Minister zahawm tak hian hriatthiamna dan mumal tak te, permit mumal tak te kan la neih hma hian, Zoram mamawh a ni si a, khulaia balu latute'n a an lak loh chuan, kan mamawh kan chan vek a ni bawk si a; hriatthiamna nena en rih hi kan ram tan a pawh tur a nih loh chuan, a va tha em!

Chutih mek lai chuan, Geology & Mining hian Dan fel tak an lo nei a, he danah hi tunge implement tu tur, tih hi a lo la awm chiah lo a ni mai thei a. He Dan implement tu tur te hi kan tihchiana, hemi kan hand fund, *Monitory Guidelines for Sand Minings, 2020*

Assembly question-a ka zawhna ah pawh khan a awm a. Heng te hi Forests Deptt. hi a implement tu tur a ni em; nge, Geology & Mining zawk hi? Tin, Forests hi chu an bang theih chiah chuang lovin ka ring a, a chhan chu, riverine forest leh forest area a nihna laite pawh a awm a. Helaiah hian kan ram tana tha tura rorel mai hi a tha ang a, tih kha ka'n sawi theih tawh a ni e.

Aw le, Pu Speaker, Fisheries chungchang hi tawite tak takin. Hei, sangha vulhtu leh sangha-a eizawn hi kan sum hnar te pawh a ni a, keini kan chhungkua chuan. Helai hi a pawimawh khawp mai a, duh ang chuan kan la ti tak tak thei lo na a. Sangha hi Mizoram kan intodelh theihna tur item niin ka hria a. Chuvangin, budget tam zawk te pawh pek belha, RE lamah te emaw tan kan lak tlan a va tul em, tih kha ka'n sawilang duh bawh a ni.

Aw le, Pu Speaker, kan Minister zahawm tak takte pahnih demand hi ka thlawp a, duhsakna pawh ka'n hlan a ni e. Ka lawm e.

HON. SPEAKER : Tunah chuan, Aizawl West I Bialtu, Member zahawm tak Pu TBC Lalvenchhunga ilo sawm ang.

PU TBC LALVENCHHUNGA: Pu Speaker, ka lawm e. Vawiinnia kan Minister pahnihte - Pu K. Sapdanga chan department palite demand, avaiin ₹12,74,96,76,000/- leh Pu Lalthansanga kan Minister demand ₹196,80,54,000 te sawihona a ngaihnaawm a. Department a tam deuh a, hun kan inren tlangpui a; duh angin kan sawi hleitheih hlawm lova. Chuvangin, a department mal mal ang chuan ka rawn thlur lo mai ang a.

Ka ngaihpawimawh zual deuh deuh, a sum leh paih chuan vawiina kan demand pariat tlingkhawm hi budget pumpuia 10% aia tlema tam deuh hret a ni a, tlema han tam leh tlem a awm a, heng tlemna hi chu a beitham em em a, thil thar em em hmuh tur a awm lova.

DP & AR-ah hian kan ram hnarkaitu, he sorkar thar lo piang inngahna lian tak mai a ni a. Budget a tlem kan ti deuh maithei a, amaherawhchu, sorkar kal ta te hmalakna awm sa leh hmalak belhchhahna tur dungzuia kan hmachhawpte tun dinhmunah chuan *Mipui-aw* te tikhan han release a ni tawh a. Tin, e-PAR te, e-Leave te leh Digital File Tracking system te kan han siam chho mek a. Lang tlang, efficient zawk bawh sia tih theihna tam taka hma kan lak mek lai hian, hmachhawp a la tam hlein ka hria a, he Department atang hian. Department sawi khawmte kan sawi thin a, central lama kan line ministry te nena helaia inmil zawk tih te kan sawi thin a, hei hi uluk leh zuala kan bawhzui chhoh thuai thuai loh chuan, Ministry hrang a lo niha, Head of Deptt. hrang a lo nih tawh chinah hian ka chanpual tihna hi a awm thin a, inter-cadre rivalry te a lo awm thin a. A Deptt-ah te pawh, a Ministry-ah te pawh, line-ah te pawh a ni ang,

harsatna neuh neuh te siamin hmasawna tur tam tak hi min tikhaihlak em aw, tih theih tur hian a la awm fo mai a.

Chumi piah lamah chuan Deptt. 40 chuang han enkawl hi keini ang state-ah chuan kan zo lo lek lek te'n a hriat a. Kan demand 35 te, 41 te vawiin kan han sawi mek ang chite pawh vaibelchhe 10 em pawh tling mang lo, salary-a 90% dawn kal, deptt. kan neih neuh neuh hote kal khawm dan tura rilru leh ruahmanna lo awm ang chi te kha ngaihtuahnaah a kal thui viau mai a. He Administrative Reforms hian ka rilru, ka lung a len deuh ber a, vawiina kan Demand sawi ho ah hian; hmalak dan tur pawh ngaihtuahna a tilian hlein ka hria a.

A dawt lehah chuan, Home Ministry hi kan sawi nasa a, state ralmuang ber kan nih kan chhuang thin a, a lawmawm a. Chutih rual erawh chuan report hrang hrangte kan en chuan, ralmuang lo chi ziazang pawh hi kan ni chiah lo a. UN duh dan te phei chuan mipui nuai khatah Police 230 vel awm tura ngaih a ni a. India ramah hian 240 vel kan awm a, Mizoram ah hian India ramah kan sang filawr lak a, mipui nuai khat zelah, sanction ang phei chuan fill up ila 960 vel Police kan nei dawn a ni. India ram state zawng zawnga ralmuang lo zawkte aia let hnih vela tam Police kan nei dawn tihna a ni a.

Chutih mek lai erawh chuan, kan deployment kan hman dan leh an nature of duty te erawh thum that an ngai nasa em em tih te chu a lang reng a. Modernization of Police Forces hnuai ringawtah pawh hian nuai ₹7,000 dawn tun kum 10 chhung hian kan dawng a, heng kan hmanna hrang hrangte thlir kir leh te, tin, tunah phei chuan SASCI part-IV atang te pawhin vaibelchhe ₹50 (nuai 5,000) zet mai kan han hmuh belh leh bawk a. An welfare atan te, tin kan Home Minister zahawm tak khan chawhma lamah khan ka zawhna chhangin, Rifles Allowance te pawh han tihpun a ni bawk a. An Police Welfare te kan ngaihtuah a, an lirthei ken kual dan tur te, an chenna inte kan ngaihtuah em em rualin, tam taka lang ta reng chu, central-in min phalsak tak tih vanga IR Battalion nga ngawt kan han nei te; vawiina kan tlem a, khang zawng zawng kha vacancy-ah kan puang zel dawn a nih chuan state ralmuang ber, state ralmuang lo ber te aia Police mamawh tam let hnih chuang kan ni dawn tihna a ni a; hei erawh hi chu ngaihtuahnaah mipuite pawh hian nei ila ka duh a. Kan mamawh bak Police kan nei emaw tih mai tur a ni a, kan ram kalphung leh kan terrain te chu a inang lo teh meuh mai.

Chutih rual erawh chuan, rationalise deuh hlek, mumal taka ngaihtuahna kan sena, kan Police Force te an moral ti up tur zawngin an facilities te, an accommodation te, an office te, an conveyance zawng zawngte ngaihtuahnaah seng zawk ta ila. Chungah chuan lirthei chungchang te pawh kan sawi a, kha, a lang reng mai a. Headquarters office lamah chuan lirthei kan nei nalh tlangpui deuh vek a ni; MLA, Minister te pawh

a ni vek ang. Amaherawhchu, a mamawhna hmunah tlan hlei thei lo kan hnawl tun erawh hi chu ennawn a ngai viau tih chu a lang a.

A dawt lehah chuan, he Home Deptt. hnuaiah hian; ka bial chhung te a ni bawk a, tawite kan sawi ve ang a. Home Guard Volunteer hi sang chuang fe kan nei a, regular employees chu 100 pawh kan nei tling lo a. Heng mite hi Supreme Court Judgement ang khan 19,900/- lawmman te chu kan han pe ve bawk a, mahse khang volunteers te kha nimina thawk leh kum 25 hma lama thawk tawhte an hlawh a inang reng mai a; seniority siamsak an la ni lo fo mai hi ngaihtuah ngai hlein a hriat a.

A dawt lehah chuan, heta Administrative Reforms zinga tel ni awm tak mai, anmahni lo inenkawl vena tura state sorkar berin Employment Provident Fund Organisation atanga leh Ministry of Labour atanga kan lehkha dawnte ngaihtuah chuan, state sorkar berin Dan kan la bawhchhia a, an hamthat vena tur Provident Fund tak ngial pawh kan lo la tan sak thei lo te, hengte hi kuminah chuan ngaihtuah a ngai hlein ka hria a.

Tin, a dawt lehah chuan, Home Deptt. hi; Mizoram Private Replacement Agency Act, 2015 Rules kan neih kha, hei hi mak ka tih deuh mai chu, Inter-state Migrant Workers hi, Regulation of Employment and Condition of Services hi 1979 Act hnuaiah hian Mizoram sorkar hian 2005 khan Rules kan nei sa reng a, he Private Replacement Agency Act kan neih hi tute emaw hum nan leh tute emaw eizawna siamsak tumna ni awm tak maiin '*Beyond the boundaries of Mizoram*' tih ringawt maiin clause kan han dahpui a, hei hi a rang lama ennawn chi niin a lang a. Hengte avang hian domestic workers, oversees-a kan thawn kan thalai rual tam takte eizawna a siam rualin, tum tam tak harsatna tawh tunhnai lawkah pawh kan hre chamchi ang a, 2012-13 phei kha chuan kei pawh Singapore lam atanga hruai hawn ka nei ve a; karawn buaipui a, Mumbai-a ka awm lai a ni a, kan buai hle mai a.

Ministry of Manpower, Singapore te nen tikhan heta kan Mizo Research bei lai, (tunah phei chuan kan sorkarah hian a thawk ta a,) khangte nen inbe pawpin harassment nasa tak tawkin, a employer fuh lote kan buaipui tawh a. Khatiang hnu leh zelah te pawh Facebook lamah te pawh ka lo ziak ka lo ziak tawh thin a, 2016-17 ah te, 2014-ah te pawh ka lo ziak tawh a; he Dan hi en nawn ngai tak a ni a. Recruitment agents te hi keimahni Ministry of Overseas, Indian Affairs hnuaiah hian ₹25,000/- chauh a ni a, thil har em em pawh a ni lova; heng guidelines lakluh theih reng kan thuneihna pawh ni lo thila inpek hi nakin leh zela ₹5,000 leh security deposit nuai ₹1 hmanga heta kan Police-ah leh Municipal hnuaia va in-register ringawt avanga placement agent emaw inti ta te, dan lo anga kan thalaite tam tak hruai chhuaktute hi vawiin niah hian a chhanhimtu kan ni thei a ni, tih kha ka han sawi leh duh a.

Sawi tur a tam mai a, mahse hun bawhpelh loh kha kan ti si a. A next-ah ka'n kal leh law law ang a. Environment, Forests & Climate Change-ah hian.

Sustainable Development tih hi kan sawi uar a. Tin, kan policy reng rengah hian ‘sustainable a ni tur a ni’ tih hi a ni a. ZPM Policy-ah te pawh khan *Sustainable Development & Reform Policy* a ni a, khatih lai mek, a tira kan policy kan hrual mum lai khan Environmental Policy hi kan lo nei hauh lo mai a. Kum khat dawna kan inpeih hma ai khanin kan han bei leh kha a ni a, a lawmawm em em mai a. Thangtharte kan thangharh nasa em em mai a, *activism* te’n min hruai nasa a. Chutih rual erawh chuan, kan rama hmasawna awm ve turah min tithuanawp nasa em em mai a. Hetiang kawngah hian tuna Godavarman Case te kan han ti leh a, tunah Forest Conservation Act Amendment, 2023 te pawh kan State Assembly-in resolution kan la pawm ve si lo baw a. Forest Conservation Act 1980 kha kan hmang thei chuang baw si lo a, repeal a ni baw si a; Forest dan nei miah loin tunah hian kan State sorkar hi kan awm mek a ni tih pawh a lang a.

Chungte chuan ngaihtuah tithui em emtu leh NIT te, National Highways-ah te, 132 kV line Phaileng lamah leh Hnahthial lamah te, he forest dan avanga thingkung 100-150 kih har em em tithue hianin buaithlak deuh maia chu, tunah hian kan fund hi (ka hriat sual loh chuan) crore ₹200 dawn kan la nei a ni. 2019-a an rawn release kha Suspense Account ami, kan lo thlir ve reng thin a, “Sorkar-in engtin nge a hman?” an ti a, kan RTI thin a. Crore heti zat la nei chung sia *Plantation of Trees* ringawta Mizoram Compensatory Afforestation atan kan han hmang hi a lungchhiatthlak pawh hi ka ti a. Crore 20-30 dawn *Plantation of Trees*-a kan han hmang ve ringawt mai leh, hemi hnuaiah hian kan ram va hauh ve hauh loh Land Revenue & Settlement te nen pawha tih theih reng si hmalakna kan neih loh, tunhnua CA bik leh NPV beisei vang ngawr ngawr emaw tih mai theih tura kan han inchuh chiam mai te hi a zahthlak pawh ka ti a.

Kan ram hmasawna min tithuanawp a, kan sum hmuh ve ang ang te hmang leh thei lo te; tin, tuna NIT te phe chu penal interest zawng zawng nen min lo la charge ta leh nghal a, heng ang chi zawng zawngah hian huai taka Mizo mipuite pawh hian kan kalpui ngam a ngai a. Godavarman case anga kan ram, kan forest hi definition clarity kan hman dawn phe chuan 85% forests kan neih, chutiangah chuan engtikah mah kan ram hian hma a sawn dawn lova, kan sum neih ve ang chhun chhun te compensation leh Net Present Value-ah Forest-in min ei ralsak ang.

Kum 20 chhunga Mizoram Forests & Environment Department hian an hnathawh hi kan thlir a ngai. Chu chu, vawiin nia an hnena, an kuta sum awm reng pawh an la hman hleih theih loh crore ₹200/- dawn kan la kawl reng ang chi te hi, a hmanna dik tak zawk hi an ngaihtuah a ngai a. He kan forests re-forest leh tur te, kan forest slope-plantation te, heng zawng zawng te a hmanna tur tam tak guidelines awm kan hman chuan si loh te hi; he Forest Department hian hruaitu thar/minister thar, mi tha kan nei baw a, awmze nei zawka kan sum neih sa Central atanga hai chhuah ngai pawh ni tawh lo, kan account-a awm sa hman ngaihna pawh kan hriat tawh loh 25% hi hman phalsak kan ni; kan principle amount atangin 1% pawh kan hmang pha lo a ni. Chutiang chu kan kum

tin kal dan a ni a, Forest Department hian hna kan thawk tlem hle a ni, tih hi vawiin niah hian Zoram mipuite hmaah ka han sawi duh a. A conservation satliah ni lovin mipui hamthatna tur development hamper tura mi tibuai tur hrim hrim atang ni lovin, mipuite thawhpua, awmze neia he Forest Conservation-a hi kan ram hmasawna tur dal si lo hian a kalpui theih ka ring a, chu chu mipuite hmaah ka rawn sawi duh bawk a ni.

Hun ka pel ta e. Pu Speaker, hun tawite chhungin kha kha ka rawn sawi theih ni sela. Vawiina kan Minister zahawm tak takte pahnih - Pu K. Sapdanga chan Demand Nos. 13, 16, 30, 46 leh Pu Lalthansanga chan Demand Nos. 33, 35, 36, 41 te hi tangkai taka hman a nih theih nan, he House-a pass atan ka rawn thlawp a ni e. Ka lawm e.

HON. SPEAKER : Aw le, East Tuipui Bialtu, Member zahawm tak Pu Ramthanmawia ilo sawm ang.

PU RAMTHANMAWIA : Pu Speaker, ka lawm e. Hei, vawiinah kan Minister zahawmtak te pahnih - Pu K. Sapdanga leh Pu Lalthansanga te demand kan sawiho thei hi a lawmawm ka ti hle mai a. A hmasain, Demand No. 16 - Home Department-ah hian han lut ila.

Pu Speaker, nikum demand aiin kuminah hian kan Home Department-a sum dah hi crore ₹33,79,55,000-in a tam zawk a, a lawmawm ka ti khawp mai a; kan force-te thumchak chhoh a pawimawh zia ngaihtuaha Home Deptt. demand a pung hi thil lawmawm tak a ni. Tunah hian Home Department hnarauk awmzat kan hre tawh a, 4268 tih kha a ni a, Covid avanga sum harsatna te a kiang chho tan tawh bawk a, heng post ruak eng emaw zat te hi min hnawhkhah sak kan beisei a, a thlamuanthlak kan ti hle a ni.

Pu Speaker, hei, MLA han niha demand han sawi hian, mahni bial lam hi a luh loh theih loh a. Min lo hrethiam ula, ka bial mamawh eng emaw han sawilan ka duh a.

Pakhatnaah chuan, Pu Speaker, Dungle Police Station hi a tirah chuanin Outpost hun rei tak a ni a. Amaherawhchu, ramri bul a nih avangin a tulna leh a pawimawhna te hriain kan sorkar kal tain 2019 khan Police Station puitlingah min han hlan kai sak a, hei hi theih ang anga tih changtlun chhoh a ni a, hmabak erawhchu a la tam khawp mai. Pu Speaker, building leh quarter te pawh sak belha, security fencing te pawh siam a ngai khawp mai, tih kha ka han sawi duh a. Tin, tunah hian hmeichhe Police pakhat min dahsak a, a lawmawm khawp mai a. Amaherawhchu, pakhat ringawt hi chu eng emaw thila an lo remchan loh hian hmeichhe Police hi an ngai tlat a ni. Ramria awm kan ni a, thil tha tam tak a chhuak a, thil thalo pawh a chhuak a; thil thalo pawh a lo lut a, a tha a lo lut bawk a. Khati vel kan nih avangin, khilala kan Station khi tih changtlun zel a ngai a ni tih kha, Pu Speaker, ka'n sawi duh bawk a ni.

Tin, Farkawn hi ramria awm a ni a, kan bialah chuan khaw lian ber a ni. Security thil leh thil dangah pawh a pawimawh avangin Farkawn-ah Outpost kan nei ve a, amaherawhchu, Police 4 vel chauh an awm a, tih len an ngai khawp mai a. A chhan chu, Tiau ral maiah hel ho camp a awm rup mai si a, khilayah Police 4 ringawt mai chuan a thlamuanthlak loh a; heng hi a theih angin ngaihtuahna min hmansak se tiin, kan Minister zahawmtak hi ka'n ngen bawk a ni, nangmah kaltlangin.

Demand No. 46 - UD & PA Department hi, Pu Speaker, kan bial te hi chu sawi ve tur nei awm lo tak kan nih lain, vanneihthlak takin sorkar kal ta ah khan Khawbung leh Farkawn hi kan dil ve a, notified town-a puan turin, amaherawhchu, a ruala a theih loh avangin Farkawn kha puan a ni ta a, kum 2021 khan. Amaherawhchu, covid boruak kha a ni chho a, han tuam hlawmna leh hmalakna tak tak kha a awm hlei thei lova. Tun kan sawrkar tharah hian kan Minister zahawm tak hian notified town te chanvo tur leh a khua cheibawlina tur te, a nih anga an chanvo an dawn ve theihna turin, kan Minister zahawm tak hian Farkawn notified town atan hian ruahmanna min neih sak se, tiin ka ngen bawk a ni.

Pu Speaker, Demand No. 35 - Fisheries Department hi kan sawi teuh tawh a, Mizoram hmun hrang hrang leh kan bialah te ngei pawh sangha dil siam kan uar chho deuh deuh a. Eizawna tling a nih avangin, hei hi kan thatpui em em a ni. Chuvang chuan, he kan sawrkar thar pawh hian helamah hian nasa takin hma la chho se ka duh khawp mai a. Sawrkar kal ta khan sangha dil thar chhungkua 2,080 hnenah tanpuina kha a lo pe tawh a ni. Chutiang chuan, sawrkar kal ta pawh khan a theihtawp a lo chhuah a, hemi kawngah hian nakinah chuan kan la intodelh thei dawn a ni. Tunah rih chuan kan la intodelh lo a, hemi kawngah hian awmze neia kan Minister hian min kalpui a tul khawp mai a. Sawi thin tak angin, Champhai District leh a chheh velah khian a chawm theitu tur, sangha chi siamchhuahna hmun changtlung tak hi din tura hmalak a tul khawpin ka hria. Chuvang chuan, chhungkaw tam tak eizawna siam thei tur a nih avangin a pawimawh hle a. Kan sawi tak ang khan, hei hi sawrkar thar policy *Bana-kaih* hmanng te pawhin khilayah khian a ti tak tak thei turte hnenah tanpuina te siama hmalak atan a itawm hle tih kha, Pu Speaker ka sawi duh bawk a.

Demand No. 36 - Environment, Forests & Climate Change Department ah hian Pu Speaker ka sawi duh chu, kan tuihna te a kang zel a, kan environment chereu chho zelah hian Environment, Forests & Climate Change Department hi a pawimawh chho deuh deuh dawn niin ka hria a. Kan eizawna pui ber, kan lo neih dan system zirloh avangin kan environment hi a chhe nasa tawh em em a. Tin, hmasawna hnathawh tam tak hian kan environment hi a tichhe nasa bawk a ni. Kum tin ramngaw kan vat chereu chho zel a, kan han hal a, hei hi kan environment hian a tuar em em mai a. Tunhma ramngaw tha tak tak awm thinte pawh kha a chereu chho zel a ni. Hemi kan environment chereu chho zelin a hrinchhuah pawh em em mai pakhat chu, Pu Speaker - tuihna kang chho zel hi a ni. Hman zanah kan ngaithla tawh a, Aizawl khawpui chawmtu Tlawng hnar ngei pawh

thal-va-ek-char ah chuan a kang lo chauh a ni a. Thingtlang khaw tam takte tui tlan pawh a kangchat chho zo ta. Khaw tin mai ah kan buaina ber chu, tui harsat thu a ni.

Tunhma kum 10-20 liam ta ah kha chuan thingtlang khuate hian gravity hmanga tui lak hi hnianghnar takin an kham a ni. Amaherawhchu, tunah chuan a ni tawh lo. Hmun hniam zawka awm solar hmanga pump ngai deuh vek kan ni tawh a ni. Hetiang zela kan kal chuan, tuna solar hmanga tui kan pump-na hnarte pawh a kangchat thuai dawn niin a lang a, engtin nge ni ang? Kan hmabak chu a duhawm vak lo a ni. Chuvang chuan, tui hnar tui tihpun te, a hnar lampanga thing leh maute kan tih chereu zel hi kan khuahkhirh emaw, kan ven loh emaw chuan harsatna hi kan la tawk dawn. Kan solar pump te hi tunah chuan a tangkai lutuk Pu Speaker; hun reiloteah tun ang a kan kal zel chuan, kan solar pump te hi hmantlak lohin, tui pump tur awm lovin a la awm dawn.

Chuvang chuan, hemi chungchangah hian Forest Department hian hmalakna tur pawimawh tak mai a neiin ka hria a. Khaw tina kan tui tlan hnar hi target zel sela, khaw neitute nen tangrualin mumal takin dan te siamin humhalh ni se la. Tuihna siamchhuak thei thing leh changelte phunin theihtawpin hmalak chhoh ni se la, kan la tlai lovin ka hria a. Tun atanga hetiang theih tawp kan chhuah loh chuan, nakin kum 10-20 ah chuan tui avangin kan la buai viau dawn a; tun hi hmalak hun tak, a vei hun tak niin ka hria, Pu Speaker. Hetiang lam hawi hian kan sawrkar leh kan Minister zahawmtak te hian ngaihtuahna hmang sela ka duh takzet a ni.

Pu Speaker, vawiin chu thu ka'n awih teh ang; kan thiante kha ka kian ang a. Vawiina kan pass tur kan Minister zahawm tak Pu Sapdanga chan Demand Nos. 13, 16, 20, 46 leh Pu Lalthansanga, kan Minister zahawm tak chan Demand Nos. 33, 35, 36, 41 te hi he House-ah hian pass ngei turin kei pawhin ka rawn support e. Ka lawm e.

HON. SPEAKER : A lawmawm e. Tu nge sawi leh ang? Dampa Bialtu, Member zahawm tak Pu Lalrintluanga Sailo ilo sawm ang.

PU LALRINTLUANGA SAILO: Pu Speaker, ka lawm e. Vawiin chu i nalhin, i smart hle mai, tih kha ka han sawi hmasa duh a.

Aw le, Pu Speaker, vawiinniah hian hei kan Minister zahawm tak pahnihte demand kan sawi ho a ni a. A hmasa bera ka han sawi duh chu, Demand No. 16 - Home chungchang hi a ni a. A point pakhatna ah chuan, lawmthu han sawi ka duh a. Hmanni *Question Hour* - Zawhbelhna hunah khan, ka bial chungah sawrkar hmasain Kanghmun-a police outpost dah a tum kha kalpui a ni em, tih a ni a, 'Kalpui zel tum a ni' tih kha kan Home Minister chhanna a ni a, ka lawm khawp mai a. Helaiyah hian problem lian tak a awm a ni, tih ka sawi tawh kha. Lawmthu ka sawi a ni.

Chutih rual erawh chuan, Tirhkoh Paula tawngkam han hawh lawk ila – “*Demna che ka nei*” tihlai kha. Hei hi zawhnaah pawh ka zawt tawh a. Vairengte-a kan Minister zahawmtak post tlawh kual a zin khan, kan Police SI pakhat, ASI pakhat leh Constable 6 chungah action lak a ni a. Hei hi, kan information hi a dik lo deuh nge, ‘*kan kut a thak mah mah em aw*’ tih hi ka sawi duh a ni. Office Memorandum hi January Ni 4 ah chhuah a ni a, January Ni 5 ah Kolasib District-in an dawng tih hriat a ni a. Chuan January Ni 5 ah chuan heng SI pakhat, ASI pakhat, Havildar pahnih, Constable pathum leh driver pakhat te chungah hian action lak a ni a.

Hei, ramria duty police, dan loa pawisa la officer kha suspend-a, midang pawh dim anni chuang dawn lo tih tawngkam te media lam atangin, kan Minister tawngkam ni awm tak kan lo hmu a, pawl ka ti khawp mai a. Dan anga mi diklo kan hrem a nih pawhin, a mimal ang zawnga umzui hi tha ka ti lova. Tin, chanchinbu Vanglaini frontpage ah te, DD news ah te, ‘he thu hi repeat zel a ni’ tih kan lo hmu a, a pawl ka ti khawp mai a. Ni 5 January, 2024 hian he police an suspend takte leh an transfer tak te hi, vai motor Regd. No. AS01MC8323 hian Ni 5 hian Vairengte checkgate a paltlang lova. (**Hon. Speaker:** Khawngaih takin, a budget ah khan a chen deuh theih em?) Aw, Home alawm; chu chu ka sawia lawm, Pu Speaker. Ni 6 January 2024, zan dar 8 ah check gate a paltlang chauh a; chuta a thil phurh chu hmarcha a ni. Hei hi gate entry ah chiang takin kan enquire a, a lang chiang hle a ni.

Chuvang chuan, heng mite hi enquiry emaw leh report fel tak dawn ni lem lova suspend an ni mai em aw, tih hi ka tarlang duh a. Chuvangin, helai hi kan Minister pawh hian a information en tha leh se; tunah investigation tih mek a ni a, hengte pawh hi min en uluk sak se la ka duh khawp mai.

Chutih rual chuan kan Home Minister hian editorial lam, a lo thawh tawh thinna lamah hiani a la kalpui em maw ni chu aw, ka ti a. Hmanniah Pu Speaker, i hoa kan Session niah te pawh khan, ‘sorkar hmasain cheng 5 pawh min hnutchhiah lo e; paper hnung lampang awl pawh hman zel kan la duh a ni’ a han ti a, a thawm a mawi khawp mai. Amaherawhchu, nichina Member zahawm tak Pu Robert Romawia sawi ang khan, SASCI part V-ah Mizoram Home Deptt. atan hian crore 50 (nuai 5,000) ngawt mai hman loh in hnutchhiah a ni. Thutak kan sawi a hunin ka hria a, he House ti zahawmtu, kan Minister zahawm tak te senior Minister te anni a, propaganda chu he House-ah hi chuan i la lut lo ang u, tih ka sawi duh a ni. Thudik sawina hmun a ni a, kan official-te leh media lamte pawh an ip ve deuh thin, tih hi kan hriat a thain ka hria. Chu chu Home chungchangah ka han sawi duh a.

Chutih rual chuan, Member zahawm tak Pu Ramthanmawia sawi ang khan, Home-ah hian nikum budget aiin dah tam a ni a. Chuvangin, heng kan indaihlohna police personnel-ah te, vehicle chungchangah te, tin, Police bahrik te a chhe em em a, hengah hian kan Home Minister kaltlang hian tan kan lak a va hun em. Chutih lai chuan, kan

bialah ka lut ve ang a, Marpara Police OC te, khunglai mite khu trialment condition nei deuh hlekin min ngaihtuah sak ka duh a. A chhan chu, facilities a chhe si a, electric a tha bawk si lo a, khaw lum lutuk hnuaiyah an awm a; hengte hi hremnaah a ngaih theih ni lovin, khulaiyah khuan kum hnih emaw, kum thum emaw term ni turin min ennawn sak se la a thain ka hria a. Hrehawm tuarin an tuar tlak tlak mai a; tihngaihna hre lo, zu ngawl veiah te hian kan chhuak lek lek thinin ka hria a; chulai chu ka'n tarlang tel duh a ni.

A dawt leha chuan Pu Speaker, Demand No. 33 - Soil & Water Conservation chungchanga ka sawi duh, pakhatna chu - chu sorkar hmasaah khan ka bial chung Hruuduk leh Silsuri bulah hmunphiah dankhawmna warehouse sakna tur hmun te locate felin hmalak a ni a. Amaherawhchu, inthlan a nih avangin duh angin hma kan la chak thei ta lova; hei hi kalpui zel tum a ni em, tih kha, wind up hunah minrawn sawi chhuah sak se ka duh khawp mai.

Tin, hmunphiah chungchanga hi a sawi loh theihloh a. Kan sorkar thar pawh hi a kal dik bik vek lova. A diktak chuan, hmunphiah hi sorkarina zuk buaipui chiam chi a ni lova. A takin kum tam kan lo hmu tawh a; a man bithliaha hma lak vak chi ah pawh ka ngai lova. Sorkar hian mahal pe lo se la; tin, tuna an kalpui ang hian chhiah chawi lo se la, buaipui a ngai lo hrim hrim a ni. Chuvang chuan, helai hi kan ennawn a tha hlein ka hria a. Tunah hian nikum lamah hmunphiah kg ah 120/- te an tih laiin, tunah 50/- te, 57/- tein an lei tih nizanah pawh min hrihl a, chu pawh chu a lei tur an inhmu zo lo a, local people ten pawisa puk chawpin, a hralhna a that deuh beiseiin tlema pawisa nei deuh ten an lei khawm mai mai a ni a. Hengah hian kut-hnathawktu an khawngaitlak tak zet zet a; chutiang dinhmuna ding chu kan ni, tih kha ka tarlang duh a.

Tin, Demand No. 33 - Fisheries-ah hian rawtna ang deuh hlek han siam ka duh a chu, he sorkar hi han sawi chiam dawn ila, hma lakna lutuk a la awm lova. Tun hmaa kan lo kalpui dan fuh lo hret a awmin ka hria. Keini district-ah khuan heng fish farmer-te tanpuina tur ang chi te pawh Mamit atang emawin hriattirna chhuah a ni a, kan bial South Sabual daih atang chuan hriat a har a ni. Chuvang chuan, a block-wise angin emaw min lo chhinchhah sak ta se la. Khatiang inhriattirna kha hun zau zawk siama hmalak a thain ka hria a ni.

A dawt leha chuan, Disaster chungchang, Demand No. 30 hi a pawimawh hle a. Thla leh, leh pek maia tang chuan monsoon a lo haw ang a, chhiat tawk tam tak an awm leh dawn a ni. Chung enkawlna Disaster lama sum kan dah hi a beitham deuh hlekin ka hria a, daihzai zawka kan kal a nih chuan, thu hran ni sela. Hei, vanduai thlak takin ka bialah pawh tun chawlhkar hmasa Nilaini khan Kawnmawi-ah in kang a awm a; chutih mek laiin Member zahawmtak Pu Zira bialah in kang a awm leh mek a, khatiangah khan chak zawka hma kan lak theihna turin BDO te pawhin silpaulin pakhat ngial pawh an kaw lo khu buaithlakin ka hria a. Tlawmngai pawlte'n tlawmngaiin sum

thawhkhawmin an buaipui nghal thin a, sorkar lam chet ran deuh te tun hma atangin kan ti lo deuh thin a. Hei hi kan thar thawh zel a pawimawh a ni.

Tin, a dawt lehah chuan, (**Hon. Speaker:** Khawngaihin, lo ding tho la. Hei, dar 4 a ni a, kan second session hun a tawp a. Ni danga kan tih angin kan chhonzawm zel ang a; dar 5:30 thlenga sawi tur kan awm chuan. Minute 1 ila nei e) Ka lawm e. Environment, Forest & Climate Change chungchang hi nichina member zahawm takte sawi ang khan, helai hi kan ennawn deuh a thain ka hria a.

Nimin piah lam session-a ka zawh tawh ang khan, kan bial bikah 132 leh 11 kV line-ah pawh harsatna kan tawk a ni a. Chutah chuan, Saithah leh Lallen-ah te compensation kan la ti fel loh avangin harsatna kan la tawk mek a ni a. Hei hi Forest lam te khan release thuai se la, kut-hnathawktu te an harsatna khu a reh maiin ka ring a; hma chak takin lak theih a ni, tih kha ka sawi duh a ni.

A dawt lehah chuan, Demand No. 41 - Sericulture hi tawi tein Pu Speaker. Ka bial hi sericulture potential Mizoram-a nei tha ber pawl kan nih ka ring a. Darlung leh a chheh vela in tin deuhthaw ina eizawna atan an hman a ni a, helai hi tunah pawh an kal tha viau tih, VC te pawhin min hrilh a. Hetiang zela kan kal hi a pawimawhin ka hria a. Chak zawka kan Minister thar hian hma min lak pui te pawh kan lo beisei dawn a ni.

A tawpna atan chuan, Pu Speaker, Demand no. 46 - Urban Development & Poverty Alleviation hi; hmanna kan sawi ang khan, notified town-ah te kan puang ve a, chutah chuan hamalakna mumal lo a tam mai a ni. Hei hi UD & PA in a cover area tura buatsaih a ni a. Housing chungchangah te, thil dang dangah hma lakna hmuh tur awm lo hi min lo ennawn sak turin Minister in-charge ka ngen duh a.

Chutihruah chuan, UD&PA-ah hian session hmasa, nikum lamah pawh ka sawi tawh a. Smart City kan ti a, kan smart lo em em mai a, Aizawl khawpui kan luh tirh atangin electric ban tinah hrui a khat tlat mai a (**Hon. Speaker:** minute 2 a liam ta e) Aw, Pu Speaker, ka zo dawn e. Hei hi kan enpui deuh a thain ka hria a. Cable tv leh private business tam tak hian vawiin niah hian min tibuai a ni a. Tun hmain telecom lamin min tibuai thin a, underground veka kalpui a ni ta a, hei hi kan ennawn a tha khawpin ka hria a. Hei hi kan House Leader pawhin a vei thinin ka hria a; motor lian a lo kalin wire han kai chah changa buai lek lekna kan nei fo mai te; tin, ban tinah hian Silchar khaw chung ang deuh hian a tawp hnawk em em mai a. Hei hi ennawn a tha khawp mai.

Aw le, Pu Speaker, kan Minister-te Demand Nos. 13, 16, 30, 46 leh 33, 35, 36, 41-te, helaia an rawn submit ang ngei hian passpui ni sela, tiin ka thlawp thu ka rawn sawi a ni e. Ka lawm e.

HON. SPEAKER : Tunah chuan Siaha Bialtu, Member zahawm tak, Dr. K. Beichhua ilo sawm ang.

DR. K. BEICHHUA : Pu Speaker ka lawm e. Vawiinah kan Minister zahawm tak tak pahnihte an demand kan sawi ho a, lawmawm viau a. Member tam takin an rawn sawi tawh a, tawi te tea rawn sawi ka tum ang a.

Pu Speaker, Demand No.13 - Personnel & Administrative Reforms hi department pawimawh tak mai, kan state ah leh state dangah te pawh a ni ang a. Department hrang hrang kaldan tur hi DP & AR-ah hian a innghat thui hle a ni, tih hi kan hrechiang vek a. Tun sorkar, *kalphung-thar* ah hian, DP & AR Minister zahawm takina min react atana zawhna ang deuh reuh ka neih chu, ‘tun sorkarah hian administrative reform siam tumna a awm em’? Hei hi min han react ta se; ‘engtin nge hma lak a tum’ tih lai kha ni bawk se.

Tin, Pu Speaker, kan hria a; kan state ah chuan MPSC hnuaiah combined services exam neih thin a ni a. Chungah chuan MCS te, MPS leh MIS te, MF&AS te, heng exam te hi kan conduct thin a ni. Kan students bright tak takte an han exam a. Result a han chhuak a, mark te a inthlau lova, service hrang hrangah an han lut chho a. Service an han tan chho a, an promotion avenue inthlau lutuk erawh hi chu, helai hi sorkar hian en tha ta se, a thawktute pawh phur tak leh taima takin an thawh theih a rinawm a ni. Hei hi a changtu kan Minister hian uluk takin min ensak ta se a lawmawm hle ang a. A bikin MIS te phei chu, ka hriatsual loh chuan selection grade bak hi an chho thei lo ni te pawhin a lang a, heng te pawh hi enfiah ni se a va han tha dawn em.

Tin, Pu Speaker, kan lo experience tawh, china thil pakhat tha lo deuha ka hriat chu – MCS officer a ni emaw, MPS a ni emaw officer hrim hrim DP & AR hnuaia kan control-te hi, an awmna hmun khatah hian an awm rei lo lutuk thin hi; an department chan pawh an master hma hian department danga insawn leh vat ngai hian kan khawsak tir a; hei hi tha lo tak a ni. Chungvang chuan, tun kalphung tharah hi chuan hei hi ti tawh lo ila. Department pakhata Secretary emaw, Director te emaw an awm chhung hi kum 2 nge, kum 3 kan ti nge, chutiang deuha kan kal loh chuan thla hnih-thum lek leka kan inthlak chuan department a kal tha hleithei lo a ni. Chuvang chuan, heng lai te pawh hi sorkar hian ngai pawimawh se a tha ang a.

Tin, cadre review hi neih a thain ka hria a ni. Pu Speaker, *Kalphung-thar* hian hei hi a nei thei ang em; neih a tum em, tih kha min react bawk se. Sorkar hnathawk awmdanah pawh hian, tun dinhmunah hi chuan Grade B lam hi kan tlem a, a chunglam hi kan buk deuh mah mah tawh em aw, tih tur hian a awm a. Tin, sorkar-hnathawk pakhat kal lova office file kal hlei thei lo te pawh a tam a, heng te pawh hi kan Minister zahawm tak hian chak takin min enkawl sak se, tih kha. Chutiang chuan, alakah hian beisei sang tak kan nei a ni.

Pu Speaker, Demand No. 30 - Disaster Management & Rehabilitation-ah hian tunhma atang pawha ka sawi thin, kan Aizawl khawpui-ah hian chhiat-rupna a lo thlen hi DM & R hian kan nghak dawn nge, kan lo inven lawk hi a tha zawk lo maw, tih laia hi ka rilruah hian vei lian takah ka nei a. Kan building te hi han en ta ila, keini ang engineer pawh nilo tan pawh hian luah ngam lo tur a tam viau ni hian a hriat a ni. Heng te pawh hi uluk taka endik ni se. Retaining wall, fur ngam lo tur hi a tam viau bawk a; Aizawl chauh ni lo, district hrang hrangah pawh a ni a. Hei hi, kan chhiat rup tawh hnua chet ai chuan kan chhiat hmaa preventive measure lak hi DM & R tih tur a ni lawm ni, tih hi ka rilruah a awm a.

Tin, DM & R hi decision siam thut thut ngaite a awm thin avang hian, kan CM ngei hian chang ta se; discussion nei hman lova penchhuah ngaihna hi a tam lutuk a. Chuvangin, DM & R hi kan ram ang, tlang ram chhengchhe takah hi chuan chhiat-rupna thleng thei reng a nih avang hian, a pawimawh hlein ka hria a. Chutih rual chuan, tuna a changtu Minister pawh hi ‘a tlin lo ang’ ka tihna ni lovin, a lakah pawh hian beiseina sang tak kan nei a ni.

Demand No.16 - Home hi, rilruah police indaihlohna a rawn lang nghal a. Pu Speaker, state pakhata police vacant post 4,000 chuang a awm tih hi state dangte hian han hre pheisela chuan, min va zuam dawn em. Pathian zarah state ralmuang kan ni a, internal leh external atanga buaina kan nei hran lova; tunah hian buaina han nei thut ila kan va che chhe dawn em, tih hi ka ngaihtuah thin a ni. Tun sorkar tharah hian police an lak belh dawn an ti a, a lawmawm a. ‘Sorkar chak’ kan tih te chuan defence system hi an ngaipawimawh thin a ni. Keini ‘kan state a ralmuang a lawm’ tih vang ringawta kan lo in tih ralmuan viau lai hian chhiatna a lo thleng thut thei a. Chuvang chuan, enforcement lam tih chak hi a pawimawh hlein ka hria. Tuna homeguard kan chhawr te pawh hi volunteer nge; MR anga lak an nih chu ka hre lova, heng ho dinhmun han bihchian hian, khawngaihthlak tak anni. Hamthatna medical reimbursement te pawh an nei lova, chhungkaw enkawltu an ni ve si a, an hlawh te lah hi a tlem ropui si a; humanitarian ground ang tala kan ngaihven hi chu a tul viau lo maw, tih ka sawilang duh bawk a.

Tin, tun kan dinhmunah chuan, kan jail-a tang awm thei zat aia tam te hi kan tang deuh vek mai a ni. Tunhma kha chuan doctor emaw, pharmacist emaw, nurse emaw te’n an awm chillh thin a, tuna kan dinhmun hi ka hre chiah lo na a, kan tang ho te hi medical examination neih tir thei thin ila, HIV positive te, hepatitis te an tam viau ka ring a ni. Misual annih avanga kan man ringawta, an hriselna kan enkawl leh si loh chuan, thil tha lo pui pui hi a chhuak thei a ni. Hei hi kan enfiah a ngai in ka hria.

Tin, Demand No. 46 - Urban Development & Poverty Alleviation atanga hmalakna hi kan bialah a bik takin term hmasa khan, a pawisa zawnga chhutin nuai 175 vel a niin ka hria a. Bill pawh kum 1-2 la thei lovin kan awm a ni; chuta tang chuan central lam atang hian state develop-na tur hi min rawn pe a, Smart City lamah hian central scheme tam

tak pek kan ni bawk a. Hei hi tangkai zawk, rualkhai zawka hman ni se. District lama DUDO leh staff te pawh hi thuam that ni se, kan hmalam kan kal chhohna turah hian a pawimawh hlein ka hria.

Demand No. 41- Pu Speaker, tawitein Sericulture-ah hian. Hei hi tun sorkara kut-hnathawk ngaihtuhtute tan phei chuan priority-a dah chi niin ka hria a ni. China hi silk producer khawvela lian ber a ni a, India hi consumer lian ber kan ni. Chung avang chuan market-ah hian problem a awm lo tih hi a chiang sa a. Sericulture-ah hian *Eri* leh *mulberry* phei chu kumkhata thar theih a ni a, a piah lamah *muga* te phei hi chu a to a, a chin pawh hi thil harsa a ni lo a. ‘Muga ching ula, pangngang kan lawn tir ang a, a rawn chhuk hunah chuan cheng 3 a rawn chhuk thlakpui dawn a ni’ ka ti thin a ni. Kan sorkar pawh hian mut mawh hnar mawha neiha, sawhthing leh aieng chauh ngaihtuah lovin, muga te pawh hi ngaihtuah tel a tul hlein ka hria, Pu Speaker.

Han sawi zel te pawh a chakawm viau a, Pu Speaker, minute 1 tal ka sawi loh chuan, Pu Chatea hian ka demand min sawipui duh lo a ti palh ang e. Demand No. 35 - Fisheries hi tawitein.

Breeding hi, phai lam atangin sangha note kan la thin a, heng te pawh hi Mizoram ah hian kan siam thei ve vek a. Chuvang chuan, Zopa-nursery-a siam ngei, breeding farm a siam atang hian neih ve theih ni se a va’n tha dawn em, tih hi Pu Speaker, ka hmuh dan a ni. I rawn sawi hmain ka’n ti tawp ang e. Ka lawm e.

Pu Speaker, (**Hon. Speaker:** Minute 2 a ni ta e.) Environment, Forest & Climate Change-ah hian sawi tur tam tak a awm a. Thing kan phun a, maintain a awm mang si lo a. Tunah chuan kawngpui te an han ni chho a, kan harsatna chu forest clearance, ‘forest clearance’ tih vek a ni a. Chhimtuipui khuah kan tih paw’n, ‘forest clearance’, forest clearance vang a ni tih vek a ni a. Heng hi kan Minister hian chak deuh takin hma min lak sak se. Clearance hi min tih sak zung zung se Chhimtuipui te pawh saw kan khuap ang a, power-ah kan intodelh viau lo ang maw, tih lai hi Pu Speaker, vawiinah ka rawn sawi duh a ni.

Kan Minister zahawm tak Pu K. Sapdanga demand leh Pu Lalthansanga demand hi tha ka ti a, pawmpui turin rawtna ka siam e. Ka lawm e.

HON. SPEAKER : Tunah chuan Aizawl West-III Bialtu, member zahawm tak Pu VL. Zaithanzama ilo sawm ang.

PU VL. ZAITHANZAMA: Pu Speaker, ka lawm e. Vawiinah kan Minister zahawm tak tak pahnih demand department pariat lai mai kan sawi ho a, kan tui tlang hle a. Ka lo ngaihthlak chinah Pu K. Sapdanga demand kha kan tuiipui deuh hlekin ka hria. Chuvangin, Pu Lalthansanga demand lamah hian kan lut hmasa ve ang e.

Demand No. 33 - Land Resources, Soil & Water Conservation Department hi pawimawh tak leh tangkai tak, kan mamawh em em an ni a, mahse chawi lar an ni vak lo a ni. Kumin budget-ah hian nasa takin a rawn pung a, kan ngaimawh chho dawn niin ka hria a, a lawmawm hlein ka hria. Sanction post 464 awmah 180 chauh fill up a ni a, hna thawk tur hian anni department hi tichak an ngai deuh deuh dawn niin a lang a. A chhan chu tuihna lo tlem zel leh leilung luangral tur veng tura hmalatu tur ber department a ni a, sik leh sa a lo danglam a, khua a lo thalin tuihna a lo kang a, furah ruahin tui hawk nasa tak siamin, kan lei chung hang te a la leh zel a. Sik leh sa lo danglam zelah hian he department hi kan tihchak deuh deuh a tul dawn niin a lang a. Chumi ti chak tur chuan kumin budget-ah hian tihchakna tur kawng hrang hrang kan hmu hi a lawmawm ka ti hle a ni.

Tlangram lo nei hi mithiamte'n an chhut dan chuan, buh tin 2 leh a chanve hmunah hian kum 1 chhungin lei chung hang metric tone 40 zet a luang ral an ti a, a lo ni em em lo a nih pawhin, hetia han thlir mai pawh hian tin 2 leh a chanve hmunah hi chuan fur lai chuan lei chung hang hi a kal liam tam hle tih chu kan hre thei awm e. Hetiang zela kan kal chuan, kan ram hi engtik hunah emaw, kum 50-60 ah chuan khawi khawi emaw lai hi thlalerah a chang mai ang tih a hlauhawm tan a ni. Tui lo tlem tial tial veng tur hian department hian ruahmanna chi hrang hrang a nei a, terrace laih te, check dam siam te, contour trench siam te, tuikhuah te leh sum chang thlai kum hlun chi uar deuh deuh te hi tul an ti a, an buaipui a ni.

Sum chang thlai zingah chuan rubber hi an sawi uar ber te zinga mi niin ka hria a, leilung a veng tha a. tin 2 leh a chanve hmun lekah kum 1 chhungin nuai 1,90,000 lai mai sum lakluh theihna a ni a, eizawwna ni bawk, kan leilung humhalhna ni bawk; thil tangkai tak a ni. Kuminah hian rubber chinna hmun kawng hmun 12 laiah laih tum a ni tih a lo lang a, crore 13 chuang zet hmangin kan sorkar leh department hian hma ala dawn niin ka hria a, a lawmawm hle a ni.

Hmunphiah kan sawi a, thui tak ka sawi ve lo ang a. Hmunphiah chungchangah pawh hian department-in hma a la dawn a. Kudam hmun 6 laia sakna tur ruahmanna a lo lang a, a lawmawm hle a ni. Nakum lamah hian hmunphiah chungchangah harsatna kan tawh tur te hei hian eng emaw chen min chhawk turah ngai ila.

Kuhva te pawh hi a pawimawh hle mai a; Bilkhawthlir leh Zamuang-ah processing unit khat ve ve sak tumin hmalak a ni a, crore 8 lai dah a ni.

Tin, sum chang thlai zinga an sawi uar tak chu coffee hi a ni a, hrallhnaah harsatna a awm lo a, leilung humhimna kawng siamna tha tak a ni. Department hian kan leilung luang ral tur, sik leh sa lo danglam zela chhiatna lo thleng lakah hian min veng dawn niin ka hria a. Kan Chief Minister kal chhuak ta thusawi kha ka bengah a cham reng a, Israel ramah chuan ngaw dur khup han hmuh hian, 'hna an va thawk nasa ve aw, kan ti

a, Mizoram-ah chuan ngaw dur khup han hmuh hian, mihringin kan la tlawh pawh vak lo a nih hi, kan ti a' a tih kha.....

(Hon. Dy Speaker-in Chair a la a)

Chuvang chuan ram humhalh kawngah leh siam kawngah hian tan kan lak deuh deuh a ngai a ni. Forest department nen hian a inkungkaih hle tih kha kan han sawi pawlh nawk nawk dan atang hian a hriat mai awm e.

Pu Dy. Speaker, Demand No. 35 – Fisheries pawh hi an budget han en hian a tha hle mai a, hmasawn turin kan sorkar hian ruahmanna tam tak a siam niin a lang a, an pawimawh hle a ni. Sangha thianghlim kan ei theihna tura hmalatu a ni a, nichina ka member-pui Tuichang Bialtu, Pu W. Chhuanawma khan, 'phai lam atanga sangha lo lut chu kan ei tha duh lo' te kha a ti a, kan rama thar ngei mai hi khamkhawp kan neih theihna turin department hian tan a la chho dawn niin a lang a.

Hun kal tawh han en khan 2018-23 ah hian Mizoram ah quintal 70,000 lai mai kan thar tawh a, amaherawhchu 2019, 20, 21 chhovah khan kan sangha thar hi a tlahniam a; hei hi hripui leng vang te pawh kha a ni thei turah ngai ila. 2022 leh 23 ah khan quintal 50,298 ah kan lo kai chho leh a, quintal 70,000 kai tur hian hmabak kan la ngah viau a ni. Amaherawhchu, tunah hian kan budget han enin he department hi tihchak kan tum niin a lang a. Fuels & lubricants-ah kum khata nuai 3 an neihna thinah kumin 2024-25 hian nuai 10 zetin an budget hi tihpun a ni a, hei hian sangha dil hmun hrang hranga awmte kan kualahna thawk turin field work nasa takin an ti thei dawn niin a lang a. Tin, kum danga an neih ngai loh advertising and publicity ah sum an nei ngai lo a, tunah hian nuai 3 dah sak an ni a, a lawmawm hle a ni. Chutiang chu a awm thla nual mai a, *minor work*-ah te pawh hian nuai 40 laiin a pung chho a. Tin, *repair and maintenance* ah nuai 5 thin kha, an indaih lo hle thin a, 2024-25 ah hi chuan nuai 15 lai tihpun sak an ni a. Kha kha ka'n luh khung deuh kherna chhan chu, Pu Dy. Speaker, he department tereuh te hi hmasawn turin tun sorkar hian beiseina sang tak nen an hnathawhna tur a siamsak a, a lawmawm ka ti a. Sangha thar thianghlim leh hrisel kan ei theihnan Fisheries Department hi kan vulh a ngai reng a ni. Tin, Sangha dil mai ni lo rilruah a lang tel a, kan luidungte kan humhalha, sangha thianghlim khuanu remruat, kan enkawl ngai lova chung pathian min pekte hi awmze neia humhalh kan thiam hunah phei chuan reiloteah he intodelhna kawngah hian hma kan sawn zel turah kan ngai deuh a.

Tin, heng bakah hian Mizoram ah Hydrel Project 2 kan neih len ve Tuirial leh Serlui Hydrel Project khu ka mitthlaah a lo lang a ni. Serlui kha eng emaw lai khan sangha manna atan kan chhawr tangkai viau a. Tuirial hydrel project khu km 89 laia thui a ni a, khung te khu awmze neiin kan Fisheries Department hian Tuirial nen hian han enkawl ta sela, tuna dil siam atanga kan thar piah lamah hian sangha hi reiloteah intodelh turin hma kan sawn theih mai kan beisei a, ka mitthlaah a lang reng a ka'n sawi tel hram a ni.

Pu Dy. Speaker, Forest, Demand no. 36 ah hian ah hian thil pakhat lek ka'n sawi lang duh a. Nimin lawk khan phone call ka dawng a, North Hlimen ram Pualreng Sanctuary ah MR thawk te khian, 'thla 10 lai hlawh kan la tawh lo ve' tiin min rawn hrilh a, hei hi nakinah kan Minister zahawm tak hian min hrilhfiah sak theih chuan ka lawm hle ang.

Pu Dy. Speaker, Pu Sapdanga Demand pakhat tala han luh loh chu a fel lo ang e. Demand No. 30 hi. 2022 leh 23 chung khan khuarel chhiatna avanga nunna chan mi 20 an awm a, DM&R a ni ka luhna hi. Leimin avangin mi 15, kangmei tuar avangin mi 3 leh, thli tleh avangin 2, mi 20 anni. Khuarel chhiatna avanga mihring nunna kan chan tamna ber chu, leimin hi a ni a. Leiminin mi 15 lai kum khat chung a min han tihlum hi; nunna a hlu si a, paw ka ti hle mai a. Ka rilua lo lang chu, leimin tur venna atan hian silpauline mai hi a tawh ta lo; thil dang a ngai a ni. Silpauline hi a tawh lo tih hre reng chungin kan hmanraw neih lar ber a ni a, hei aia tha leh changkang hi kan mithiamte'n reiloteah an ngaihtuah chhuah beisei ila, tih kha, han luh miah loh aiah khati te chiah kha ka sawi tawh mai ang e. Pu Dy. Speaker, vawiina kan Minister pahnih Demand te hi tha ka ti a, ka pawmpui e.

HON. DEPUTY SPEAKER: Sawi tur dang in awm em? Pi Prova Chakma ilo sawm ang u; West Tuipui Bialtu.

PI PROVA CHAKMA : Pu Dy. Speaker, ka lawm e. Vawiina kan Minister zahawm tak tak Pu K. Sapdanga leh Pu K. Lalthansanga te demand an rawn putlul hi sawi zauna hun remchang kan nei hi a lawmawm ka ti a. A hmasain Home Department, Demand No. 16 hi, (zingkarak pawh tlem ka sawi tawh a) lawmthu sawinaa tan ka duh a. Amaherawhchu, Pu Dy. Speaker, hun rei tak chung kangthelh motor tha kan neih loh kha, kar hmasa lawk khan kangthelh motor hi kan nei tih, kan bial mite'n min rawn hrilh a; chu chu lawmthu sawina remchangah lain, lawmthu ka rawn sawi a.

A dawt lehah chuan, quarter chungchang kha zingkarah ka sawi tawh a, kha kha min han ngaih pawimawh sak turin Pu Dy. Speaker, nangma kal tlangin, min lo chhinchhiah sak se ka duh a.

Tichuan, Demand No. 30 - Disaster Management & Rehabilitation ah hian duh chu, hmannah MLA inthlan hnu, January Ni 19 leh 20-a *Leadership Innovation* chungchanga kan training khan, disaster management chungchanga ka thil hriat pakhat chu - kan bial 35-West Tuipui leh Tuichawng bial te flood map-ah a lang lo' tih kha; khatah khan engatinge kan lan ve loh, tih kha department hnenah nangmah kal tlangin min chhinchhiah sak turin ka a. Pu Dy. Speaker, kumtin hian flood kan tuar ziah a, Kan tawrhnaah te pawh kan District Commissioner te pawhin min hriatpui a. Amaherawhchu, department ah hian document an nei tha lo nge? A document an duh a nih pawhin, ka kawh tho a; kum tina disaster kan tawrhna te department hian min hriatsak se ka duh khawp mai a.

Kan Minister zahawm tak Pu Lalthansanga Demand, Fisheries department hi; Fisheries hi department te tak te ni mahsela, Mizoram economy nghawng department a ni a. Tunah hian sangha ah kan intodelh lo nasa a, chuvangin, tuna kan potential area neihte hi hman tangkai tak tak ni se, ram pawn atanga lakluh a ngai tam lo tur a ni a. Pu Dy. Speaker, mahni bial chhung sawi loh tur an ti a, mahse, a sawi loh theih loh a; mahni bial chhung kan sawi loh chuan kan department lamin an hriat phak loh a hlauhawm a, a sawizauna ka'n tarlang ni sela. Kan bialah chuan natural pond te kan nei a, tunah pawh hian *no-fishing zone* - sangha humhalh nan tiin, Tlabung area ah sawn kan nei a. Kha mai bakah tuipui lian tham kan nei bawk a, engtik lai pawhin sangha man tur kan nei reng a ni.

Pu Dy. Speaker, Sangha-a kan intodelh zel theihna turin a hun takah sangha chi – fish seed (fauna) hi min lo dah sak leh thei se; a breeding hunlai a ni a, tiin rawtna ka rawn siam a ni.

A dawt lelah chuan, Demand No. 36 - Environment, Forests & Climate Change hi - Forest Department chungchangah Riverine Reserve Forest (RRF) hi ka sawi lang duh a. *'Riverine Forest'* tiin kan bial hi a hmaa an lo puan tawh a ni a. Mahse tuna compensatory afforestation land an rawn demand-ah khan, *'there are no riverine reserve forest in the state at present and no compensatory afforestation land needs not be transferred'* tia rawn tarlan a ni a. Pu Dy. Speaker, riverine forest ni si, compensation claim dawna, *'riverine forest kan ni lo'* tia tarlan a ni leh si kha a chhan min hrilhfiash se ka duh a ni. Amaherawhchu, forest area-ah chuan *riverine forest* kan ni tih kha min hriat sak bawk se. Hei hi a department concern ni chiah lo mahse, a inkaihhnawih a, Land Revenue nen a inzawm tlat avangin tlem ka lut lawk ang a.

Land Revenue chungchangah tunah hian hun harsa tak kan tawng mek a; Land Revenue Tax pawh kan pe thei lo a ni tunah hian. Tax kan pek theih lohna chhan hi riverine forest area-a puan kan nih avanga tax pe thei lo kan ni a. Hetah hian compensation kan han phutin, *'riverine forest in ni'* min ti leh bawk si a. Kha kha engtia hmalak tur nge, tih kha, nangmah kaltlangin department leh kan Minister zahawm tak Forest Department changtu hnenah zawhna ka rawn siam a nih chu. Engtin nge hma min laksak ang? A hma pawhin kan Forest Minister hnenah lei chungchang kha ka rawn sawi tawh bawk a; chutah pawh chuan, forest clearance min pek theih loh avangin lei kha kan la dawh thei lova. Chuvangin, Tuipui Lei dawh kaina tur forest clearance min lo bawhzuisak turin ka ngen a; nakin a wind up hunah min ngaih pawimawhsak turin ka ngen a ni, Pu Dy. Speaker.

Tichuan, Environment Forest-ah kal leh lawk ila. Ka thusawi hi tlemin, *ups and down* a ni a, mahni tawng a nih loh avangin min hriatthiamna ka ngen a. Environment-a sawi duh ka neih chu - kum dang, tun ang hunah hian tui hi a nu ngai lo a; mahse, tunah hian engati nge kan Khawthlang Tuipui saw a nu tlat a, engnge a chhan tumahin kan hre bik

si lova. Kawng an laih vang nge; kawng sirah leivung hi an dah tha tawk lo nge, tih kha ka hre duh a; khawngaihmin min hrilhfiiah thei se.

Tichuan, heng department pali - Home, Disaster Management, Fisheries leh Environment te chiah hi ka sawi lang a. Pu K. Sapdanga leh Pu Lalthansanga te demand rawn putlulh te hi keipawhin tha ka ti a; tha taka an hman tangkai theih nan duhsakna sang ber ka hlan a.

Tichuan, Soil & Conservation-ah khan hmunphiah leh aieng chungchang kha a rawn lang leh a. Tukinah phone ka dawng a; sawi loh ka tum a, mahse, ‘engati nge kan pi hian a sawilan loh’ min rawn ti leh dawn si a.

Aieng hi tunah kan thar chhuak tan a, ‘a hralhna tur kan la hmu lo’ te an rawn ti a, ka bial atangin min rawn phone a. Chu chu, kan Minister zahawm tak hnenah hian aieng kan lei theiloh chhan hi ka zawt duh a; min hrilh thei se ka lawm ngawt ang. Tichuan, heng demand-te hi hma min laksak dawn chuan, ka pawmpui e. Ka lawm e.

HON. DEPUTY SPEAKER: Pi Prova-i hi inthlahrung deuhin a pel leh hram thin a. Tunah chuan, Leader of Opposition, Pu Lalchhandama Ralte ilo sawm ang u.

PU LALCHHANDAMA RALTE, OPP. LEADER: Pu Dy. Speaker, ka lawm e. Ka dinglamah i thu thin a, i thu sang chho daih mai a, i ngaihawm hle mai, ka’n ti hmasa duh a. Tawi te te hian a mutthluk loh nan tiin fiamthu te kan lo thawh dun zeuh zeuh a ni a, a ri mang lovin.

Vawiinah kan Minister-te pahnih - Pu K. Sapdanga leh Pu Lalthansanga te demand kan han sawi dawn a ni a, a vaia han luhchilh vek dawn chuan hun hi hman rei a hlauhawm avangin, department pathum vel emaw chauh sawi ak tum ang a.

Nimin piah khan inleng zirlai pakhat hi ka nei a, politics a lo ngaihven ve viau mai a; Minister demand hrang hrangte kha a lo thlir a, vawiina kan sawi turte kan sawiho a; “Pu Lalthansanga chanvo hi a va tlem bik ve pawisa hi” tih kha min zawt a; khati teh chiam khan ka lo en lo a. Vawiinah hian Department 4-ah hian crore ₹196 a ni a; Pu K. Sapdanga hi crore ₹1274 (a let ruk zet) kha a lo ni a. Chung te chu kan ngaihtuahnaah awm chhonzawm se ka duh a.

A hmasa berah chuan, Demand No. 33 - Land Resources, Soil & Water Conservation hi ka sawi duh a. Tun 2024-2025 bikah hi chuan lakh ₹953.35 pawisa pek belh a ni a. Hei hian entir tam tak, ‘hma lak an tum ve a ni ang a; Land-base ah hian kuhva, rubber, coffee, hmunphiah lam uar zawka kalpui min tum a ni ang a’ tih kha min ngaihtuah tel tir a. Chutih rual chuan, ngaihtuahna pakhat kal chu, heng thlai chi 4 lei tur kan han tih - kuhva, aieng, hmarcha leh hmunphiah te hi, hmunphiah hi Soil Deptt. nge lei zel dawn,

Agriculture hnuuia Marketing Board zawkin; a dawt leh Financial Year-ah hian tu zawkin nge lei dawn, tih hi ka rilruah zawhna a lian khawp mai a. Soil & Water Conservation Minister khan ‘anni hian hmunphiah bik hi an keng zel dawn em’ tih hi min han chhang se ka duh a.

Tin, hmanna kan discussion ah pawh hmunphiah hi kan sawi zing a, fiamthute pawh kan thawh lek lek a. Kan House Leader-in hmanna min han tihlim deuhin, ‘*kan lei vek ang, pawh kan ti bik chuang hlei nem maw le*’ a rawn ti a. Amaherawhchu, vawiinniah Zoram pumah hmunphiah chingtute an mangang a, an tap a, kan sawi a. Kan Governor-in Ni 13/12/2023 a a thusawiah, “tun sorkar financial year tawp hma hian kan leisak dawn e; ka sorkar ngei hian a lei dawn e” tih a sawi a, chumiah chuan crore ₹110, thlaithar leina tur pawh dah thlap kha a ni bawk si a. Ni 20 zet tunah hian a la awm a, hemi chhung hian lei theihna chance chu a la awm a ni.

Soil & Water Conservation Minister, a changtu ngei, a damlo a dam tawh bawk a - hemi hun chhung hianin khaw eng emaw zatah hi chuan kan lei thei a; kan village council te kaltlanga kan lei tawh chiah lo a nih pawhin, a tawih chhe mai tur te pawh hi han compensate dan te emaw; tin, tlawm uchuak taka hralh hote hi price support han pek dawn pawhin a pawisa pawh kan nei a; hnathawktute hi i ngaihsak hram hram ang u, tih kha kan inchah nise.

Sawrkar tura kan inzawrh lai khan, “research base-in engkim kan ti a, engkim hi a tamna muala a leina tur te, a leitu turte pawh kan nei sa vek tawh; ready-made SDRF kan nei a ni” in ti a; in sawrkar ta cheng a, hralhna turah, tu nge lei anga, engzat nge kan neih, tih pawh in hre leh mang si lo hi, research base a hma kan la in tih kha, min ti ringhlel deuh a. Vawiin ni ah hian sawrkarin crore ₹110/- kan neih, sawrkar hmasaa SEDP - family oriented atana an dah atanga thlai thar leina tur kan dah hian hmunphiah hi khawngaihin min leisak hram teh u, tiin ka’n ngen a.

Tin, ka zawhna nghala chu – He kum thar lo kal chho turah, hmunphiah hmun te an vat leh ang a, hmunphiah Mizorama thar hi sawrkar hian lei vek kan tum dawn em? ‘Lei vek kan intiam hlei nem,’ kan ti dawn nge; hralh thei tur a piang leina tur te in ngaihtuah pui dawn em? Kut-hnathawktute’n sawrkarah rinna an nghah loh chuan leh sawrkar hi an rinhlel tlat chuan, kan ram economy in a tawrh dawn avangin, tun hun reilo tea experience an neihah hian kut-hnathawktute an hawi hai a, an tap a; sawrkar hian assurance kan pe thei dawn em? A bikin Demand No. 33 kha ka’n lut lawk a ni. Tin, sawhthing te, aieng te, hmarcha te pawh kha, a subject chiah a nih loh pawhin, a tlangpuia sawrkarin kan tum dana kha kan Minister-in min hrih theih chuan ka lawm hle ang.

Demand No. 36 - Environment & Forest, Climate Change hi, hei kumin kan budget ah hianin nuai ₹2,119.05 in kan tlem a, hei hi engnge a chhan ni ang aw, ka ti a. Kan sum

hmuh tur hi sawrkar kum kal lai aiin a tlem tlat a. A lehlamah chuan Forest Deptt. ah hian kan Forest Minister kal ta khan JICA hnuaiyah nge ni, (khawi ber nge ka hre chiang tawh lo a) project lian pui mai siam a nei a, a rawn hmin dawn niin ka hria a. Chung te avang chuan, ‘kan finance lampang hianin sum an ngah dawn tho e’ tiin, anni hian hmun danga hmana tan an pawt nge ka hre lo a. Engpawh ni se, Forest hi department pawimawh tak a ni a, Mizo mipuite leh Forest Department kan inlaichin dan a hi zir uluk a ngaiin ka hria a. mipuite hian Forest Department tangkaina te, pawimawhna te kan environment a tan, kan tuihna a tan, hringnun tinuamtu tur thil tam tak an tih lam ai mah hian, kan ram vak min han man thin te, thingzai kan lak min han man thin te, thil dang eng eng emaw kan tihah hian a chhe zawng - negative approach hi Mizo society ah kan ngah hle niin ka hria a. Forest Department-a thawk ngeite awmze neia hemi ah hian mipui nen thawhhona tha, kan forest policy programme kan kalpuina tur ah hian, kan NGO te anni emaw, kan village council te nen emaw pawh thawhhona tha nen kan tih loh chuan, a khua, a veng a inepna a tam sawt khawp mai.

Chung piah lamah chuan, development project sorkarin a siam tam takah kan kalpui tawh hnu ah forest clearance neih loha vang te, objection thil dang vanga harsatna kan neihah hian, public ah hian negative approach a pein ka hria a, heng zawng zawngah hian Forest Department-a thawktute pawh hian a kawng awlsam zawk ngaihtuah foa, department dang nena co-ordination-ah pawh kawng awlsam in ngaihtuah pui tulin ka hria a.

Chutihruah chuan, chawhma lamah khan kan member pakhat khan, “sawrkar department hian development work thawh tur forest kaihnewihah a chhe zawnga hma la tur a nih dawn chuan, project kan siam hma in forest department, nodal department te emaw, a khaihnewih tur te atanga NOC fel zawk clearance kan neih lawk hi a tul a ni” tih a sawia kha kan ngaihpawimawh thain ka hre khawp mai a. Kan Chief Minister ngei pawh hian thuchhuah mumal tak siamin, hei hi department tinah pe leh thei se thain ka hria a. Eng emaw a ram mipuite’n kan nghahlelh em em kan kalpuina ah forest atangin objection a lo awm a, khami approach ah khan mipui hian forest department kan hmuh dan pawh hi a dik loh phah theih fo avangin, heng kawngah hianin public education pawh hi kan tih that a tul hlein ka hria a ni.

A dawt lehah chuan, Demand No. 35 - Fisheries ah hian, a budget hi lakh ₹45.84 in an pung hlauh mai a, a lawmawm khawp mai a. Potential area kan neih ang chhun chhunte han develop a tulin ka hria a, chungah chuan fish-farmers te han duhsak kawngah hian a bik takin sangha chaw man tlawm zawka subsidise kawngah hian hnianghnara pek hi a tul khawpin ka hria a. Tin, Mizo sangha vulh tam tak hian chaw pe mumal lo a tih hi kan hrat lutuk bawk a, heng kawngah hian public awareness tha zawk leh mumal zawk te hi Fisheries Department hian kan pek a thain ka hre bawk a ni. Tin, sangha chi tha, hatchery tha ah hian Mizoram atanga thar a awm thei a nih chuan duhtusam; State pawna tanga kan la dawn a nih pawhin, sangha chi tha ngei hi kan fish-farmer te

kan pek theihna'n kan Fisheries minister hian uluk takin ngaihtuahna min lo hmanpui ka duh a ni.

Tichuan, Sericulture budget hi kuminah hian lakh ₹50.15 in an tlahniam a, hei pawh hi silk a hralhna awm sa, market hriat sa, a product te 'engkim a awm' tih ni si, engatinge Mizoram-ah hian Sericulture hmalakna hi a arh zawnga a than viau loh aw, tih hi ka ngaihtuah a ni. Market-a buai reng reng lo hi, helaiyah hian engnge kan mutan, tih hi uluk zawka zir ni se; research wing te pawh kan nei thin bawk a. Kan Research Wing te hian sericulture hi potential area leh a scope nei tha tho si hian, sericulture lama inzarpaharh tura mu tan la awm fo hi engnge a chhan kan ngaihtuah a tulin ka hria. Kan thar ang ang pawh hnawng chuang ngai si lo hi, hei hi uluk taka ngaihtuahna hman a tul ka ti a ni.

Tichuan, Demand No. 46 - UD & PA, Pu K. Sapdanga chanah hian, nikum budget aia kumthar budget-a sum lakh ₹21,956.22-a a tla ta duaih mai hi engnge ni a chhan? Hei hi Smart City project leh thil dang avanga kal a ni maithei a; nakinah kan Minister-in min han hrilhfiah se a thain ka hria.

Budget Bu han en mai hi chuan, kan khawpui leh a chhehvel sub-town-te cheitu tur nodal department-a budget heti em ema a tlahniam mai hianin zawhna lian deuh mai min pe a. Tin, anmahni hnuaiyah urban local bodies - Local Council te, AMC/LMC te kan nei a. Heng thuam chaka hman tangkai te kan Sorkar pawhin a tih mek rual hian, hengho hi power decentralise-a, anmahni kan hman tangkai poh leh kan Sorkar leh kan ram tan pawha tha tur nia ka hriat avangin, an mawhphurhnaah ring ngama engkim kan tih hi a thain ka hria.

A bik takin, Aizawl khawpui hi kan darthlalang a ni a, (district dang leh hmun dangin min lo thik lo ta se) 'Aizawl beautification' te kan ti a; Aizawl hi Mizo hnam zawng zawngte tan chuan, 'kan Jerusalem' a ni a. Aizawl khawpui cheimawi hi Smart City hnuaiyah hian tunah hian project tam tak siam a ni tawh a. Ka rilruah awm kan Minister, UD & PA changtu ka han zawh duh chu – Kan khawpui, a rala han thlira inchung rangva tueik nasa em em te, in rawng hnawih loh tam em em mai te hi, rawng, tunhma deuha *Green - Aizawl* tih lai khan rawng hring, man tlawma lak tur ang te kha a awm a. Inchung rawng han hnawihtir te, a hring emaw, a sen emaw eng rawng pawh ni se, rangva tueik thep thup awm thup mai te, bang plaster emaw, plaster loh emaw rawng hnawih mumal loh thim bul maia awm te hi; rawng te pawh hi Aizawl Smart City project hnuai atang hian, kan budget neih chhun chhun atang te hian siam ta ila, Local Council leh AMC-te nen tangualin hengah hian rawng han hnawihtir hi kan ram hmel anih avangin, Aizawl Smart City-ah kha kha a tulin ka hria a.

Nichinah khan Pu Rintluanga Sailo, Dampa Bialtu khan a sawi tawh a. Kan khawpui chhung hmun tamtakah wire inzam nasa em em te, telephone hrui hman mumal tawh

loh tam tak la hlih loh a awm a. Cable TV a ni emaw, eng emaw tam lutuk la awmte pawh hi tihfel tul tak tak a awm a. Tun hnaiah department, Electricity department nge ni, mipui vantlang kalkawng bulah electric ban phun tharna Aizawl khawpui chhungah a tam khawp mai a. Chungah chuan vantlang kawng footpath bul vel laih khuara chei that leh loh a tam angreng khawp mai a. Kan khawpui chhung hmasawna tur a nih rualin khang te kha coordination tha zawk leh a chhawrtu mipuite harsatna siam lo thei ang bera tih hi a tul ka ti a, chu chu ka'n sawi tel duh a ni.

Tin, Aizawl Zodin Cinema Hall thin kha Sorkar hmasa, hmasa leh khan multi-car parking atan hmun tha deuh mai kan lei a; saw saw rin aiin zawh a har tawh khawp mai a. Hei hi engtika zo thei turin nge agreement kan neih, tih kha. Sawlai ah sawn mumal leh changkang zawka parking pawh siam tum a ni a; khawvel hmun danga an tih ang deuh hlekin. Sawlai saw engkimah kan punkhawm tamna a ni a, traffic ti jam-tu lian a nih bawh angin, sawlai saw min hriat sak theih chuan a tha hle ang a.

Tichuan, Demand No. 30 - Disaster Management-ah hian, chhiat tawh tanpui chungchanga sum leh pai kan pek te a muang khawp mai a. An budget pawh hi lakh ₹280-a tihlem a ni a. A bik taka ka ngaihpaawimawh chu, Disaster Response Force te kan nei a, an titha thawkhat a, Central YMA-te nen kan thawk ho a. Tui tla an awm nikhua hian tui luhna thuamnaw leh hmanrua eng emaw te hi kan nei em aw? Kan biala tui tla han awm nikhuaa hman tur hi a vang khawp mai a, Sairang tlangval tlawmngaite kan ko leh ngawt thin a. Hei ngaihtuah vat a tul ka hria. Tin, kangmei a lo chhuak palha hman chi fire hydrant te, PHE Minister hmasa, Pu Zodinluanga Minister lai khanin khawchhung tui point hrang hrangah fire hydrant siam a ni a, hei hi emergency leh kang thelhnaa hman tur a ni a. Hmanni lawk khan (kan hriat danin) veng pakhat in kangah fire hydrant atangin tui an la dawn a, tui a awm lo an ti a ni. Chuvangin, hengah hian coordination tha zawka kan kal hi a tul hle a. Emergency leh chhiat tawh, disaster awm nikhua atan helai hi kan ngaihpaawimawh a ngaiin ka hria a ni.

Pu Dy. Speaker, tlem han sawi leh a ngai deuh tlat mai; Demand No. 16 - Home-ah hian. Helai hi serious deuha sawi ka han duh a; hei hi hnam tana thil pawimawh a ni a. Lakh ₹3379.95-in Home Department budget hi a pung a. Kan Police force-te thuan chak hi law & order kenkawhna kawngah pawh a pawimawh khawp mai a. Vawin niah an quarter-te, an vehicle-te chhe lutuk hian Police zahawmna a tibawrhbang tawh a ni, tih kha ka han sawi duh a.

Chutih lai chuan kan Police-te fitness-a hi kan Home Minister pawhin a tanngkamah a hmang fova - Police, en reng reng pawha mipuite tithlamuanlo hi an awm nual hmel a; tin, taksa thau lutuk te pawh awm palh thei a ni a. Heng kawngah hian kan force-te hi mipuite thlamuanpui tur zawng hian mumal zawka kan enkawl a thin ka hria. Tin, Police transfer transfer leh posting chungchangah te, promotion chungchangah te eng

eng emaw sawi neuh neuh tam tak a awm a. Heng kawngah pawh hianin Education leh Police department-te hi chu mihring tamna anni a, kan tiṭha viau emaw kan tih lai hian, eng emaw hi a lo awm ṭhin a. Chuvangin, uluk zawka ngaihtuah a ngai a ni.

Tin, kuhva phur tihtawp tuma sorkar hmasa pawha kan au hla, min ti mualphotu, kuhva smuggling kha; in tiṭha viau dawn emaw kan ti a, a tawp hlei thei lova. Political ṭawngkam, group ṭhenkhatah phei chuan, ruling lai party-workers te emaw, hotute emaw hi an inrawlh em ni, tih ngaihtuahna awm khawpin ngaihdan dik lo mipuiah min pe lek lek a. Helai hi chu kan tanrual a tul tak zetin ka hria a. Kan Home Minister hi helaiah hian, ‘tang leh zual se’ tiin ka’n fuih duh a ni.

Point pahnih chu, Pu Speaker, ka sawi tawh ang a. A pakhatna chu - thil lak serious deuh mai kan Home Minister, kumah pawh kan senior leh experience nei tha a ni a. Amaherawhchu, Home Minister a nih angin, nichina memberte’n thahnemngaihnaa a an sawi kha, he House-a ṭawngkam kan hmanah hian kan fimkhur a va tul em, tih sawi duh a ni. Kar hmasa lawk khan Champhai jail chungchang ka sawi a, Champhai jail that loh zia te, a hung naa rangva kan hman a that loh zia te leh tihchangtlun a tulnaah khan. House-a mipui tam tak en theiha thusawi, “jail tangte an polite khawp a; zanah te nula an lo va rim a, an lo haw ve leh mai zel” a tih kha, Home Minister-in House meuha a sawi atan chuan a pawi ka ti hle mai. House-ah hian thu tluantling sawi hram ila; a inthlahrung nge ni, ka hre lova. Chung chu, an lo hung tawh a nih chuan, an hun tawh thu te, jail tang an chhuak thei tawh lo, tih te kan sawi loh chuan, Champhai leh a chhehvel-ah mipui tam tak an mangang a, telephone call te pawh kan dawng a ni. Tualthah case, murder case te, pawngsual case a tang te an awm a. An duh duha chhuak thei anga an awm khan mipui an thlamuang lova. Chu chu, Home Minister thusawi a tan chuan, ‘kan ping tawh e’ tih emaw tala thil awmdan sawi kha a tha a ni, tih kha ka’n sawi a ni. A ti thei a nih chuan, kha kha a tul ka ti a ni.

A pakhat leh, ka last point tur chu – hmannia crore ₹3/-, kan unau Myanmar raltlante chhawmdawlina tur chungchangah, “Central atangin sum, a head pawh mumal lo, kan Chief Minister hmasa Pu Zoramthanga’n Prime Minister a zuk dil a, humanitarian ground-ah kan unau raltlante enkawl nan” a ti a. A dik tak chuan, sorkarin *refugee*-a a pawm miau loh avangin enkawl a har a ni. Chumi atana pawisa an rawn pek kha, sorkarah “file-ah a hmanna pakhatmah a awm lo” tia a sawi kha, a pawi khawp mai. Chu chu, ilo en duh chuan - *No.G. 20011/2/2021-DTE(DM&R)* a awm a ni. Chutah chuan district zawng zawnga allocation pek dan te, heng ‘kan unau raltlante tanpuina tura tanah sum leh pai hi pek a ni’ tih zawng zawng engkim a inziak a. Chu chu, Deputy Commissioner hnenah khan *‘for providing financial assistance to refugees from Myanmar’* tih, 7th January, 2022 ami a ni. Khatiang hnam issue thil pawimawh lutukah party zawng zawng, NGO zawng zawng, Kohhran nena an tan hona, kan unaute kan tanpui mekah sum kawng bo awm thei ang leh hming mawilo awm thei kha a pawi ka ti a. Khalai kha thu zik tluak min sawi sak hram se ka duh khawp mai. Chuti a nih loh

chuan, hun kal zel turah 'sorkar hmasa khan khang sum te kha a ti chingpen em le' tih ngaihtuahna an hmang ang a; khang sum an hman zawng zawng kha kan Dist. Collector te kaltlangin kan NGO te nen an hmang vek a, engkim sorkar order-in, sorkar sanction order a awm si a. Khang kha, khawngaih takin thudik tluantling min sawi sak ka duh tak meuh meuh a ni.

Department dang pawh sawi chak viau mah ila, Pu Dy. Speaker, ka'n ti tawp dawn ang a. Kan Minister te pahnihte - Pu K. Sapdanga leh Pu Lalthansanga te demand hi a nihna anga a thlenna tur mualah hlawk tak leh awmze nei taka thawhpuaia hman a nih theihna turin, duhsakna nen lawm takin pass ka rawn rawtpui e. Ka lawm e.

HON. DEPUTY SPEAKER: Kan thu dun bawk a, kan induhsak dawn a ni. Aw le, tunah kan House Leader thusawi turin ilo sawm ang u.

PU LALDUHOMA, HON. CHIEF MINISTER: Pu Dy. Speaker, kan Minister te'n chiang zawkin engkim an rawn sawi dawn a, chipchiara thil ka lo sawi a tul lo ang a. Demand No. 16 - Home-ah hian tlem han sawi ka duh chu.

Hei, kan jail hi a tawt em em a. Tin, a hungna te a chhia a, a building te a chhe em em vek tawh a. Chu chu kan vei em avangin District jail 6 - Aizawl, Lunglei, Champhai, Kolasib, Serchhip leh Mamit te reconstruction a tan hian crore ₹55 SASCI atangin tunhnai mai ni hnih-thum lekah khan kan ruahman a, hei hi min approve sak ngei pawh kan beisei a. Heng atang hian kan jail building-te a ziaawm chhoh tawh kan beisei a. Champhai jail pawh kha khati heu huaua pawp khan kan han rochung kha a ni si a. Kan Home Minister hian engtin nge a pin tak chu a man a rawn sawi turah ngai ila. Khang zawng zawng kha thla hnih-khat chhung lekin kan tifel duak duak thei bik lo a, amaherawhchu, tan kan la a ni.

Tin, placement chungchangah sorkarin a lo kalpui danah thil fel hlel a awm a. Helaiia agency kan neih te hi an sual pawh a ni lo; a form-ah khan 'outside Mizoram' tih kha a tel tlat a, Outside Mizoram chuan khawvel pum a huap ve tlat a ni. Chuvang chuan, khami hmang khan India ram pawna hnathawk turte pawh kha an lo sponsor ve a. India Sorkar 'Immigration atangin license an nei tur a ni' tih te kha a mimalin an lo hre si lova, sorkarin a hrilh bawk si lo a. Tichuan, chumi hre lo chuan an lo thawnchhuak ve a. Tichuan, harsatna te a lo awm a. Central sorkar atanga license nei lo an ni tih te hriatchhuah a lo ni a, case te register a lo ngai ta hial a. Chutiang chu a nih avangin, hei hi tum reng a thil sual ti anga kan inpuh vak tur pawh a ni lo a, inhriatthiamna nen kalpui a ngai viau a. Amaherawhchu, a rang thei ang bera kan ram atanga ramdanga hnathawktu tirchhuak tute hian State sorkar leh Central sorkar hnuaia dan engkim an zawh kim thlap theihna tura kan kaihhruaia, kan kawhbmuh a ngai a ni. Tunah hian mi thenkhat chuan India sorkar hnuaiah license an nei thlap tawh a, chutiang hmanga an thawn chhuakte a nih kha chuan, a tha mai a. A dang tam tak erawh hi chuan an la hre

lo a, tiang chuan anmahnia indap chawp tur ringawt pawh ni lovin department te pawh hian kan pui tur a niin ka ring a ni.

Tin, tunah hian India ram pawn jail-a tang mekte chhanchhuah ngai an awm a, kei pawh minrawn phone thin a, ‘pawisa chuti zat kan pek chuan kan chhuak thei tawh dawn’ han ti te a awm a. Keima mimal pawisa pawh hian Nepal jail-a tang mi eng emaw zat ka khul chhuak tawh a; tunah pawh khul chhuah leh hmabak mi 4 an la awm a ni. Chutiang enkawl tur chuan Mizo Diaspora Cell hi, a department em em hi siam a ngai lova, a cell siam mai ila a tha ang kan ti a. Tunah hian buatsaihna a draft siam mek an awm a, chu chu anrawn final hunah Mizo khawvel hmun hrang hranga awmte’n harsatna an tawh changa kan enkawl dan tur leh kan hriatpui dan tur te, helam atanga thawnchhuah an niha, kan thawn chhuah dan turte, Khang zawng zawng buaipuitu tur bik cell a awm chuan a tawk mai a. Chu chu a remchanna hmunah din tumin kan inbuatsaih mek a ni.

Tin, tunah hian India leh Taiwan hian *Labour Mobilization Agreement* an siam a, India mi nuaihkhath an mamawh dawn a. Chu chu tunhmaa heta kan thawn chhuah thin housemaid, mi ina va thawk mai mai tur nilo, tlema hna sang deuh hlek Agriculture ah te, Industry ah te leh chi hrang hranga thawk tur kha anni a. Chu chu an ambassador lo kalte nen khan kan inbia a, anni’n central ah an lo hrilh ang a, keini’n External Affairs Minister ah kan lo hrilh bawng a. Mizote bik tana recruitment rawn titu tur Agency min siam sak se kan duh a. Tuna central sorkarin Agency-a a hman lai hi chu lo kal mahse kan thatpui vak dawnin kan hre lova. Chuvang chuan, Mizote bik tan eng emaw zat Taiwan ah te hna sang zawng leh tha zawng an thawh theihna turte kan ngaihtuah mek a.

Tin, UK lamah sipai - Navy leh Airforce-a kan tan theihna tur te, tin, Germany ah te pawh Nurse kan thawn chhuah theihna dan turte kan inbe hlawm a. Chung zawng zawng chu a cell kan siam hnuah awlsam zawng kan la chhonzawm thei turah kan ngai a ni.

Tin, IR Battalion kan din hi kan ramina kan tihsual lianpui, *blunder* a niin ka hria a. An din dawn pawh khan din lo turin kan ngen tawk tawk a ni, he House ah hian. IR Battalion hi Mizoram ta a ni lo, kan thuhnuaia awm pawh an ni lo; duh duh hunah/duh duhna hmunah central sorkar hian a deploy thei a, a deploy bawng thin. Mizoram pawna deploy annih pawhin an senso zawng zawng leh an hlawh kan pek vek a ngai; mi state tana duty tur kan tum kep ringawt a ni tunah hian, a athlak lutuk a. Amaherawhchu, khatih laia kan sorkar khan police lak kha an chak zek zek a, police ah an mite thun an chak zek zek a, an tilui a, “Ti suh u, in la inchoir ang; kan sumin a tlin a nih chuan, Mizo Battalion, state sorkar hnuuaia awm tur i din zawng ang u”, kan ti ngawih ngawih a ni. Mahse, an tilui a, tunah hian mi fahrawn enkawl ang kan ni a, mi fa kan chawm reng a ni tunah hian. Chu chu a ni a. An chungah thuneihna pawh kan nei tak tak lo. Amaherawhchu, kan ti tawp thei tawh si lova, a pawh khawp mai a. ‘Pu Amit Shaha’n

Mizo hlang - battalion min pe dawn' tih lah chu, *lungpui chung a chengkawl theihngilh ang mai* a ni a, a reh vang vang mai baw si a. "Vacancy 4,000 lai awm hi, a rapthlak e", an han tih pawh kha - rapthlak e; kan rochun hi a rapthlak a ni, Pu Speaker. Chu chu a ni mai.

Tin, kan police te hi an thlamuanawm loh; han en reng reng pawh hian thla an timuang lo; '*an fit lo*' tihna a ni ber ang chu. Tute lak nge maw ni le? Kut vung ber bur, ke vung ber bur, an PSO atan pawha kan duh loh tur an la a. Zirtirtu an fate zirtirtu atana an duh hauh loh tur an hnawh lut teuh baw a, heng zawng zawng hi kan chhawm a ni. Chuvang chuan, a paw khawp mai. Kan police tam tak hi an fit lo; phat thu a awm lo. Dik tak chuan training-a an kal pawhin kan Minister te PSO thenkhat chu zankhat chiah an riak, (a hming chu ka sawi lo ang) an hawng leh a, training ti miah lovin certificate zuk laa maw le! Chutiang te chu Minister ten kan tih duh chhung chuan, kan police te hi an fit thei dawn em ni? Chu chu a ni.

Tin, ILP chungchang hian Prime Minister leh Home Minister te nena kan inbiak khan *Biometric Identification*, Myanmarese refugees te tana ti tura min tih tum khan, a subject hi kan divert ve a. West Bengal te, Assam te'n Bangladesh atanga illegal migrant-ho an lo dang zo si lova, chu chu an rawn put chho a, Mizoram ah an awm a ni. Mizoram ah khian Hindu chu hnawksak tham kan nei lo; Muslim erawh an tam lutuk tawh, tih thu hi ka sawi a ni. Dik chiah chuan, chu chuan an beng a verh khawp mai. Heng kan Myanmar refugee te hi chu ram a buai loh huna haw leh mai tur anni, *temporary phenomenon* a ni. Kan rama hnam dang rawn lutte hi, an Kut nikhuaah te kan Lammual an khat tawh a ni. Chuvang chuan, hei zawk hi kan problem a ni. 'Hemi atan hian identification tih min phalsak rawh u; a tul a nih chuan biometric identification pawh min phalsak rawh u', tiin ka dil a, Prime Minister-in, "Proposal rawn thehlut rawh" min tia ni.

Kan tum ber chu ILP hi a ni; ILP system tha zawk a awm theih nan. A pawnga puia ILP hman vak vak kha a rem bik vak lova, reasonable restriction hnuaia hman tur kan ni a; unreasonable-a kan hman chuan Court-ah min khing se, kan tla dawn a ni; min khing zeuh zauh tawh leh nghal. Chuvang chuan, he ILP, tuna kan hman ang ni lo, tunlai thiamna hmanga mobile atang pawha han check mai theih tur design thiam kan awm em, biometric identification pui pui ni lo deuh si? kan ti a, "ti thiam firm kan awm e" an ti a. Chu mite chu kan indawr a, "lo ti rawh u" kan inti tain ka hria; eng chen nge a thlen ka sawi thei chiah lo a ni. Chutiang chuan tha zawkin tih kan tum a ni.

Tin, raltlante pawisa pek chungchang hi House-ah kan sawi ta vak vak mai a, tun bak hi chu sawi tawh lo ila a thain ka ring a. A chhan chu, heng hi India sorkar hi a protocol-ah signatory an nih loh avangin, official-in raltlan a nei thiang tlat lo a ni. Practical-in raltlan an ni baw si a. Pawisa kha an mamawh a, kan dil a, min pek an hreh chuang lova, Sorkar hmasa pawh kha an lo pe a ni. Hei hi 'Secret fund' a ni. Secret fund a ni a,

hetia sawi vak vak tur hi a ni lova; kan sawi laklawh a. kan sawi ta mai pawha, a tawpna ni se ka duh a. Hemi chungchang fund hi Prime Minister nen, Home Minister nen pawh kan sawiho ve tho a ni. Khang kha, ‘min pe; pe lo’ tih lampang kha he House-ah kan sawi a tul lo. Amaherawhchu, ‘kan mamawhna an hria, min tanpui an hreh lo’ tih chin erawh chu ka’n sawi ang e.

Tin, Assam Rifles sawn chungchangah hian, ‘eng chiah hi nge Mizoram sorkarin tih ve tur kan neih; tih loh te kan la nei em’ tih hi file ah ka zawh tir mek a, official takin ka hnenah a la rawn let lova. Amaherawhchu, an chhuahsan tur ram hi kan la chingfel lo hrim hrim a ni, ve bawka na. Tunah hian hemi AR ram chhunga ram nei zingah hian mi 13-in an LSC an rawn sacrifice tawh a; “E, Sorkarin nei rawh se, buaina siam ka tum lo” ti thei chhungkua 13 kan nei a, a lawmawm em em a. Chung ho LSC chu cancel a ni tawh a. Chutianga ti ve thei lo show cause notice pek ngai 41 an la awm a, chung mi te chu pek an ni tawh a. Tin, mi 10 laiin court-ah sorkar an khing bawk a ni. Chuvang chuan, Cabinet-ah tun tum sorkar thar hian kan ngaihtuah a. Engpawhnise, kan Revenue Minister hian helaia Court-a kal te, show-cause notice kan pek hote hi lengah lo sawm sela, thingpui lo inpui se langin; ram leh hnam tan an tlawmngaihna lo dil sela, tha takin inbia se langin, kan ram tan chuan surrender thei an awm nual kan beisei a, chu chu kan hmabak a ni a. Chutianga tha taka kan indawra, tlawmngai thei lo an la awm a nih chuan, sorkar chuan a thuneihna hmang mai turah kan ngai. Chung te pawh chu chinfel ngai phawt a ni, ve bawka ni.

Tin, Pu Speaker, kan hre tawh tho mai thei a; Citizenship Amendment Rules chu vawiin tlai atang hian enforce tur a lo ni ta a. Tichuan, hemi chungchangah hian kan lungrual viau a. Mizote min exempt pawh lo ni se, Mizoram pawnah mizo tam tak an awm a, kan missionary-te pawh an awm a ni. Tin, Christian hnam dang eng emaw zat an awm bawk a, he Dan hi India ramah hian a tha lo a ni; kan duh lo hrim hrim a ni. Mizoram-in exemption lo dilin, lo hmu pawh ni ila, a piah lamah hian kan unaute’n an tuar dawn tho tho. Chuvang chuan, ‘i do tlang ang u’, kan ti a, keini lo do khan awmzia vak a nei lo. Mizoram mipui aiawhin MP Lok Sabha kan nei a, he bill an pass ni khan enge a sawi kha - “Because of the gratitude that we have, we are supporting this Bill” a ti a nih kha. ‘Mizo mipui zawng zawngin he Bill hi kan support’ tihna a ni. Kan aiawha Lok Sabha-a ding khan a support miau a. Tichuan a support emaw, a support loh emaw avang khan awmzia chu a nei lo mai thei. Amaherawhchu, a hmaa a dinna nen a inan loh lutuk erawh chuan, Mizote rilru chu a tina vek a ni.

Tichuan, kha Dan kha pass a lo ni ta a, vawiin tlai atangin hman a lo ni dawn ta a. Amaherawhchu, keimahni ram chhung hrim hrimah erawh hi chuan kan lo phawk lekna tur vak a awm lova. British sorkar khan “*Bengal Eastern Frontier Regulation 1873*” kha min lo siam sak a ni; a rei tawh khawp mai. He BEFR, 1873 (a lam tawia kan tih mai thin) Section 7 ah hian, Pu Speaker, i remtihna ka’n chhiar ang a, a ziak hi a sin khawp a –

“It shall not be lawful for any British subject person, not being a Native of the districts comprised in the preamble of this Regulation, to acquire any interest in land or the product of land beyond the said “Inner Line” without the sanction of the local government or such officer as the local government shall appoint in this behalf. Any interest so acquired may be dealt with as the local government or its said officer shall direct.

The local government may also, by notification in the Kolkata Gazette extend the prohibition contained in this section to any class of persons, Natives of the said districts, and may from time to time in like manner cancel or vary such extension” a lo ti diam a.

Tichuan, he dan hmang hian kan him a ni. British hunlai atang khan Marwari ten min exploit emaw, min assimilate mai loh nan emaw, kan ram chhunga underground emaw overground resources-a thi hlu reng reng sumdawn nan hman a phal loh a ni. Chu mai a ni lova, anmahni khan kan ramah property-ah right an nei lova, in hmun lo ram an nei thei miah lo a ni. Eng pass mah an nei thei lo, huan pawh an nei thei lo; chutiang chu a ni a. Amaherawhchu, state sorkarin ‘nei rawh se’ tia a pekte chauhin an nei thei a ni. India a lo independent khan, *Adaptation of Laws* hmangin he dan hi hman zui a ni a, *Chin Hills Regulation Act* kha Burma-in an adopt zui mai bawk a, keiniin hei hi kan chang ve thung bawk a, Chin Hill Regulation kha chu keinih chuan hman a ni tawh lova. Tichuan, vawiin thlengin hei hi kan nei ta a ni. A lo tha khawp mai a; hei, min venghim ta zel a kha khanin. Khami azarah khan tunah hian he dan hian protection min pe ta a; tichuan, hetiang hian himna kan lo nei ve thei ta a. Tunah hian hemi, *Citizenship Amendment Act, 2019* hi kan en chuan, section 3 sub-section 4-ah hian Pu Speaker, i phalnain ka’n quote ang a –

“Nothing in this section shall apply to tribal areas of Assam, Meghalaya, Mizoram or Tripura as included in the Sixth Schedules to the Constitution and the areas cover under “The Inner Line” notified under the Bengal Eastern Frontier Regulation, 1873” a ti ta a ni. Tichuan, he Citizenship Amendment hi Mizoram ah chuan hman a ni dawn lova, tiang hian fel takin a danah pawh hian exemption hi pekin kan awm a ni. A Rules lam erawh hi chu kan la hmu hman lova.

Engpawh ni se, a ni, a ni zo tawh a; kan ram chhungah hman a ni dawn chuang lova. Chuvang chuan, hei hi chu tih vak ngaihna a awm chuang lova, kan lo kal tawh dan leh thil kal tawh te pawh sawi sawi a tul tawh lova; a nih nihin min nangching tawh a, tun dinhmuna hian kan ding ta a ni. Kan duhthusam erawhchu a ni lem lo hle, tih kha hre mai ila a thain ka ring a. Tichuan, heng Inner Line Regulation kan neihna hnuaia ILP pek theihna te pawh hi kan la neih chhunzawm zel dawn a ni; engmah buaina leh harsatna erawhchu kan neih phah dawn lo, tih kha ka sawi duh a ni.

Tichuan, Demand No. 36 - Environment & Forest-ah hian, kan hriat angin District Council huna kan Riverine Reserve Forest leh Roadside Reserve Forest kan neih kha Guwahati High Court-in min quash sak tawh a. Tichuan, Forest ram a ni ta lo vek mai a, kan lui dungte kha. Sorkar hmasa khan, 'hetiang chuan a thalo ang' tiin, *Protection of Rivers Act* a lo pass a, khang a hmaa danin a lo protect zawng zawng bakah, lui dang a tula piang tih belh theihna te, restricted area siam theihna te a awm thlap a. Tichuan, vawiinah hian, *Protection of Rivers Act* tha tak kan nei a, chumi hmang chuan khang area kha kan sorkar hian a humhalh ta zel a ni. A hma chuan khang kan luidung tha zawng zawng ram kha Delhi-in a chungah thu a rawn nei a; vawiinah erawh chuan mizofate ngeiin kan ram leilung chungah he dan hmang hian thu kan nei ve thung ta a ni.

Chuvangin, kei ka ngaihdan fo chuan, kan ram chinchang pawh hre ve tak tak lo, Delhi atanga thuneihna kan ram area zau tak chungah kan pek ai chuan, mipuite thlan tlin ngei, helai tualchhunga kan hruiute'n kan ram chungah thu an nei hi a him zawng ang, tih hi ka ring a. Chuvangin, kha *Protection of Rivers Act* kha tunah hian a nodal department siam fel a la ni lova, a rules pawh siam a la ni lova. Council of Ministers meeting lo awm leh turah 'tu department-in nge chang dawn', tih kha a ngaihtuah fel dawn chauh a ni. Tichuan, a bak zawng, khami luidungin a huam loh zawng kha *The Mizoram Forest Act* tuna duan mek hian a rawn tuam ve thung dawn a, chumiina a huap loh zawng chu Revenue ram a ni ve thung dawn a ni.

Chutah chuan, nichina rawtna lo awm kha, kawng sirah hian eng emaw chen hi huan emaw, lo emaw kan neih dawn pawhin, 'kawng hi chu i vat thleng lo teh ang u; kawng chhak lam leh kawng thlang lamah hian reserve i siam teh ang' tih rawtna kha a tha hlein ka hria; department te pawhin lo chhinchhiah ta sela. Kawng ko chhak lam leh kawng thlang lam hlam enge maw zat chin hi chu huan a nih pawhin, inpe tel lo ila; lo a nih pawhin, rawn vat chhuak lo sela. Kha kha ram ngawin dah ila, sam sam a ngai dawn lova, a thelh mai dawn a, a min tur te a veng dawn a, a daihlim dawn baw k a, sik leh sa a veng him dawn baw k a, kan ruahtui thlengin a tipung dawn a ni. Tin, kalkawng sirah te hian Herhse hi, kan state tree a ni a, han phun vek thei nghe nghe ila chuan a mawi em em dawn a; *Herhse Kut* te pawh kan la hmang duh maithei a ni. Khatiang kha a nih avangin, a kawngkam te pawh hi, engnge kan phun ang, tih te pawh hi ngaihtuah tel a tha hle a; kan Tourism Deptt. te nen ngaihtuahna lo seng tlang sela a tha viauin ka ring a.

Tin, Hmunphiah hi kan sawi leh thin a, ka chhang tawh dawn lova, vawiinah chuan kan inchhang tam tawh tawh a. Ka sawi duh awm chhun chu, Pu Speaker, kan pi leh pute'n hmunphiaha in vuak hi thil thiang loah an ngai a ni. Nupui te, pasal te leh fate vuak nan te a thiang reng reng lo a ni. Chuvang chuan, '*hmunphiah hi invuak nana hman vak vak chi a ni lo*' tih kha lo hria ila.

Tin, ‘nakumah engtin nge in tih zel dawn’ tih pawh kha, kan hotute’n an la ngaihtuah mai turah ka ngai deuh a, kan rawn a nih lem loh chuan, rawn inrawlh vak kha tumlo mai se langin; an la ngaihtuah fel mai ang.

Tin, ‘kan sum a tlem’ hi kan ti leh mai thin a, a dik a. Amaherawhchu, “Engatinge kan sum a tlema, engatinge kum dang a phak tak loh’ tih tih ai chuan, ‘engtizia nge kum dang pha si lo, kum dang aia sum puk leh leibat tlem bawk siin plan outlay hi kum hmasa aia in dah tam tlat theih le?’ tih te hi min zawh awm zawk tak a ni a, khalam kha min zawt tlat lo zel mai a. Chuvang chuan, kan budget chhunga mi chauh hi hman kan tum lo. Hmanni ah ka sawi a, Disaster Management hnuaiah Fire & Emergency lamah crore 40 chu min lo belh mai; kha kha kan budget-ah a tel kher lo; nakinah Revise Estimate-ah te chuan a rawn lang mahna. UD & PA ah hian tuna kan Finance Minister-in nichin lawk khan, “hei, crore 25 pek tur che ka nei ania; zanin ah ngei han tifel thuai se, naktukah election an puang maithei a. Zanina an rawn thawn thlak hman chuan ka lo pe ang che”, a ti leh mai a. Tichuan an han buaipui a, kan official te’n, crore 25 pawh vawiinah hian kan dawng leh mai dawn niin kan inhria a.

Chutiang chuan, Unity Mall te pawh crore 127 a ni a, a sign-tu tur minister kha a zin dawn avangin a la sign hman lo a, zanin ah chuan a sign tawh kan beisei a ni. Tun Pathianni ah khan Presbyterian Kohhran chuan, ‘ringlo mite hi Pathianin a mite tanpui turin hmanrua ah a hmang thin’ tih kha kan zir a ni. Babylon sorkar hnehtu Persia Lal Kura chuan Juda te tan budget atangin pawisa a pe teuh a, saltang chhuahna tur kha, chungte pawh chu kan rilru ah a awm a ni. Delhi sorkar hi Pathianin kan tawngtai chhanna atan min hmansak mek pawh a ni maithei a ni.

Tin, Demand No. 41 – Sericulture hi a hnunng ber atan ka’n sawi ang a. Hei, Muga Culture hi a tha khawp mai a, a man pawh a to a; an ngaihlu em em mai a. Mahse, a seed ah kan buai a ni; a seed hi an mamawh zat kan farmer-te hi kan pe thei lo a ni. Amaherawhchu, Central Silk Board lamah Muga chi siamna hmun tur, ‘P3 Station Mizoram-ah min lo dahsak ve rawh u’ kan ti a. Chu chu min phalsakin, min pawmpui tawh bawk a, a chi siamna tur kan nei dawn a ni.

Muga Project hi kalpui turin kan department ten hma an lo la diam a. Tichuan, 6th February-ah khan Thenzawl-ah a hawnna hun te neiin kan va kal a. Chutah chuan Central Silk Board atanga an hotupa lo kal kha kan inbia a, a lo tha em em mai a. Hemi atana pawisa ngai kan dilchhuak zo ang em, tia a department tena an lo ngaihtuah thin kha, mipui hmaah kan han sawi a, chumi chawlhkar la la chuan crore ₹7.06 min pek nghal tur thu a puang a, min pe fel tawh a ni. Tichuan, a vai hian, crore ₹13.39/- hi he Muga project atan hian min pe dawn a, kan lawm khawp mai. Tichuan, a seed lamah pawh kan buai lo zui ve tawh turah ka ngai a ni.

Tin, Cocoon rate hi tihsan a thain kan hria a. Tunah hian a rate hi chi hrang hrang - a, b, c tea then a ni a. Kan hralhna man han ngaihtuah hian kan farmerte hnena kan leina hi tihsan sak theih niin kan hria a. Department-in an tihsan sak theih chin awm an larawn propose turah ngai ta ilangin; kan tisan ngei ngei a ngai. Tunah hian kan hlep tlat a ni. Sorkar leh department hian hlawk kan tum lova, hlep siam ai chuan kan mite hnena kan lakna rate tihsana, an ipte a pawisa a luh tam kha kan duh zawk a ni. Chuvang chuan, kan tipung dawn a, pangngang khawi hi tun hma zawng zawng aiin a hlawk zawk dawn a ni.

Tin, a cocoon atanga direct-a lazaia han siama han hlum nghal mai theihna khawl te hi a lo awm a. Hmanni Delhi Exhibition ah khan kan en a, ka awt khawp mai a; a video in thla te ka la a. Hetah ka'n zawt a, kan director ten, "kan nei ve reng alawm", an lo ti a, a lawmawm ka ti khawp mai a. Sawngbawl te pawh kha a lo awl tawh; a cocoon atang khan lazai chu a lo chhuak mai a ni. Chutiangte chu an lo siam thiam tawh a ni.

Tin, pangang-vulh chhung hi a rei lo a, thla khat chhungin a cocoon hman a ni a, a thar rang em em a ni. Mizo mipuite hianin a thar rang hi kan mamawh a ni. Tin, chhe lovin a dah reng theih a ni; nikuma an lo thar sa metric tonne 1.8 pawh tunah hian an la dahtha a, an lo dil huai huai a ni, lei atan. A ngam huai deuh lei atan an la dahtha a ni awm e, kan department hotute hian.

Tin, 'Mutih-pangang' kan tih te pawh hi a tha khawp mai a, a thar rang a; chubakah a lazai aimah in a cocoon kha ei ah an hralh nasa a ni. Hei, khuai note kan duh em em chi ang kha a ni a. Khatiang khan an ti ve lova, a cocoon khan an hralh teuh teuh mai a, miin an eiduh em em a, chung chuan side income tha tak a siam nghal a ni.

A tawpna berah chuan, Mulberry hi *Sericulture Tourism* in a siam theih a, Tourism kan hipna tur atana pawimawh tak mai a ni a. A concept paper te pawh NEC-ah thehluh tawh a ni a, kan sorkar hian priority list ah kan thlang a ni. Chuvang chuan, hei pawh hi pawisa a lo kal leh ang a, priority list ah kan han dah ang a, funding hi kan hmuh leh mai kan inring a. Chutiang nih chuan Tourist Department leh kan Sericulture te hi tang tlangin a cocoon lam ringawt ni lo, tourism develop nan pawh kan hmantheih a rinawm a ni.

Tichuan, kan Minister pahnihte demand hi lungrual taka kan pass leh theih ka beisei e. Ka lawm e.

HON. SPEAKER : Aw le, tunah chuan kan chawl ang a, nakinah a concern minister te wind up tur leh pass dil turin kan la ko dawn a ni. Tunah chuan kan chawl ang a, dar 6:30PM ah kan lut khawm leh dawn nia.

(Recess till 6:30 PM)

6:30 PM

HON. SPEAKER : Kan Minister zahawm tak takte - Pu K. Sapdanga leh Pu Lalthansanga te demand sawihona chu kan zo ta a. Tunah chuan Minister zahawmtak Pu K. Sapdanga, a demand kan sawihona te wind-up turin kan sawm ang a; sawifiah ngai a tih te rawn sawifiahin, a demand te House ah pass rawn dil nghal turin ilo sawm ang u.

PU K. SAPDANGA, HON. MINISTER: Pu Speaker, ka lawm e. Vawiinah ka department chan palite demand-a sawiho ngai te, member zahawm tak 21 zet sawihonaa lo telin zawhnate, rawtnate an siam a, ka lawm hle mai a. Heng rawtna te, zawhna te an rawn siam kha ziakin, print thlapin ka nei vek a. Hei hi, tunah hian Pu Speaker, chhang nghal vek tura min duh chuan darkar khat chhungin ka inchhan zawh ka ring lo a; tin, demand note ka siam ve hi chutiang chen vel chu a lo ni leh bawk a. Chuvangin, Pu Speaker, kan memberte hian remti se'ng chuan ziakin thawn mai ka duh a, chu chu kan zavaia tan pawh a that zawk ka ring a. Han chhiar chhuak ta ila, in chhan thu a awm tawh si lo a, a ngai tho kha an hmu dawn a ni a; ka speed chu i hriat kha, Pu Speaker. Chuvangin, rem an tih chuan ka lawm khawp ang. (*House-in rem a tihpui a.*) Pu Speaker ka lawm e.

Demand No. 13 - Personnel & Administrative Reforms Deptt. hi kalphung-thar, mipui-sawrkar-a sawrkar hnathawh dan leh thawktute ruangam siamthaa, structural change siam thei department a ni chung hian, structural reform lama ke pen hi a harsa talh talh khawp mai a. Sawrkar tharah hian mipui-sawrkar kan ni tih hre rengin kan mamawh chin chauh hnathawktu lak tum a ni ang a; a tul dan anga administrative reforms te pawh tih tum a ni. Heng administrative reforms zingah hian sawrkar-hnathawk re-sizing te, department inzul deuh amalgamate te, mipuite'n sawrkarah rinna an nghah ngamna turin mumal zawka sawrkar department-te kalpui kan tum a ni.

DP&AR dinhmun tlangpui chu hetiang hi a ni - Department of Personnel & Administrative Reforms hi Govt. of Mizoram Transaction of Business Rules, 2014-in major department a sawi 8 zinga mi a ni. DP&AR hnuaiah hian wing hrang hrang hetiang hian a awm a:-

1) *Civil Service Wing* – He wing hian All India Service hrang hrangte, Central Service dang te, Mizoram Civil Service Officers te service matter a khawih a, department hrang hranga Head of Department-te transfer leh posting a khawih tel bawk.

2) *Administrative Reforms Wing* - He wing hian Mizoram sawrkar hnuaia administrative reforms lam hawi chi hrim hrimte khawihin, department hrang hranga post creation te, post hnawhkhah te, post nuaibo te leh post siamrem lam kaihhnawihte a khawih thung.

3) *Genral Service Wing* - He wing hian deputation chungchang te, service rules leh recruitment rules hrang hrang kaihhnawihte a khawih a. Mizoram Public

Service Commission kaihnhawih thil pawh he General Service Wing hian a khawih bawk.

4) *Good Governance Cell* - GGC hian service efficiency leh accountability a awm theihnan hma a la a. Awlsam zawkin digital file tracking system te duh angin Secretariat-ah chuan hman mek a ni a. Hei bakah hian MCS Officers-te tan e-PAR - Electronic Performance Appraisal Code te hman a ni tawh a. Sorkar kum thar atang chuan sorkar hnathawk tam zawkte tan hman tura ruahman ani.

5) *Secretariat Service Wing* - ASW hian Mizoram Secretariat Service Officer-te Mizoram Ministerial Service Assistant Grade-te, Mizoram Stenographer Service Matter-te a khawih thung a ni.

6) *Traning Wing* – Hei hian India ram leh foreign sorkar hnathawkte traingin leh zir belhna te a khawih a, Administrative Training Institute a enkawl a ni. Service hrang hranga Officer enkawl dan te, DP&AR hian All Indian Service Officers atanga Assistant Grade thlengin a enkawl a. Tun dinhmunah hian Mizoram sorkar hnuaiiah All India Service Officers dinhmun chu - IAS Officers – 28; IPS Officers – 22; IFS Forest Officers – 16; IRS – 3; Indian Audit and Accounts Service- 1; Indian Railways Account Service - 1 kan nei mek a. MCS Sanction post 254 a awm laiin, Officers 199 an awm a. Mizoram Secretariat Service (MSS) Officers Sanction post 259 a awm laiin, Officer 258 an awm bawk. Mizoram sorkar hnuaiia Secretaries dinhmun Mizoram sorkar hnuaiiah, Chief Secretary tiamin Secretary 30 kan nei a, Cadre hrang hrang ten Secretary post an luah dan chu hetiang hi a ni: IAS - 5 posts; Other All India Services - 5 posts; MCS - 4 posts; MSS - 2 posts; MPS - 1 post; MJS - 1 post; MES - 1 post leh MF&AS - 1 post te anni.

Kumin 2023-2024 chhunga hmalakna langsar zualte chu –

- 1) Kum 2023-2024 chhunga MPSC hna lak zat chu 236 a ni a, MSSSB hna lak zat chu 217 a ni.
- 2) Service hrang hrang promotion approval pek zat – 298; Direct Recruitment hmanga post fill up approval pek zat - 149; Departmental Exam hmanga post fill up -101; PE regularise phalna pek zat - 176; PE fresh engagement pek zat - 26; Service Rules a thara siam leh a hlui amend zat – 42; Compassionate Ground-a hna pek zat - 7, Service extend zat – 9 leh Re-employment pek zat - 16.
- 3) Kum 2023-2024 chhunga recruitment kan pekte Level 10 - MES - 35, AAO - 27, MSS - 21, Assistant Professor - 20, MPS - 16, MCS - 12, MF&AS - 10, High School Headmaster - 10, Mizoram Agriculture Service - 9, Mizoram Horticulture Service - 6, Mizoram Information Service - 5 leh Mizoram Health Service – 5 te anni.

Aikal chungchang:

Mizoram sorkar hnuaiia Secretariat leh Directorate emaw, Sub-Ordinate Office nei Deptt. 42 an awm a, Deptt. 38-ah ai kal la an awm. Aikal lak zat hi 3,365 a ni. Aikal late hi a mal malin chhui chhuah thawkhat an ni tawh a. Aikal awm lohna department 4

an awm a, chungte chu: Excise & Narcotics, ICT department, DP&AR leh Vigilance Deptt. te anni a, an ti tha hle a ni. Aikal la tam *top 6* te chu:

- 1) School Education - 1115;
- 2) Health & Family Welfare - 624;
- 3) Power & Electricity - 253;
- 4) GAD - 239;
- 5) PWD - 119;
- 6) Rural Development - 109 te anni.

Aikal lak chhuanlam hrang hrangte chu:

- 1) Hriselnain a tlin loh vang tih chhuanlama hmang - 2,070;
- 2) Chhungkaw harsatna avang tih chhuanlama hmang - 723;
- 3) Mimal harsatna vang ti ringawt - 350;
- 4) Chhan sawi tur hre lo - 90;
- 5) Hotu liante thupek vang - 35; (hei hi political reason nia hriat a ni.)
- 6) Zirna sang zawk duh vang - 43;
- 7) Tarlan tlak loh chhan nepnawi - 74.

Aikal lak ching ve hi India ram chhungah Manipur deuh chauh hi niin kan hria a. Aikal lak hi recruitment rules leh service rules-ah a awm lo. Sorkar hnathawk tura lakin engvang pawhin a hna a thawk lo a nih chuan, aikal la eng ang mahse, Dan a bawhchhe tho a ni. Zirtirtuin amah aia zirtir thiam a aia kal turin a lo ruai chhawng a niha, zirlaite'n an lo tangkaipui zawk a nih pawhin, Danin a ngaihnatthiam ngawt a thiang chuang lo. Sorkar Danin thawktu damlote chungah khawngaihna a lantir dan tam tak a awm a, chungte chu - Senso tumsak te, medical leave te, half-pay leave te, leave without pay te. voluntary pension te, chung lo pawh chu a awm ang e; Danin a phal chin ramri pel chu kohhran pawhin a thunun mai a, chu chu sorkar tihdan tur pawh ni awm tak a ni. Sorkarin aikal late hi a zirchiang mek a, engvang pawhin ngaihhnathiam dawn ila ramri kham theih a ni lova. Zirchian chhungin Dan chhunga lo inchinfelna chang hria apiang an nihlawh a ni mai.

Sorkar hnathawk mahni thawhna hmun ni lova office danga attached te dinhmun pawh DP&AR chuan a zirchiang mek a, department hrang hrang 27-ah hetiang case hi kan nei a ni. Sorkar hnathawk office danga thawk/attached kan hriat theih chin chu, an vaiin mi 4000 an ni. Group A Officer - 15; Group B Officer - 347; Group C - 242 leh Group D - 193 an awm. Contract employee hmun danga attached-a thawk mi 11 an awm a, chungte chu - Provisional Employees - 257; CSS employees - 1787 te bakah Work-charge employees - 49 te an ni.

Han zeh belh zeuh ka duh chu, Aikal laah khan mitthi aikal te pawh an awm a ni. Mahni post ni lova awm, hmun danga attached hi School Education Deptt. ah 1776; Home Deptt-ah 1282; P&E ah 286; PHE Deptt. ah 227 awmin, heng department-te hi hmun

danga attached a thawk awm tamna department an ni. Attached thenkhat hi chu hna tula vanga department hotute ruahmannaa inhawh tawn an ni thei a, thenkhat erawh chu thawhna hmuna awm hreh vanga thuneitu sang ruaia, rem leh rem lova attached an ni.

Heng zawng zawng aia tha lo chu, officer thenkhatin an mimal hna thawk tura an hnuaia thawkte an chhawr thin hi a ni. He sorkar hian hnathawktu, an awmna tur ni loa awmte a hrekim thawkhat tawh a, a tul angin a bawhzui thuai ang. Hmalakna dangte chu -

1. *e-PAR 2.0*: DP & AR chuan e-PAR portal a siam a, hei hian MCS officer 2022-2023 PAR chu pilot project angin online hmanga tih a ni a, a hlawhtling hle a; a hlawhtlinna avang hian 2023-2024 chhunga Group A officer zawng zawngte hnenah online PAR reporting chu SPARTAN e-PAR 2.0 kaltlangin tih zauh a ni. Mumal taka kalpui a nih theih nan sensitization programme chu ni 26 February, 2024 atanga ni 4 March, 2024 thleng hlawhtling taka kalpui a ni.
2. *Mipui Aw* - State Grievance Redressal portal DP & AR hmalakna in MSEGs nen tang kawpin hon. Chief Minister chuan ni 26 February, 2024 khan official-in a tlangzarh a. He platform hi mipuite hamthatna tur, sorkar laka complain leh lungawilohna thehluh theihna tur online medium awlsam taka siam a ni. A din tirh atang khan he portal-ah hian mi 352-in an inziak lut tawh a, lungawilohna 40 chuang an thehlut tawh a ni. Department hrang hrangte chuan heng lungawilohna hi rang taka chin fel tum in hma an la nghal a ni.
3. *e-Service Book*: DP & AR chuan service book, electronic format-a thlak a tul zia a hria a, sorkar-hnathawkte record vawn leh venhimna atan policy tha tak tak siam a tul hle. He hmalakna kal zelah hian pilot project atan MCS officer zawng zawngte tan e-Service Book roll out tur a thutlukna siam a ni.
4. *GERS*: Government Employee Registration System hi online platform a ni a, sorkar-hnathawkte chanchin pawimawh tak tak dah khawmna atana ruahman a ni. Integrated Financial Management & Information System nen inzawmin, GRS hian data management process tih changtlun a tum a, sorkar sector chhunga government resources dik tak, efficiency leh transparency a nih theih nan hmalak a tum a ni. DP&AR chuan kum 2024-2025 chhunga GERS tlangzarh a nih theih nan leh e-Office kalpui dan tur chu nasa takin a kalpui mek a. Nitin hnathawhnaah electronic platform hmangin office hnathawk culture tihsan a tum a ni. Fianacial year 2024-2025 chhunga Information Communication Technology leh DP&AR chhungah he hmalakna hi enchhin turin ruahmannaa siam a ni a. He kalphung thar tur hi office kalphung leh digital transformation kalphung nen a inmil tura ruahman a ni.
5. *The Mizoram Right to Public Service Act, 2015*: he dan hi tangkai zawka hman tum mek a ni. Kum 10 lai kal ta a mi a ni a, hman tangkai kan tum tan ta a ni.

department hrang hrangah designate officer-te ruat an ni ang a, mipui hnena service an pek theih te puang tam zar tura hriattir an ni a, department tinah inspection te pawh neih a ni.

6. *Administrative Training Institute, Mizoram*: Kum 2023-2024 chhungin State sponsor training programme vawi 32 Department of Personnel & Training-in sponsor programme vawi 14 leh Institute of Secretariat Training & Management Rural Attach Programme a buatsaih a. State training course hi sorkar hnathawk mi 845 in an chhim a, hei bakah hian training hrang hrang mi 869 lain an chhim bawk a. Department of Personnel and Training, Govt. of India hnuaiah mi 781 an training bawk. Sorkar-hnathawk Aizawl pawna training te tan hostel khum 21 awmna chu peihfel a ni bawk. ATI hian January 9-12, 2024 khan MLA thlantlin thar te tan training a buatsaih bawk.
7. *Mizoram Subordinate Service Selection Board (MSSSB) thiah chungchang*: Article 315 of the Constitution of India in mandate a pek angin Mizoram Public Service Commission MPSC hi Mizoram sorkar chuan 30.4.1991 khan a lo din a, Article 320 angin sorkar hna Group A leh B hrang hrang lak chu MPSC hna ber a ni sorkar chuan Mizoram Public Service Commission in a tih theih reng leh tun hma pawh a thianghlim leh fel fai taka a lo tih fo Group A leh B hnalak chu MPSC in tih chhunzawm se sorkar leh MPSC tan pawh a zahawm bawk ang MSSSB hi tullo a sum sen belh mai ni a hriat a nih avangin 29 February, 2024 khan a thiat ta a. MPSC te pawh a tul anga tih chak a thuan zel a nibawk. Hmachhawp dangte leh thil dang: Sorkar hnathawk lakah in streamline a ngai. Department hrang hrangah Group B, Group C, Group D thlengin an in daih lo em em a, khawi department leh sector ah nge thawktu kan mamawh zual tih te assessment kan neih angai takzet mai, clerical level kan inlak vak vak hian lehlamah technical leh professional service lam engineer te, health sector ah thawktu staff nurse te, health worker te, primary education lama thawktu zirtirtute leh midang tam tak indaihlohna avanga establishment tluchhe mai tur tam tak an awm a ni. Ngun taka sorkarin a ngaituah angai takzet a, kan ramin a mamawh hi kan prioritize thiam angai hle mai chumi tur chuan tan kan la chho zel dawn a ni.
8. *Restructuring of Departments chungchang*: Mizoramah department tam zawk hi mipui tana tangkai miah lo in kan restructure thin a, a thawkte promotional avenue ringawt atan department tam tak hi kan ti lian ta thin a. Functional requirement ai chuan officer lian zawk te vested interest kan dah pawimawh hmasa thin niin a lang. Hei hian nasa takin department a ti thuanawp zawk thin a ni. Hei hi kalpui tawh chi miah lovah kan ngai a ni. Field a thawk tak tak te post surrender in directorate lam a officer ten an kaisan nan an surrender a, post tangkai lem lo, post sang pui pui kan nei teuh mai thin a ni. Hlawh leh

kaihhnawihah sum tam tak a luan ral thin a, hei pawh hi fimkhur taka kalpui chhoh zel tum a ni.

9. *Amalgamation of Different Department:* Department hnathawh inang ho hi zirchian a amalgamate tura rawtna fum fe tak nen a kalpui chhoh te pawh a ngai dawn a nih hmel. DP&AR chuan hei pawh hi an zirchiang thuai ang. Service rules recruitment rules, common guidelines anga siam, tunhmain Mizoram sorkar hnuaiah Service Rules leh Recruitment Rules in neih that siak, intlansiakna a tam hle. Thil hrisel lo takah kan ngai.

10. Kum 2019-2020 bawr vel khan Central sorkar leh central pay recommendation tihdan phung angin Mizoram sorkarin common guidelines an nei ve ta a. Common guidelines angin MCS, MF&AS, MAS, MHS leh a dang eng emaw zat siamthat tawh a ni a. Service thenkhat siamthat duh tlat lo, sorkar policy zawm duh tlat lo, common guideline aia nei tha cheu an la awm a. Hengho hi siam that vek tura hmalak tum a ni.

11. Performance review of govt. service under fundamental rights 56 and Rules 48 of CCS pension rules 1972 Mizoram-ah hian he mechanism hi a la awm ve lo a. Central tih dan zulzuiin awlsamte in mechanism hi siam ve nghal theih a ni. Thla 6 danah periodical review of govt. service hi neih thin a ni. Hemi tur atan hian DP&AR pawh kan inpuahchah mek a, hnathawk chhunzawm tlak loha ngaihte chu premature retirement thlenga pek theih an ni. Kalphung thar sorkar chuan LDC atanga Secretary nih theih leh Constable atanga DGP nih theih tih sawi awm thin mentality hi tihbo kan tum bawk a. Kan thalaiteah competitive mind tun aia nasa in awm se kan duh a ni. Sorkar tan hnathawk thei officer efficient leh responsible an tam phah ngei kan ring.

12. *Strengthening of District Administration Sub-Division:* District-ah hian India ram pum kal dan state dang akum 100 chuang an hman tawh leh relevant reng chu DC office hnuaia District office an dah zel hi a ni. Mizoram-ah chuan department zawng zawng inlak hran kan tum a, hei hian mipui tana budget awm tam thei lo in office inenkawlna leh thawktute hlawah a kal ral deuh vek a ni. District-ah hian office awmsa DC office, SP office, Engineering department-te leh Hospital hi a tawk em em a. Department tenau te tan district a office a hranpa a hawn ngai loin DC office atanga function turin DP&AR chuan ruahmanna kalpui a tum ani. Chutiang bawkin sub-division administration hi thuam chak a ngai hle. District leh sub-division administration atan hian GAD hnuaia committee hi dintharte pawh a tul ang a. A tul dan anga zirin DP&AR leh GAD-te pawh la inrawn turin hmachhawp mek a ni.

Pu Speaker, Demand No. 16 - Home hi kan tuipei hle mai a, Zawnha ah pawh hian 100 bawr vel sawifiah tur a awm a. Heng zinga 80 vel hi chu Home Department chhung ami a ni. Pu Speaker, Home Department tih a nih chuan mitin rilruah Police hi a lang lian ber a. mahse Home Department hnuaiah hian department pawimawh tak tak 6 lai a awm a, chungte chu: Police bakah Fire & Emergency Service, Prison, Mizoram Home Guard & Civil Defence, Forensic Science & Laboratory, Sainik Welfare & Resettlement te hi an ni.

Police:

Memberte pawhin an ngaihven a nih a rinawm. Home Department-a zawnha tam tak chu Police chungchang a ni a. Hotu lawkte police kan ni bawk a, kan hmunpuia kan hotu lawkte rawn tarlang lawk ila - Police Headquarters min uaptute chu - Director General of Police; Addl. Director General of Police (hei hi 1 awm tur a ni a, tunah tak hian kan neih loh lai a ni); Inspector General of Police – 3; DIGP- 6; IGP - 6 bawk kan nei a ni. Heng officer-te hian PHQ an thutchilh a ni.

Law & Order kenkawh chungchanga a remchanna turin Mizoram hi range 3-ah then a, chungte chu: Southern Range, Northern Range leh Eastern Range ah te then a ni. Range te hi DIG ten an ho a, Southern Range hi a hla in a karkik deuh a, ‘Lunglei atanga vil ni se’ tih a ni a, Northern Range leh Eastern Range hi chu Aizawl atanga vil hi kawng hrang hrang atangin a remchang zawk a ni. District 11-ah SP-in an awp a, Sub-Division – 18; Police Station - 40 leh Special Police Station - 4 kan nei a ni. Tin, Police Outpost - 12 ; Beat Post - 7 leh Border Outpost - 22 kan nei mek bawk. Armed Battalion - 8 kan neih zinga 3 chu Mizoram Armed Police (MAP) an ni a, 5 chu Indian Reserved Police (IRP) an ni.

Post ruak Police Department a post awm zawng zawng hi 12,236 a ni a, post ruak hnawh khah loh zat hi 4,268 a chhinchhiah a ni a, post luah mek chu 7968 tihna a ni awm e. Hei hi a dik chiah theih loh chhan a awm a, he figure lak khawm hnua sunte pawh kan nei a, tin, pension te pawh an awm awm e. Chuvangin, figure lakkhawm hnu a post ruak awm zat chu post 4268 a nih chu; chuti a nih chuan, post awm zawng zawng zinga 65 kan luah tihna a ni ang. Figure hi nitin a danglam thei a, sum harsatna vangin post ruak hnawh khahna turin mi thar lakluh a remchang si lo a; engpawh nise, Police Department a post ruak heti zozai hnawh khah lo a awm hi chu sawrkarin a hlamchhiah rei thei lo ang chu.

Law & Order chungchang:

Law & Order lamah chuan, tunlai hi Mizoram a ralmuan lai tak a ni awm e; ramri lamah boruak ralti a awm lo a, ram chhungah harsatna a awm lem lo bawk a, kan vannei hle a ni. Ramri vengtu BOP lama kan sipaite erawh chu an thawkrimin an hah em em a, Boarder Guarding Force dang, BSF leh Assam Rifles te nen ram venhim kawngah chuan kan thawk ho tha a, international ramri velah chuan ngawrh takin patrolling neih

mek a ni. Harsatna thenkhat, khawchhak lama kan thenawm thenkhat Myanmar ah ram rorelna a mumal rih lo a, Covid – 19 hri pui avanga international boundary khar khan, sawrkar laipui Minister of Home Affairs lamin an la sut bawk silo a, sut turin vawi tam tak kan ngen a, a la hlawhtling theilo a ni. Hei hian ruihhlo leh bungraw hnawk chi tawlh ruk a ti awlsam teh tlat a, ven a ti harsa thung a ni. Police te leh khawtlanga tlawmngai pawlte tangrualin theih tawp an chhuah mek a, Excise Minister fit tak kan nei a, Excise force te, Police te leh tlawmngai pawlte leh uniform ha dang zawng zawngte nen tangrualin ruihhlo dodal kawng theih tawp kan chhuah a, ruihhlo hluar zel tur pawh a ziam phah hle in a lang. Inthlahdah hauh lo a kan tan ho zel chuan, Mizo thalai nunna tam tak kan chhan chhuak thei ang.

Sawi hlawh tak dang chu, ram pawn atanga lo lut, kuhva hi a ni. Kuhva sawi hi tuman lo huphurh lo ila, kuhva hi Mizoram chhungah chhungkaw sing dawn laiin eizawna atan an ching a, leilung behchhan eizawna nghet a nih avangin sawrkar pawhin a ngai hlu a ni. Sawrkar pun buai ngai lovin hralh chhuah dan kalphung fel tak a awm thin a ni. Police chungchang sawi chuan, kuhva chungchang sawi tel a ngai zel a. Tunhmain foreign atangin kuhva tam tham lovin a lo luta, a hnawk tham lo; check-gate-ah pawh Police duty ten an lo man ngai lem lo. Tin, a tawlhute paw'n dan kalh a nih an hre bawk lo. Tunhnuah hian foreign atangin kuhva a lo lut hnem ta hle a, ramchhunga kuhva chingtu, kuhva thartute inhralhna a tibuai ta hial a, Sorkar tha hmanga khap a ngai ta a ni.

Kan Chief Minister hi Mizorama thlaithar thlavang hauha kum rei tak lo vakvai tawh a ni a, a kaihhraina hnuaiyah khauh takin kuhva veivak chu khap a ni ta a, kan vannei ta hle a ni, ti teh ang. Thawk leh khata zei han thlak thut erawh kan Police-te pawhin a tirah chuan an thiamlo lek lek a, mahse Sorkar duhdan hrethiamin tunah chuan foreign kuhva phur reng rengin Police check-gate an paltlang tawh lo niin kan hria a, helna erawh chu an hre thei khawp mai. Hmun dang check-gate-ah pawh Sorkar duhdan tha taka zawm an ni chhonzawm ta zel a, mipuite pawhin Police chungah rinna an nghat thar leh ta hlein kan hria.

Police Transformation:

Mitin hian intuaithar kan ngaia, insiamthat reng kan mamawh vek; chumi zingah chuan Police-te pawh kan bang chuang lo. Ram leh mipuite sahimna kawnga mawhphurtu, dan zawm tura mipuite hmaa kal tur kan nih avangin intuaithara, insiamthat mamawh pawl ber kan nih thu hi kan sawi chamchi a. Dan chhungah pawh lo nise, kan lo tihthin dan tam tak chu dan chungah tho thlakthleng ngai a tam hlein ka hria. Police hotute hnena rawngbawl tura ruat ka nih hlim khan tunhma lama mipuiten Police an lo sawi thin dan te, an lo sel thin dan te ka sawi chhuaka. Ban san ngai te bansana, chin thar ngaite huaisen taka ching thar turin rawtna ka siam ve nuala. Ka rawtna siam te chu senior officer ten tha takin an dawngsawng a. Tunhma lama an lo chin than thenkhat thlakthleng atana an duh rawtna an siam nual nghe nghe a ni. India ram state dangah

Police ten checkgate-ah zalen takin lirthei veivak lakah pawisa an lo dil thin a ni maithei. Kan ram checkgate-ah lo ching thin an awm a nih chuan, ‘tawp tawh rawh se’ kan ti a. Chu rawtna chu lungrual takin kan rel thlu a ni. January 4, 2024 khan checkgate-a pawisa khawn khapna thupek kan chhuah ta a, lawmawm kan ti takzet a. Ka rawtna tipuitlingtu, kan Police officer-te chungah leh, hah taka gate duty thinte chungah lawmthu ka sawi a. Hun lo kal turah pawh chhawm nung zel turin ka beisei a ni.

Hei bakah hian, keimahni manual chhiar thar leha lo bawhchhiat palh kan neih chuan, lirthei kawl chungchangah te, private hnathawka tana sipai chhawr chungchangah te, insiamthat ngai apiangah officer-te chu hmahruai turin ka beisei thu ka sawi a, thinlung takin an lawm vein ka hria a, chu chuan min tilawm em em a ni. Mizoram-ah mi pangngai thoin Police kan din dawn niin ka hria a, mipui rinngam, Police-thar a piang ta niin ka hria.

Traffic Police leh lirthei:

Traffic control lamah hian Mizoram Police-te hi India rama titha pawl taka ngaih an ni. Aizawl khawpui hi hruaitu hmasa te’n traffic jam awmlohna khawpuia siam an lo tum tawh a, a harsa ngang a ni ang; an hlawhling zo lova. Chuti chung chuan ‘*bengchheng lova lirthei inzui theihna khawpui*’; (traffic ho tawngkam a ni awm e) *Lane driving and no honking* - khawpui zinga chhiar kan ni ve a, Goa leh Nagaland state atang tein an rawn zir hial a nih kha. Hei hi kan traffic police te rim taka an thawh rah a ni. Traffic a jam vang ringawt hian Traffic Police te an hlawhchham tihna a ni lo a. Traffic jam manage danah te khan kan police te an ti tha em em a, State dang atanga rawn zir thamin an thawk tihna a ni.

Hmunhma tihphuisuina lam:

Hei hi zawhna a tam hle mai a. Mizoram Police te hmunhma tihphuisuina a tan sorkar laipuiin *Special Assistant to State for Capital Investment (SASCI)* kan tih mai hnuaiah crore ₹50 min rawn pe a. Hemi atanga crore ₹25 chu 1st installment a tan an rawn release nghal a ni. He sum hmang hian Aizawl District Mizoram hmar lam area-a Police Station hrang hrang sak thata tihphuisui tum a ni a. Police Staff Qarters tla bal tawh takte sak that tum a ni baw. 2nd installment a lo kal leh hunah helamin an chuh kan awih lovang a; Mizoram chhim lam area-ah Police hmunte tihphuisui nan hman tur a ni ve thung ang.

Fire & Emergency Service:

Sorkar kum kal mekah hian in kang 31, ram kang 140 leh emergency call vawi 43 te avangin kan Fire Service te vawi 214 lai an thawk chhuak a. Kangmei kaihhnawih a an thawhrim avanga bungraw humhim hlut zawng hi chhutchhuah dan chuan, crore ₹42,85,000 lai a ni. Fire & Emergency Service hian zirna inah te, damdawi inah te, sorkar-pisa ah te kangmei chhuah palha him taka inthiarfihlim dan an zirtir thin a ni.

Prison:

Prison Department-in tuna jail a neih mek chu: Central Jail - 1, District Jail - 8 leh Central Women Jail - 1 a ni. A chanchin chu memberte'n kan hriat chipchiar viau kha. Heng jail hrang hrang hi mi 1,386 tan theihna tura siuam a ni. Chhinchhiahna hnuhnung bera jail tang mek zat chu mi 2,189 an tling a. Mi a dawlzawh zat atanga chhutin 57% an tang tihna a ni. Jail tang an tam lai berin 2,256 an tling a, 62% an tang tihna a ni. Jail awmsa te hian min dawl zo lo hle tih hriain theihtawp chhuahin sorkar a inbuatsaih a ni. Tun hnaiah open jail a tan project siam a ni a; Mizoram tan open jail hi a tha dawn em, tih zir chian mek a ni. Chawhma lama zawhnaah khan jail tihphuisuina a tana ruahmanna tarlan a ni a. Approve a la ni chiah lova, crore ₹55 nei thei thuai turah kan inngai a ni.

Forensic Science & Laboratory:

Forensic Science & Laboratory hi kum 2000 a din kha a ni a. 2015 khan directorate puitlinga hlankai a ni. Pawi khawihna a mawhphurtu chhuichhuahna a tan Mizoram Forensic & Science Laboratory hian a lo thawh hlawk em em thin a. Kum 2023 chhung khan case 1,413 leh sample 15,755 exam a ni a, Hmarchhak bialah case khawih tam ber dawttu kan ni hial a ni. Tin, rampum huapin *Best Case Award* te pawh kan lo dawng tawh a ni.

Demand No. 30 - Disaster Management & Rehabilitation-ah kai ila. Pu Speaker, he House zahawm tak hi Disaster management & Rehabilitation Department budget min pass pui tura ka ngen pahin, he department hnathawh dan tlangpui hi han sawi hmasa ila.

DM&R hi khuarel chhياتna hrang hrang a thlen pawha chhawmdawlina thawktu ni mai lovin, chhياتna thleng palh thei laka ven hna thawktu an ni. Min pass pui theih chuan, member zawng zawngte hi lawmmanah polythene bag 5 theuh kan pe dawn a ni; silpauline bag 5 theuh zawk. (Aw.. silpauline hi polyethene tho a nia.) Tlang ram kan ni a, leimin leh leitawlh te kan tuar thin. Monsoon area-a awm kan ni a, ruah te, thli leh rialte'n min tibuai fo a; tuilian kan buaipui fo bawk. Khuarel chhياتna tuarte chhawmdawlina pek theih dan sorkar laipuiin bituk fel tak a siam a, state sorkarin kan duh anga lo belh leh pah a rem lo a ni.

15th Finance Commission ruahman dan chuan khuarel chhياتna tuarte tanpuina hi sorkar laipuiin 90% a tum a, state sorkarin 10% a tum ve a ni. Tunhma chuan DM&R sum hi 'state-disaster response fund' tiin sum hlawm khatah dah a ni mai thin a. 15th Finance Commission khan 'State disaster Est. Management fund' tia vuahin, hlawm hnihah a rawn then ta a. Chhawmdawlina hna thawhna tur chu *state-disaster response fund* tiin, 80% a dah a, invenna lam tur chu *state disaster mitigation fund* tiin, 20% a dah a ni. 15th Finance Commission-in kum 5 chhunga tan sum ruahman a neih dan chu: 2021-22 - crore ₹52; 2022-23 - crore ₹54; 2023-24 - crore ₹58; 2024-25 - crore ₹60 a rawn ruahman a ni. Tichuan, kum thar 2025-26 atan pawh crore ₹63 ruahmanna awm sa a ni.

Kum 5 chhunga hmuh chu - central share crore ₹259, State share crore ₹28; a vaiin crore ₹287 a ni.

State disaster response fund hi chhinchhiahna hrang hrang - cyclone, lirnghing, kangmei, tuilian, leimin leh khuarel chhiahna dangte tuarte rang taka chhawmdawlina atana hman thin tur a ni. Sum hman dan turah commission-in guideline a siam khauh riau a, 'rang taka hman tur' a ti chungin, a hman ran ngawt theih lawi si lova; chu chuan hma lak zung zung a harsat phah a ni. Kum thar tur 2024-25 atan sum kan hmuh dan chu: Central share - crore ₹54; State share crore ₹6; a vaiin crore ₹60/- a ni. Hemi atang hian sum kan hman theih dan chu - Chhawmdawlina response fund atan crore ₹48; invenna atan crore ₹12 a ni. Invenna lam mitigation fund sem dan turah guideline a khauh viau mai a. State level-ah state disaster management authority a awm a, a hnuaiiah appraisal committee siam a ni a. District tinah district disaster management authority a awm leh a, disaster management authority hrang hrangin an huam chhungah invenna atan ruahmanna an siam chu appraisal committee-in a lakhawm a, uluk taka finfiah hnuah state executive committee remtihain sum pek chhuah chauh a ni thin. Committee chhawng 3-4 a kaltlang hmian sum a pekchhuah mai theih thin loh a ni.

Mahse, chhinchhiahnaa a lan dan chuan, hetia kan fimkhur avang hian nikum fur kha kum dang aiin chhiahna kan tuar nep deuh a. Invenna lam uluk taka ruahman a sawt hlein kan hria a. State sorkar tana thawh harsa hna lian tham leh sum senso hautak chinte chu national disaster management authority lamah theh luh thin a ni a. Amaherawhchu, tunah hian tihdanphung thar National Landslide-risk Mitigation Programme an ruahman mek avangin, project thar engmah a kalpui thei rih loh a ni.

Assembly zawhnaah pawh lo lang - New Colony-III Siaha Sinking area te, Lawngtlai-III leh Lawngtlai Electric Veng lei-tlahniam te leh Mamit Bazar Veng lei-tlahniam te pawh a project a lian tham deuh a, National Disaster Authority lamah bawhzui a ngai a; Union Home Ministry lamin an approve hun nghah vek a ngaih avangin, hmalak chhunzawm theih a ni rih lova. MP Election te hi a zo ang a, a theih anga chaka bawhzui zel tum a ni ang. *Up-scaling of Aapda Mitra Scheme* - hmun thenkhatah chhiahna a lo thlen hian sorkar mi leh sate a hmun kan thlen hmian mitlawmngai pungkhawmte'n tih tur awm ang ang tiin nasa takin an lo thawk hman tawh thin tih sorkar laipui chuan a hria a. Chutiang hun atan chuan chhawmdawl hna thawk turin tlawmngai pawl leh khawtlanga mi-inpe te mumal taka training peka thuam chak a pawimawh tih hriain, *Aapda Mitra Scheme* hi an rawn duang ta a ni. He ruahmanna hnuaiiah hian Aizawl District ah mi 200 training pek an ni tawh a. He Aapada Mitra Scheme hlawk zia hi hriain sorkar laipui chuan up-scaling of Aapada Mitra Scheme a rawn duang a ni. Hemi hnuaiiah hian Mizoram bikah pawh District 5 – Lunglei, Serchhip, Mamit, Kolasib leh Champhai ahte volunteer mi 100 theuh training pek an ni.

Nikum lawka Sairang bula rail kawng chima tangkai taka chhawmdawl hna thawktute pawh kha, he scheme hnuaiiah volunteer training te anni. Chhiahna hrang hrang thlenah

heng volunteer-te hi an tangkaiin thla an timuang hle a. Training of State Disaster Response Force Mizoram MAP leh IR Bn. pariat kan neihte chu SDRF din theuh tura tih anni. Kum 2010 atang khan mi 853 in training an zo tawh a, tunah hian, la service mek 495 chauh an awm tawh a, indaih lohna a na hle a ni; a train tawh zinga mite kha an lo pension tawh tihna a ni. Chuvangin, MAP leh IR Bn. thenkhatah training pek zawh leh a ni a, mi 162-in training an zo leh tawh a, battalion dangte hnenah pawh training hi pe chhonzawm zel turin inbuatsaih mek a ni.

Emergency Support System hi Govt. of India-in, '*Extension of Emergency Responsible of Support System*' tiin, mangan thu hlaa number pakhat 112, zualkona tur Police lamin an enkawl mek chu changtlung leh zuala kalpui tura hmalak a ni a. Disaster chi hrang hrang lirngging, leimin, kangmei, thlipui leh hmeichhia leh naupangte chung a hleilenna lo awm thin ten an manganna thu thlenna tur atan he scheme hi changtlung zawka thuam tura duan a ni. Hmanraw tul ang angte sorkar laipui hian an rawn tum vek a, chung chu an rawn vuah thlap tawh bawk a ni. He Phone no. 112 hi State control room-ah engtiklai pawha viltu tur Supervisor pakhat leh Operator 6 lak an ni a, englai pawha biak pawh theihin an vil reng a ni.

Research & Response Equipment pawh DM&R Department chuan rikrum thlen thuta hman tur hmanrua pawh a neih belh zel a, hengte hi State Emergency Operation Centre leh District Emergency Centre-ah te kawl a ni. Tin, State Disaster Response Force awmna Armed Polic leh IR Bn. ah te pawh hmanrua chi hrang hrang an mamawh ang te sem a ni a, heng hmanruate hi a tul huna hman mai theih tura tana ruahman a ni.

Information, Education & Communication (IEC) hnuaiah hian khuarel chhiatna, a bikin - lirngging, leimin, tui tla, tek tla, thlipui, cyclone leh heat wave lo thleng thei laka mipuite tih tur leh tih loh tur leave-let chu district tina school naupangte hnena sem chhuah a ni a, hemi kaihhnawih tho thu ziak district tina hmun remchang lai laiah tar a ni bawk.

A tawp berah chuan, kan sawi tawh ang khan 15th Finance Commission ruahmanna siam angin SDRF leh SDMF hman dan tur hi guideline fel tak siam a ni a. SDMF hnuaia hnathawh tur project hrang hrang pawh Chief Minister chairman-na - State Disasters Management Authority-in a din Appraisal Committee chuan uluk takin a lo thlitfim a ngai a. He Committee-ah hian Secretary, DM & R Deptt. chu Chairman niin Deptt. hrang hrang atangin member ruat an ni. Appraisal Committee-in uluk taka a thlan hnuaia Chief Secretary Chairman-na State Executive Committee approval lak leh a ngai bawk a ni. Hetianga a chhawn deuh duat avang hian, chhiatna thleng thei laka invenna lam hna *mitigation works* bik hi duh ang diak diaka thawh chak a har khawp mai a, member zahawmtakte leh Mizoram mipuite hriatthiamna pawh ka ngen a ni. Chhiatna lo thlen thuta chhawmdawlna tur sum erawh chu *items and norms*-in a phal ang zelin SDRF - Response Force atangin pek theih reng a ni.

Pu Speaker, Demand 46 - Urban Development & Poverty Alleviation Department (UD&PA) hi thlur hnih - UD & PA Directorate leh SIPMIU in kan inthen a. Directorate-ah hian Wing pahnih - Town & Country Planning leh Sanitation te an awm leh a, heng bakah hian Aizawl Smart City Limited a la awm bawk a, Municipal pahnih te hi UD&PA kaltlanga enkawl an ni bawk. Centrally Sponsor Scheme chili kan enkawl bawk a, chungte chu – Swachh Bharat Mission, Atal Mission for Rejuvenation and Urban Transformation (AMRUT), Housing for All leh National Urban Livelihood Mission te anni.

UD & PA hian District 8 ah office kan nei ve bawk a, officer thutchilhtu erawh chu kan nei hleitheh lova, office dang atanga kep kan ni deuh fur mai. Tin, Lawngtlai leh Siaha-ah Livelihood Mission Project office kan nei bawk.

Directorate-a kan Wing-te luhchilh ila –

Town & Country Planning: A hnathawh ber chu, kan khawpui hote than dan tur development plan mumal taka ruahman a ni. A tlangpuiin kum 20 lo awm tur thlir lawkin plan hi siam thin a ni. Kan thawh mekte chu –

- i) Champhai Town: Master Plan kan zo tawh a, 2041 thleng hman theih tura ruahman a ni a, Notified a ni tawh.
- ii) Kolasib Town: Geographical Information System-base map buatsaiha zawh fel a ni tawh a, survey chhawng hnih - primary and secondary pawh zawh tawh a ni bawk a, uluk taka zirchian zui mek a ni.
- iii) Khawzawl Town: GIS-base map buatsaih zawh tawh a ni a, survey pawh zawh tawh a ni a, uluk taka zirchian zui mek a ni.
- iv) Saitual Town: GIS-base map buatsaih mek a ni a, AMRUT sub-scheme hnuaiyah Saitual khawpui remfel dan tur buaipui mek a ni bawk.

Sanitation:

Sanitation - Thianghlimna lama kan hnapi deuh ber chu, bawlhhlawh sawngbawlna - Solid Waste Management Center siam hi a ni awm e. Tuna kan thawh chin chu - Aizawl leh Kolasib-ah management center siam zawh tawh a ni a, bawlhhlawh thliara sawngbawl mek a ni. Tuna thawh mekte chu - Champhai, Lunglei, Hualngo Hmun leh Luangmual te an ni a, heng bakah hian Serchhip, Khawzawl, Mamit, Hnahthial, Lengpui leh Tlabung-ah te pawh bawlhhlawh sawngbawlna siam tura hmalak mek a ni. Tin, District pali - Siaha, Lawngtlai, Saitual leh Lunglei-II atan tender chhuah mek a ni bawk.

Local Urban Bodies Corporation, Finance Commission 15-na khan kum 2023-2024 atan Urban Local Body Fund lakh ₹3,900/- a dah a, budget ah khung luh a ni. Demand for Grants 2023-2024-ah khan AMC leh LMC pualin sub-head 3 kan nei a, chungte chu –

State sum dahna:

Hei hi, 'absolute share of local bodies' tih a ni a; Mizoram State Finance Commission in a recommend thin a, Finance-in budget ah a lo dah mai thin a ni. Heta tang hianin AMC hian thlatin, thawktute - Corporator, Officers & Staffs leh Local Council te tel vekin hlauh a pe thin a ni. Untied Fund, Central Finance Commission ULB untied grant hnuaiah hian kumtin grant hmuh a ni a, kum hmasa 2022-2023 Urban Local Body Fund 1st leh 2nd Instalment lakh ₹1400/- chu kumin atan dawn a ni a, AMC ah pek nghal a ni; kum 2023-2024 ULB Untied Grant erawh chu dawn a la ni lo thung. Finance Commission atanga ULB Fund lo kal State sorkarin a lo hren khawtlai avanga penalty nuaih tamtak kan chawi thin ang kha, kalphung-thar sorkarah hi chuan pumpelh tum a ni. Local Body te tan Jubilee dar vuak an tum a ni.

Lunglei Municipal Council Cabinet Committee in Ni 14.11.2021-ah thukhawmin a lo pass tawh a, Lunglei Municipal Council chu Ni 13.1.2023 khan hawn a ni a. A vawikhatna atan Ni 29.3.2023 ah Lunglei Municipal Council inthlan a ni a, Ni 3.4.2023 ah vote chhiar a ni. Ward awm zawng zawng 11 wards ah ZPM party candidate te an tling vek a, Ni 18.4.2023 khan Lunglei Municipal Council chu a function tan ta a ni. Lunglei Municipal Council atan hian kum 2023-2024 chhung hian cheng nuai 172.81/- State sorkar atangin hmuh a ni.

Technical Works:

Kum kal ta 2023-2024 chhunga hna thawh zawh tawh te chu –

- i) Govt. Multi Utility Center, Thakthing Veng, Aizawl ah sak zawh a ni.
- ii) Truck Terminal, Champhai Zotlang ah sak zawh a ni.
- iii) Tlangsam leh Hmunhlui Park inkar kawng tihzau a cement concrete road siam a ni.
- iv) DUDO office Hnahthial leh Khawzawl ah sak a ni.

Hna kal lai mekte chu:

- 1) Gallery for playground at Mamit;
- 2) Multi-purpose Community Centre at Zonuam;
- 3) Multi-level Car Parking at Ramhlun South;
- 4) Multi-purpose Community Hall at Ramthar, Aizawl;
- 5) Multi-purpose Community Hall at Mission Veng;
- 6) Zodin Multi-level Car Parking cum Utility Centre, Aizawl;
- 7) Convention Centre phase-I leh phase-II;
- 8) Multi-purpose Hall at Chawngte;
- 9) Public Utility Project-cum-Vegetable Market at Chaltlang;
- 10) Sanitation Site Office at Tuikual South;
- 11) Community Hall at Ramhlun North, Aizawl;
- 12) Bungkawn Community Hall;
- 13) DUDO office at Saitual;
- 14) Artificial Turf at Thosai (Hei hi chu kan zawh deuh thuak tawh);

- 15) Auditorium at Vengthar, Khawzawl;
- 16) Sewage Canal-cum-check dam at Kanan - Dawrpui Vengthar;
- 17) Multi-utility cum Community Centre at Tuikual North;
- 18) Solid Waste Management Centre at Lunglei;
- 19) Chawnpui Sport Centre extension;
- 20) Multi-purpose Community Hall at Zuchhip, Khawzawl;
- 21) State Ombudsman office - Local Body hrang hrangte thubuai ngaihtuatu turin Ombudsman din a ni a, Directorate of UD&PA demand atangin senso te pe a enkawl an ni.

Poverty alleviation:

Thunawi - Vawikhat chu kan office sir te bulah, keini department hi sum hlawm lian lam - urban development ngawt kan tuipui viau a, retheite chawikanna - poverty alleviation lam hi kan hlamchhiah deuh a ni lo maw, ka ti a. Ka naute chuan min chhang lem lo a, an nui mai a. Vawiina sawichhuah tur kan hnathawh dan kimchang an han ziak a, ka'n chhiar ta a. Rethete chawikanna lama kan thawh nasatzia ka hmuh hian, ka zak khawp mai, kha zawhna ka lo siam kha; he House atang hian kan officer-te hnenah ngaihdam ka dil duh hial a ni.

UD&PA in mihnuaihning lam a buaipui dan thenkhat chauh han tarlang ila – Housing for All Mission hi India ramah 2015 khan din tan a ni a, Mizoram-ah pawh kalpui ve nghal a ni. UD&PA kutah a awm a, ruahman dan chuan kumina tawp tur hi a ni. He scheme ang chuan ram nei, insakna tur neilo hnenah tanpuina cheng ₹1,50,000/- pek tur a ni a, ₹50,000/- talin do let ve tur a ni. Cheng 2,00,000/- chuan chenna tlak pangngai sa thei tur a ngaih a ni. Hei hi khaw 23-a in 37,224 sakna tur pek a ni a, tunah hian in 5,151 sak zawh tawh a ni. *Housing For All* mission hi kumina tawp tawh tur a nih avangin, insak tanpuina dawngtute hian December Ni 31, 2024 hma ngeia sak zawh vek tur a ni.

National Urban Livelihood Mission tum bul ber te chu - khawpui a miretheite'n lei rem an rah ve theihna tur Self-help Group dina thiam thil zirtir te, skill training pek te, mirethei loan pekchhuah te, kawngsira inzuarte (street-vendors) dan hmanga an chanvo humhalh sak te, harsatna vanga kawthlera riak thinte tana riahna tur In buatsaihsak te a ni.

National Urban Livelihood Mission hnuai UD&PA hnathawh te chu –

- 1) Kum 2023-2024 chhung hian Self-Help Group din tura target 100 khumin Self-Help Group 104 din a ni;
- 2) Revolving Fund 10,000 theuh, self Help Group 139 hnenah pek chhuah a ni; (Kan lo ngai sual palh thei a, 104 hi kum khat chhunga din chauh a ni a, 139 hi a awm sa te nena chhiar a ni)
- 3) Tunah hian Livelihood Mission hnuai Self Help Group 1365 active tak an awm mek; Training chi hrang hrang - Puantah te, chhang siam te, snacks and sweets siam te, laphiar te, pickle siam te leh a dangte pek thin an ni;

- 4) Mamit leh Kolasib District-a Self-help Group memberte tan kuhva kawr hmanga disposable plate siamna khawl pek tura ruahman mek a ni;
- 5) Entrepreneurship Development Programme training neih pui tum a ni bawk; Employment, True Skill, Training and Placement hnuaiyah kumin 2023-2024 chhungin course hrang hrang: baking, technician, assistant electrician, tailoring, beauty therapist leh a dangte mi 1,106 hnenah free skill training pek a ni;
- 6) Training assessment pass-te hi National Skill Development Corporation approved certificate pek thin an ni;
- 7) Kum 2023-2024 hhungin mi 875 te chu certificate pek an ni a. Mi 738 lain eizawna an nei thar bawk;
- 8) Heng bakah hian district tinah training batch thar kalpui tan mek a ni a, kuminah 1620 training pek zawh tum a ni;
- 9) Self-Employment Programme mimal sum dawnna te-nau bul tanna atan kum 2023-2024 chhungin interest subsidized loan, mimal 106 leh Self-help group 21 te hnenah pek chhuah a ni a;
- 10) ACP hnuaiyah hian mi 2003 leh Self-help group 253 hnenah interest subsidy loan pek chhuah tawh a ni bawk. Loan pek chhuah tur te hi entrepreneurship development training uluk takin neih pui thin an ni.
- 11) *Support to Urban Street Vendor*: Khawpui chhunga thil zuarte dan hmanga an himna tur ngaihtuah leh enkawl hi Livelihood Mission thil tum zinga pakhat leh hma lakna kal reng a ni a. The Mizoram Street Vendor Protection of Livelihood and Regulation of Street Vending Rules & Scheme, 2017 hnuaiyah vendors-te himna tur leh mumal zawka an inzawrh theihna tur mumal taka ruahman a ni. District hrang hrangah Vending Zone mumal zawk kalpui tur leh chung vending zone ah chuan vendors-te mamawh hrang hrang: toilet-te, pavement-te, common storage room-te, vending cart-te, waste disposal facility-te siam tur a hmalakna kalpui mek a ni.
- 12) *Shelter for All Urban Homeless*: Shelter for Urban Homeless damdawiin a awm damlo chhungte awmna tur Khualbuk (Patient Attendance Shelter) chu Aizawl, Champhai, Kolsaib, Lunglei, Serchhip, Mamit, Lawngtlai, Siaha leh Khawzawl-ah te shelter 13 sak zawh fel tawh a ni a, tangkai taka hman mek an ni a. Aizawl, Lawngtlai leh Hnahthial-ah te sak belh mek an ni.
- 13) State Cancer Hospital, Zemabawk bula Cancer damlo leh an chhungte tana Khualbuk sak tawh sa leh Lunglei tana Women Shelter sak tawh sa chu extension tih mek a ni bawk. Home 52 hnenah shelter mamawh hrang hrangte pek an ni bawk a, mattress te, khum te, RO water filter te, solar water heater te, solar inverter te, fire extinguisher te, CCTV te, bungbel, thleng leh no, gas connection thlengin.
- 14) Heng bakah hian Khualbuk (Patient Attendance Shelter) chu Serchhip, Saitual, Kolasib, Lunglei, Lawngtlai leh Siaha-ah te sakna tura hmalak mek a ni PM-SVANN – Prime Minister - Street Vendor Adma Nirbhar Nidhi' tihna a ni. June, 2021 khan kalpui tan a ni a. He scheme hnuaiyah hian street vendor ten loan ₹80,000/-

a pung tlemte awmin an la thei a, heng loan te hi installment 3-a pekchhuah thin a ni. Tin, he scheme hnuaiah hian mi 2,099 ten loan an la tawh a ni.

Swachh Bharat Mission:

He beihpui thlakna hian a tum ber chu India hnampa Mahatma Gandhi piancham 150-na 2.10.2019 hmaa India ramhi pawn lera inthiar awm tawh lohnaa open defecation free hmun leh ram fai leh nuam taka siam hi a ni. Mizoram hi North East State-te zingah pawn lera inthiar awm lohna state-ah 2017 khan puan kan ni. Swachh Bharat Mission hnuaiah hian kawng hrang hrangin a hnuaia tarlan ang hian hmalak a ni-

- 1) Solid waste management in cities & town in Mizoram: Rampumah bawhlhlahw tih tlem leh a awm chhun pawh UD & PA tih tlem kan tum avangin disrrict khawpui leh urban town zawng zawngte tan bawhlhlahw paih leh sawngbawlna hmun tur Solid waste management Centre Project-te kan buaipui mek a ni.
- 2) Swachh Bharat Pilot Project atan Kolasib solid waste management centre ₹7.08 crore sengin din a ni a, Rengtekawn leh Bairabi inkarah Ni 3.9.2021 khan hawn a ni.
- 3) Information, Education & Communication activities leh capacity building faina thu ziak banner, poster, sticker, hording, print-media leh electric-media hmangin a zau thei ang bera faina leh thianghlimna kawnga in zirtirna neih tir thin a ni a. NGO hrang hrang YMA, MUP, MHIP leh school naupangte nen faina hnatlangte neih thin a ni. Mizoram clealiness competition 2017 atang khan Mizoram khawpui fai inelna a buatsaih thin, tunah chuan district khawpuite aiin thingtlang khawpuite an fai tawh zawk a, an entawn tlak zawk bawk.

UD&PA-in rethei chawikan leh faina kawnga hna alo thawh dan hi sawi sen a ni lova, Lal Isua kha Mizoramah lokal se UD & PA hi faina kawngah chuan a rawn pan chawtin kan ring a ni.

Smart City:

Hei hi tawite ka'n sawi leh lawk ang e. Aizawl smart city limited hnuaia hnathawh te - Entrepreneur centre, Incubation centre leh ED centre te hian thalaite eizawna kawng zawng duh inkaihhruainaa hman atan buatsaih a ni a, entrepreneurship development lama midangte vei eizawn dan bul tan duh te intawhkhawmna hmun tangkai tak tur a ni a. Raj Bhavan opposite, Planning Department luah mekah hian a awm a, Planning Department leh LESDE lam hmanraw tangkai tak tur a ni. A hmalakna te chu -

1. *Common Bio-Medical Waste Treatment Plan* - Hei hi district 5 Aizawl, Kolasib, Mamit, Serchhip leh Saituala damdawiin bawhlhlahw zawng zawng sawngbawlna hmun tur a ni a. Tuirial Solid waste management center chungah a awm a, peih tep a ni a. Hman theih hunah chuan thianghlimna leh hriselna kawngah a tangkai khawp ang. District danga hospital te hman tur pawh la ngaihtuah chhunzawm tur a ni ang.
2. *City Centre at New Market* - Hei hi Aizawl bazarpui sak that mek hi dawr 1,105 leng tura ruahman a ni a, India ram puma Smart City project tha thlan pali-ah a tel phak a ni. Solid Waste Management Centre, Aizawl tlak lam Local council

20 huamchhung a mite bawlhhlawh sawngbawl na tur hmun centre/industrial growth centre 8 chhungah sak mek a ni a. Tuirial kam lama bawlhhlawh in hnawh khawm nasa lutuk tih ziaawm theih nana ruahman a ni.

3. *Integrated Command Control Centre* - Aizawl khawpui chhungah, camera chi hrang hrang leh khawl, khawpui chhung en thli thlai a, data te vawng thei, surveillance camera control room atanga zoom theih, hawi kual tir theih baw, enthlatu changkang tak chu Aizawl khawpui chhung hmun 237-ah kan bun ru tawh, kan bunna hmun hi la zep rih a tha awm e. Aizawl khawpui chhungah chuan thimah pawh khawl mit var takin min thlir reng a, kan awmdan a record thei ta tih mipuiin kan hriat a tha awm e. Automatic Number Plate Recognition camera pawh hmun 14-ah dah a ni tawh a, zan thimah eng anga tlan chak pawh ni se, motor number kan lo chhinchhiah thei tawh, motor bo chhui nan pawh a tangkai chho mek a ni. Hmun lui lai leh kawtchhuah hrang hrang hmun 14-ah dah a ni.
4. *Facial Recognition System Camera* - mihring hmel a lo chhinchhiah a, misual hnu chhui nan tangkai tak, he camera hian a hmu thui thei viau, kan hman tangkai tan mek. Aizawl khawpui chhung hmun 5-ah kan dah tawh a, dahna hmun erawh chu puanzar a la ni rih lo a ni.
5. *Digital e-Library* - Central State Library-a lehkhavute a hmuna pan ngai lo a, mahni awmna hmun atanga chhiar theih tura ruahman a ni. Tunah hian lehkhabu 250, phok 62500 dah luh tawh a ni a. elibrarysmartcity.mizoram.gov.in, hawrawp te vek inzawmin, a hre Chiang duh chuan min la zawt dawn nia, luh theih a ni a. Phone atang pawhin Central Library kan chhiar thei tihna a nih chu.
6. *Pollution Test Vehicle* - Pollution Testing Vehicle 5 lei a ni a. Mizoram Pollution Control Board (MPCB) ten an hman tan a, pakhat chu Lungleim lamah hman tir a ni. Lunglei lirthei neite tan a tangkai khawp ang.
7. *Khawpui tih changkangna lam* - Reverse Vending Machine, plastic bottle kan lek lam em em khawlai leh kawr tin ti hnawktu hi a hersawmna khawl Aizawl khawpui hmun eng emaw zatah dah a ni tawh. Khawl chhunga plastic bottle rawlh luhin coupon a rawn her chhuak a, coupon hi sum a chan tir leh theih a ni. Plastic bottle ruak tih bona atan ruahman a ni, mipuiten kan la hmel hriat tawh lo a, puan zar hna uar zawkin kan la rawn thawh leh dawn nia.
8. *Sanitary Napkin Vending Machine & Inclinator* - Hmeichhia te laklawh thilah awlsam tak a sanitary pad an lak theihna tur a ruahman a ni a. Institution leh office 300-ah a halralna chawpin chhawp a ni a, hmeichhiaten an tangkai pui viau a ni.
9. *Smart Classroom* - Zirna in hrang hrang te tan smart classroom project kalpui a ni a. Primary school 121 tan computer set 1 theuh leh printer 1 zel kan pe tawh a. Inter-active Smart Board inches 75 a lian leh ama chhawm tur battery tha tak UPS 3Kva school 94 leh college 14 ah pek a ni. He project hian a vaiin classroom 225 a tuam chhuak tawh a ni.

Khang kha, Pu Speaker, ka Demand ka rawn sawichhuah te chu a ni a. Pu Speaker, ka Demand, hengte hi he House zahawm takin min pawm pui atan ka rawn pharh e.-

<i>Demand No.</i>	<i>Purpose</i>	<i>Amount (in ₹)</i>
13	Personnel & Administration Reforms	4,14,80,000.00
16	Home	8,34,06,39,000.00
30	Disaster Management & Rehabilitation	64,46,63,000.00
46	Urban Development & Poverty Alleviation	3,72,28,94,000.00
TOTAL		12,74,96,76,000.00

Ka lawm e.

HON. SPEAKER : Aw le, tunah chuan kan Minister zahawm tak Pu K. Sapdanga'n a Demand

<i>Demand No.</i>	<i>Purpose</i>	<i>Amount (in ₹)</i>
13	Personnel & Administration Reforms	4,14,80,000.00
16	Home	8,34,06,39,000.00
30	Disaster Management & Rehabilitation	64,46,63,000.00
46	Urban Development & Poverty Alleviation	3,72,28,94,000.00
TOTAL		12,74,96,76,000.00

House ah pass a rawn dil a. Rem ti apiangin “rem ti” ti rawh u le... (**Members:** ‘Remti’). Rem ti lo kan awm chuan “rem ti lo” ti u la. A lawmawm e. Minister zahawm tak Pu K. Sapdanga Demand chu House in lungrual takin a pass ta a ni. (**Pu K. Sapdanga, Minister:** Pu Speaker, ka lawm e.)

Tunah chuan Minister zahawm tak Pu Lalthansanga'n a Demand kan sawihona te wind up turin kan sawm veleh anga. Sawifiah ngai a tih te rawn sawifiah nghal sela. A Demand te House ah pass rawn dil nghal bawk turin i lo sawm ang u.

PU LALTHANSANGA, HON. MINISTER: Pu Speaker, ka lawm e. Ka Demand hi House member zahawm takte mi 21-in an sawi a, a sawitute'n an rilru tak takin an rawn sawi chhuak niin a hriat a; an rawn sawi chhuah zawng zawng kha he demand ah hian react chuan a rei dawn lutuk avangin, khang zawng zawng kha ziakin tah hian kan nei vek a. Chu chu nakinah in zawhna te kha ziakin kan rawn pe mai ang che u, tih kha min pawmpui thei ang em? (*House-in a remti a.*)

Pu Speaker, ka Demand No. 33 - Land Resources, Soil & Water Conservation Department hi leilung humhalhtu department pawimawh tak a ni. Tunlai sik leh sa climate change danglam nasa tak maiah hian a pawimawh em em a. Zoram ang, ruahtui tlak tamna ram leh thal hun rei angah hian a pawimawh zual a. Fur laiin nasa takin ruah a sur a, tuihawk nasa tak a siam a, thalah tui a harsa leh em em a.

Tin, kan lui tui pawh hi kumtin a kam tial tial a, Tlawng Lui pawh hi duh anga pump chhoh tur awm loh chang a awm ta zeuh zeuh a. Lei lung luang ral tur venna atan Soil & Water Conservation hian kawng hnih - *engineering measures* leh *biological*

measures hmangin hma a la thin a. Engineer measure hnuaiah hian hetiang hrang hrang - terrace te, check dam te, contour dam leh contour trance te, slip way leh drop structure te. Tin, biological measure hnuaiah hian - rubber plantation te, broom plantation leh, coffee plantation te a ni a; heng plantation-te hi soil erosion venna tangkai tak a nih rualin, ramngaw chereu tur venna pawimawh tak a nih bakah, a chingtute innghahna tlak income tha an neih theihna tura duan a ni a. Kum 2019-2024 chhunga hnathawh tlangpui chu hetiang hi a ni.

Kum 2019-24 chhungin RKVY sum hmangin Soil & Water Conservation Deptt. hna thawh a ni a, heng hmunahthe hian hnathawh a ni –

Micro watershed project hi hmun 47 laiah a ni a, ka chhiar chhuak vek ang em? (**Hon. Speaker:** Ngailo mai rawh se.) Min remtih sak avangin ka lawm e. Soil & Water Conservation hnuaia sum kan hmuhte chu -

1. Kum 2018 - 22 chhungin rubber plantation leh development atan NABARD sum nuai ₹541.41 hmuh a ni;
2. Kum 2021- 22 chhungin NABARD atangin Mizoram hmun hrang hranga rubber processing unit din nan nuai 680 hmuh a ni;
3. NABARD sum atang thoin financial year 2022-23 leh 2023-24 chhungin leilung luangral tur venna Soil Conservation measures of enhancement of productivity atan nuai ₹900 hmuh a ni;
4. Kum 2023-24 chhungin rubber leh kuhva huan panna kawng siam nan nuai ₹327.465 hmuh a ni;

Tin, kum 2024-25 atan nuai ₹327, ₹465 hmuh belh leh kan inbeisei a. IFAD sum hmanga kan sawrkar ruahhman project lian tak - Fostering Climate residing upland farming system (FOCUS) chu Agriculture, Horticulture leh department dang dangte nens hma lak a ni. Tuirial catchment area treatment atan nuai ₹58.89 hmuh a ni a, hemi pawisa hmang hian Tuirial tuikhuah chhe hma lutuk tur venna a ni a, chhungkaw eng emaw zatin eizawna ngialnghet siam a ni bawk.

Kum 2024- 25-a Land Resources Soil & Water Conservation budget hi nuai ₹2,847.39 niin, hetiang ang hian hman dan tur ruahhman a ni. - Salary - ₹1,905.88 lakhs; TE - ₹6.50 lakhs; Wages - ₹13.20 lakhs; Rent - ₹1 lakh, TM - ₹32 lakhs; OE - ₹ 27.50 lakhs; Advertisement - ₹3 lakhs; Other revenue and expenditure - ₹3 lakhs; minor works - ₹855.11 lakhs, Grand Total - ₹2047.39 lakhs.

Nikum lama budget kha ₹1894 lakhs a ni a, a punna hi ₹953.49 lakhs a ni. State budget atang hi chuanin hnathawhna tur a tam lova, centrally sponsored scheme - RKVY leh NABARD atanga sum kan hmuh hi hnathawhna atana hman a ni.

Land Resources, Soil & Water Conservation Department-ah hian sanction post hi 464 a ni a, tunah hian post 180 fill-up niin, post hrang hrang 284 a ruak mek a. Post awm zawng zawng zatve aia tam hi a ruak mek a ni.

Tun dinhmunah hian Sorkar hian NLUP-ah rubber chingtu chhungkua 1557 leh NABARD atangin tanpuina dawngtu chhungkua 1350 kan nei a; tin, private-a chingtu eng emaw zah kan nei baw k a ni. Tunah hian a kung hnai theih ringawt pawh hi nuai hnih zet awm anga ngaih a ni. Tin, tin 2 leh a chanve (hectare 1) hmunah hianin kung 500 a chin theih a, chuta tanga chhut chuan kg 1500 a thar theih a ni a, kum khat chhungin ₹1,95,000/- a lakluh theih a ni.

A hralhnaah harsatna a awm lova. Rubber Board of India hi tunah Aizawl-ah a rawn inbun tan mek a. He Board nen tango hian nasa takin hma a lak theih niin a lang a. Tunah hian Rubber Board of India leh All India Tyre Manufacturing Association (ATMA) tang kawp hian India hmarchhakah hian rubber chinna lamah tan lak nasat an tum hle a. Kumin hian Mizoram ah pawh ram hectare 2500 laia zauah chin an tum a, hei hi Sorkar tan pawh thil lawmawm tak a ni.

Kumin chhung hian NABARD sum hmangin rubber chinna hmun panna kawng hi hmun 12-ah crore ₹13.311 hmangin laih tum a ni hi a lawmawm hle a ni. Hmunphiah hi loneitute tan sum hnar tha tak a ni a. Loneitute'n hlawk zawka an thar theihna turin a dahthatna tur Sorkarin NABARD sum crore ₹8 hmangin hmun 6 laiah sak a tum hi a lawmawm hle a ni.

Kuhva hi khawthlang leh hmar lama chhungkua eng emaw zatin inngahnan an hmanga; eizawna pui ber a ni a. Loneitute'n man tha zawka an hralh theih nan NEC pawisa hmangin Bilkhawthlir leh Zamuang-ah processing unit pakhat ve ve crore ₹8.04 hmangin siam tum mek a ni a. Hei hi siam zawh a nih hunah chuan, kuhva marketing-a harsatna awm hi a chhawk zangkhai ngei tura beisei a nih bakah, a hralhna pawh hi a tha zawk tura beisei a ni.

Coffee chin hi thil tha tak a ni a, a hralhna lamah harsatna a awm lo a, ramngaw siamna tha tak a ni baw k. Coffee Board of India nena tangtlanga nasa leh zuala tan lak hi a pawimawh em em baw k a ni.

Hei, kan hriat angin ni 100 atana thil tangkai tak mai chu Mizoram a a vawikhat nan Rubber Board of India hi Mizoram ah lo kalin hmalakpui dan tur chi hrang hrangte min rawn sawipui a, kan CM an hmu baw k a; hemi rah hi kan hmu chho zel dawn a ni, tih kha Soil Department-a ka'n sawi theih chu a ni.

(Interruption)

HON. SPEAKER : Aw, khawngaihin. Demand danga i kal hma khan; hei, kan Minister zahawm tak hi damdawi-inah te awmin tun session chhung leh session lai te pawh khan damdawi-inah a awm a ni a; damdawi-in atanga chhuak hlim a ni a. A tawi zawnga i sawi pawh khan member te'n an hrethiam tho turah ngai ila. I dinhmun a zirin, tawi deuh mah se inthlahrun loh kha a tha a nge.

PU LALCHHANDAMA RALTE, OPP. LEADER: Pu Speaker, tuna mi kha keimahni pawh kan lo inrawn a. Ding chung khan a duh tlem te kha sawi mai sela. A hmel han en pawhin damdawi-in chhuak hlim anih avang khan kan hrethiam em em a. Memberte kan zawhna te kha min chhan tho a tum avangin, i rawn rawt a, kha kan thlawp khawp mai. Amah hi a taksa a la fit loa kan hriat deuh avangin kan hrethiam viau a nia.

HON. SPEAKER : Aw, in tilawmawm e. A pawimawh i tih zual tak tak kha a point khan tih mai pawh kha inthlahrung lo la a tha ang e.

PU LALTHANSANGA, MINISTER: Pu Speaker, ka lawm e. Khatianga min phalsak dawn kha chuan pass ka rawn dil mai dawn nge ni ang? (*Memberte'n an remti a.*) Ka hrisel loh hmel bik mang e aw. Ka aw hi a la chak lo deuh hlek a, ka taksa erawh chu a chak viau tawh a.

Pu Speaker, heng demand-te hi he House zahawm takah min pass pui turin ka rawn ngen e. –

<i>Demand No.</i>	<i>Purpose</i>	<i>Amount (in ₹)</i>
33	Land Resources, Soil & Water Conservation	28,47,39,000.00
35	Fisheries	11,01,43,000.00
36	Environment, Forests & Climate Change	1,40,46,08,000.00
41	Sericulture	16,85,64,000.00
TOTAL		1,96,80,54,000.00

HON. SPEAKER : Aw le, tunah chuan Minister zahawm tak Pu Lalthansanga'n heng a demand-te –

<i>Demand No.</i>	<i>Purpose</i>	<i>Amount (in ₹)</i>
33	Land Resources, Soil & Water Conservation	28,47,39,000.00
35	Fisheries	11,01,43,000.00
36	Environment, Forests & Climate Change	1,40,46,08,000.00
41	Sericulture	16,85,64,000.00
TOTAL		1,96,80,54,000.00

House-ah pass a rawn dil ta a. Remti a piangin 'remti' ti rawh u le. (**Members: 'Remti'**) Remti lo kan awm chuan 'remti lo' ti ula.
(*House-in pass pui a remti a.*)

A lawmawm e. Aw le, Minister zahawm tak Pu Lalthansanga demand chu House-in lungrual takin a pass ta a ni. (**Pu Lalthansanga, Hon. Minister:** Pu Speaker, ka lawm e).

Hei, vawiin khan thil dawn duhawm tak mai memberte'n kan nei a. Bible Society of India, Aizawl chuan member zawng zawngte Bible tha deuh mai kan inkimin min present a, Bible Society of India hnenah kan lawm tak zet zet a. Hei hi kan memberte hnenah mimalin keimah ngeiin ka hlan a ni.

Tin, kha, 'Bial chhung sawi awih loh' tih ang lek lek tein member thenkhat khanin kan ngai deuh a. Bial chhung sawi awih loh pawh kha kan ti ngawr ngawr lova; amaherawhchu, kan han sawia chu, 'budget discussion a nih avangin, rampum huap, mipui huapzo deuh hleka sawi kha tun ang hunah chuan a tha e' tih thu kha a ni mai a, engmah khap a awm chuang lo a. Amaherawhchu, 'a huap zau zawk kha a duhawm mang e' tih thu a ni.

Tin, Disaster Management-ah khan, ka biala Phullen khaw chhungah khian kawngpui, Aizawl Hunthar veng ang deuha lei tlahniam reng mai, '*chatuan leimin*' an nei kan nei ve a, kawng pawimawh tak, khaw dang panna kawng a main road a ni. Chu chu kan DM&R te khan a remchang a nih chuan min lo ngaih pawimawh sak ve ula tih kha ngenna ka'n siam a ni e.

Kha, kan puang tawh a, a tirah, kan Chief Minister-in memberte tana dinner kha, ni 14 (kan zawh tuk) ah khan min buatsaih sak dawn a ni a. Khalam atang khan, "an nupuite nen" in rawn ti deuh sap sap a, a har khawp mai a; nupui neilo te pawh awm theih a ni a. Tichuan, 'kawppuite nen' kan ti hram a, mahse chu pawh chu a dik kim chuang lo a; kawppui la nei lo te pawh awm theih a ni a; tehkhin nan NI. Baryl Vanneihsang te, Tv. Pu VL. Zaithanzama ti ang chi te kha maw. Chuvangin, a fawmkem har khawp mai a. Engpawh ni se, anni ang chi kha chu an duh ber rawn hruai awih kan ti mai dawn em ni ang?

A lawmawm e. Vawiin a tan chuan kan business kan zo ta a. Naktuk March Ni 12 (Thawhleleh ni) dar 10:30-ah kan thukhawm leh dawn nia.

Sitting is adjourned. (8:17 PM)